

ማርቆስ ፃኣፔ ጎዳ ዩሱስ ኪሪስቶስ ዛሎ ኮዥ ሃይሶ ዓይያ ካሮ

ማርቆስ ፃኣፔ ኮዥ ሃይሳ፡- «ሃይያኦሲ ናዓሢ ዩሱስ ኪሪስቶስ ኮዥ ሃይሶ ቤርቱኤ» ጌይሢና ዓርቃኔ፤ ሃኖ ኮዥ ሃይሴሎ ጋራ ዩሱሴ ማዳ ዓሲና ሃሣ ቢታንቶ ዓኣ ዓሲ ማዒ ጴዳኔ፤ ዒዛኮ ቢታንታኣ ዔርዚያይዳ፣ ፑርቶ ዓያኖ ዑያይዳ ዓኣ ዋልቆና ዓሲኮ ጎሜ ዓቶሞ ጌይያናይዳ ጴዳኔ፤ ሃሣ ጊንሣ ዩሱሴ፡- «ዓሲ ጎሜ ዓይሉሞይዳፓ ኬሲ፣ ታሼሞፖሞ ዩያ ዛሎ ማሂ ጉሪ ዒንጋኒ ሙኬያ ታኣኒ ዓሲናይኬ» ጌዒ ፔ ቶኦኪና ኬኤዜኔ።

ማርቆስ ዩሱሴ ዛሎ ዓኣ ሃይሶ ሺኢሺሢ ፒዜና ደዲ ዋልቆና ዓኣ ጎይሢና ማዓዛ ዒዛኮ ባሼ ማሊያ ዩሱሴኮ ቃኣሎና ዔርዚያናይዳቱሞንቲ ዒ ማዳ ዲቃሢ ሄርሺሳ ማዳይዳኬ፤ ቃሲ ሃሣ ማሰካ ዮሃኒሴ ዛሎ ሃይሶ፣ ዩሱሴኮ ዋኣያና ማሰቲያና ፃላሄ ዩሱሴ ዳቢሻኑሞፖ ጌሼ ጌሺያ ዛሎ ቃሚሢ ማዔ ዓይሢ ካራ ዒንጌሢኮ ጊንፃ ዩሱሴኮ ዔርዚያና ሃርጊንቲ ዓሶ ፖዒሶ ማዳ ዛሎ ኬኤዛኔ። ጊንፃፓ ናንጊቤቃ ዩሱሴኮ ጊንፃ ሃንታ ናኣታ ዩሱሴ ኮሺ ዔሪ ዔሪ፣ ዱሴ ዋድና ዩሱሴ ዒፃ ዓሳኣ ባሼና ዒዛ ዒዒ ዒዒ ደንዴኔ፤ ሃሣ ጋፒንፃ ዓይያንሢ ዩሱሴ ሼሞፓሢዳ ጋፒንፃ ቃልሾ ኬሎ ጋራ ማዲንቲ ማድና ባሼ ዒዛኮ ሱዲንቶ ዛሎና ሃይባፓ ዔቁያ ዛሎሞ ኬኤዛያኬ።

ማፃኣፔላ ዲማ ዲማ ዓርቁ ባኮ

- ኮዥ ሃይሶኮ ቤርቶ (1:1-13)
- ዩሱሴኮ ጌለላይዳ ማድና ዓሶ ቤርታ ፔጋዲያ (1:14—9:50)
- ጌለላይዳፓ ዩሩሳላሜ ሄላንዳኣና ማዲንቲ ባኮ (10:1-52)
- ጋፒንፃ ቃልሾ ኬላ ዩሩሳላሜይዳ ሃሣ ኮይሎ ዓጫ ማዲንቲ ባኮ (11:1—15:47)
- ዩሱሴኮ ሃይባፓ ዔቁያ (16:1-8)
- ሃይባፓ ዔቁ ጎዳኮ ጴዳያና ሌካ ጫሪንጮ ዓኣዲያ (16:9-20)

ማሰካ ዮሃኒሴ ዩሱሴ ዛሎ ዳጊዲ ኬኤዜሢ
(ማቲ. 3:1-12፤ ሉቃ. 3:1-18፤ ዮሃ. 1:19-28)

1 ሃይ ያኦሲ ናዓሢ * ዩሱስ ኪሪስቶስኮ ኮዦ ሃይሶ ቤርቶኬ፤
 2 ያኦሲ ማሊያ ኬኤዛ ዒሲያሴ ዛሎና፤
 «ያኦሲ ኔኤኮ ቤርታ ጎይያ ጲሻንዳያ
 ታኣኮ ኪኢቶ ናዓሢ ታ ዳካንዳኔ፤

3 ዩይያ፡-

«ዒንሢ ጎዳኮ ጎይያ ገአጊሹዋቲ፤

ሉኡጎ ጎይያዋ ፐዚሱዋቲ»

ጌዒ ጌዒ ዓሲ ናንጉዋ ዳውሎይዳ ዒላታ ዓሲ ዑኡሲ»

ጌይንቲ ፃኣፒንቲሢ ጉዲ፡-

4 ማሰካ ዮሃንሴ ተ ዓሲ ናንጉዋ ዳውሎይዳ ዓሰም፡- «ያኦሲ
 ዒንሢም ጎሞ ዓቶም ጋዓንዳጉዲ ጎሞ ቡኡዒ ቡኡዒ ዋኣሢና
 ማሰቱዋቲ» ጌዒ ኬኤዚ ኬኤዚ ሙኬኔ። 5 ዒማና ዪሁዳ ዓጮ
 ዓሰንታ ዩሩሳላሚ ዓጮ ዓሳ ቢያ ዒዛ ኮራ ሙኪ ጎሞ ቡኡዒ ቡኡዒ
 ዮርዳኖሴ ጎያ ዋራ ማሰታኔ።

6 ዮሃንሴ ጋኣሎ ጌይንታ ቆሎኮ ጋፓኔፓ ኮሾና ማኣያ ማይንቲ፤
 ኬርኖይዳ ቃልሾ ቱካኔ፤ ዒዛኮ ሙዒ ዓቢሢና ዑቶ ዔኤሲናኬ።

7 ዒዚ ዓሰም ኬኤዛያ፡- «ታ ሂርኪ ጌዒ ዒዛኮ ዲርዘ ቱኮ ሱዘ
 ቡላኒ ዒጊቻያ ታ ጊዳፓ ባሼ ታኣኮ ጊንያ ሙካንዳኔ» ጌዔኔ።

8 «ታኣኒ ዒንሢ ዋኣሢና ማሰካኔ፤ ዒዚ ጋዓንቲ ዒንሢ ዓያና ጌኤሺና
 ማሰካንዳኔ» ጌዔኔ።

ዩሱሴኮ ማሰቲያና ፃላሄ ዒዛ ጌሺ ጎሚ ማዲሳኒ ዳንዳዒባኣሢ
 (ማቲ. 3:13-17፤ 4:1-11፤ ሉቃ. 3:21-22፤ 4:1-13)

9 ዩኖ ዋዶና ዩሱሴ ጌለላ ዓጮ ዓኣ ናዚሪቲ ካታማፓ ሙኪ
 ዮርዳኖሴ ጎያ ዋራ ዮሃንሴ ኮራ ማሰቲኔ። 10 ዩሱሴ ዋኣያፓ
 ኬኬሰካኣና ጮሪንጮ ቡለንቲ ጌኤዦ ዓያና ዒዛይዳ ደኣሌ ማሊ
 ኬዳንቲ ዒ ዛጌኔ። 11 ዩማና፡- «ኔኤኒ ታኣኮ ናሽኪንታ ናዓሢኬ፤ ታና
 ኔ ኮሺ ዋዛሳኔ» ጋዓ ዑኡሲ ጮሪንጮፓ ሙኬኔ።

12 ዩማፓ ኔጉዋያ ጌኤዦ ዓያና ዓሲ ናንጉዋ ዳውሎ ዒዚ
 ዓኣዳንዳጉዲ ዔቂሴኔ። 13 ዩሱሴ ዓሲ ናንጉዋ ዳውሎይዳ
 ያይዲታሚ ኬሊ ፃላሄ ዒዛ ዛጋኒ ጌሻንቲ ዳዔኔ፤ ዒዚያ ዓኣሢ ካዮ
 ቦያ ባኣካኬ፤ ጋዓንቲ ያኦሲኮ ኪኢታንቻ ሙኪ ዒዛ ማኣዳኔ።

* **1:1** 1:1 ያኦሲ ናዓሢ፡- ጋዓዛ ፔቲ ፔቲ ሚናኣ ማፃኣፓ «ያኦሲ ናዓሢ» ጋዓ ቃኣላ
 ቃሱዋሴ። **1:2** 1:2 ሚሊ. 3:1። **1:3** 1:3 ዒሲ. 40:3። † **1:4** 1:4
 ማሰካ ዮሃንሴ፡- ፔቲ ፔቲ ሚናኣ ማፃኣፓ «ማሰካ ዮሃንሴ» ጌይያ ሃሺ «ዮሃንሴ ማሰኪ
 ማሰኪ» ጋዔኔ። **1:6** 1:6 2ካኣቶ. ማ 1:8። **1:11** 1:11 ማዢ. ማፃ 22:2፤
 ዓይኑ. 2:7፤ ዒሲ. 42:1፤ ማቲ. 3:17፤ 12:8፤ ማር. 9:7፤ ሉቃ. 3:22።

**ዩሱሴ ሞላህ ሳርቃ ያይደገህ ዔኤሌህ
(ማቴ. 4:12-22፤ ሉቃ. 4:14-15፤ 5:1-11)**

14 የሃሊሴ ቱኡዞ ማኣራ ቱኡቴሰካፓ ዩሱሴ ያኦሲኮ ኮዥ ሃይሶ ኬኤዚ ኬኤዚ ጌሊላ ዓጮ ሙኬኔ። 15 ዒዚ ኬኤዛዎ፡- «ፒዞሞ ዎዳ ሙኬኔ፤ ሃህ ያኦሲኮ ካኣቱማ ዑኬኔ፤ ጎሞይዳፓ ማዑዎቱ፤ ሃያ ኮዥ ሃይሶዎ ጉሙርቁዎቱ» ጌዔኔ።

16 ዩካፓ ዩሱሴ ጌሊላ ባዘኮ ዓጮና ዓኣዲቤቃ ሲሞኦኔና ዒዛኮ ጌርሲ ዒንዲራሴ ጎያህና ሞሎ ፒሪ ዓርቃያታህረ ሞላህ ሳርቆ ሮኦጮ ሱሲጉዲ ጋሶና ሱዞ ባዞ ዎኣያይዳ ዓጋንቴ ዛጌኔ።

17 ዩሱሴያ ዔያቶሞ፡- «ሃሊ ታ ጊንፆ ሙኩዎቱ፤ ታኣኒ ዒንህህ ዓካሪ ዓሲ ፒሪ ዓርቃያ ማሃንዳኔ» ጌዔኔ። 18 ዔያታ ቤዘና ፔኤኮ ሞላህ ሳርቆ ሮኦጮጉዳ ሱዞ ሃሺ ዒዛ ጊንፆ ዓኣዳኔ።

19 ዩካፓ ዒዚ ዳካ ሃኬሰካፓ ሃህ ማሌ ዒሸና ጌኤዚና ማዔያ ዴንቁኔ፤ ዔያታኣ ዜብዲዮሴ ናኣቶንህ ያይቆኦና የሃሊሴናኬ፤ ዩንህያ ዎኣያና ፒንቆ ጎንጎይዳ ፔኤኮ ሞላህ ሳርቆ ሮኦጮጉዳ ሱዞ ኮሻኔ፤ 20 ዩሱሴ ዔያቶ ዛዘጋፆ ዔኤሌኔ፤ ዔያታኣ ዩሱሴ ጊንፆ ዓኣዲፆሮ ዔያቶኮ ዓዳህ ዜብዲዮሴና ዒዛኮ ማዳ ዓሶ ዎኣያና ፒንቆ ጎንጎይዳ ሃሺ ዓኣዳኔ።

**ፑርታ ዓያና ሳርቁ ዓህኮ ዳቂፆ
(ሉቃ. 4:31-37)**

21 ዩማፓ ዩሱሴ ዒዛና ዓኣዘንህህና ዎላ ቁፒርናሆማ ጎፆ ካታሞ ጌሌኔ፤ ሄላህ ዓይሁዶ ዓሶኮ ሃውሺፆ ኬሎና ዔያቶኮ ሺኢጲፆ ማኣሮ ጌሊ ዔርዚህ ሳርቁኔ። 22 ዩሱሴኮ ዔርዚፆ ሙሴ ዔርዚ ዎጎ ዔርዛ ዓሳ ዔርዛህጉዲቱዎንቴ ፔኤኮ ዳኤፒ ቢታንቶና ዔርዛኔ፤ ዩያሮ ዎይዜ ዓሳ ቢያ ዒዛኮ ዔርዚፆና ዲቃቲ ሄርሼኔ።

23 ዒማና ዓይሁዶ ዓሶኮ ሺኢጲፆ ማኣራ ፑርታ ዓያናና ዓኣ ዓሲ ዓኣኔ፤ ዒዚያ ሂዚ ጌዒ ዳጊዲ ዒላቲኔ፡- 24 «ናዚሬቶ ዩሱሴ! ኔኤና ኑኤና ዎላ ዓይጎ ፔቱሞ ዓኣይ? ኔ ኑና ባይዛኒ ሙኪያ? ታኣኒ ኔኤኮ ያኑሞ ዔራራ፤ ኔኤኒ ጌኤሺ ያኦሲ ናይኬ» ጌዔኔ።

25 ዩሱሴያ ፑርቶ ዓያናህ፡- «ዚቲ ጌዔ፤ ዓህዳፓ ኬሰኬ!» ጌዒ ጎሬኔ።

26 ፑርቶ ዓያናህያ ዓህ ሚርጌና ጎቃይሴህኮ ጊንፆ፡ ፑኡፒ ዑኡሲና ዒላቲ ዒዛይዳፓ ኬሰኬኔ። 27 ዓሳ ቢያ ዲቃቲህና ሄርሺ ዎሊ ኮራ፡- «ሃይ ዓይጎ ባኣዚዳይ? ፑርቶ ዓያኖ ፔ ቢታንቶና ዒዚ

ዓይሣኔ፤ ዔያታኦ ዒዛሞ ዓዓይሣንታኔ፤ ሃይ ዓኪ ዔራቶቱዋይ?»
ጌሲ ጌሲ ሴካና ሃንጋና ዋሊ ያኑጩኔ።

28 ዬያሮ ቤዘማና ዬሱሴኮ ሱንፃ ጌሊላና ኮይሎይዳ ዓኣ ዓጮ ቢያይዳ ዋይዚንቲኔ።

ዬሱሴ ሚርጌ ሃርጊንቲ ዓሶ ፓሣሢ
(ማቴ. 8:14-17፤ ሉቃ. 4:38-41)

29 ዬማና ዬሱሴ ዓይሁደኮ ሺኢጲያ ማኣራፓ ኬሰኪ ያይቆኦቤና ዮሃኒሴና ዋላ ሲሞኦኔና ዒንዲራሴና ማኣሪ ጌላንቲ። 30 ጋሮይዳ ሲሞኦኔኮ ባይሳ ቆፃንቲ ላሂ ዓኣኔ፤ ዒዛኮ ቆፃንቲያዋ ዓሳ ዒዛሞ ቤዘና ኬኤዜኔ። 31 ዬሱሴ ዒዛ ባንሢ ዑካፃ ኩጮ ዒዛኮ ዓርቂ ዔቂሴኔ፤ ቆሣኣ ዒዛ ሃሼኔ፤ ዒዛ ዔቂ ዔያቶ ሾኦቲንሣኔ።

32 ዓሳ ጌሊ ሳዓ ዓሚሢኮ ጊንፃፓ ዓሳ ሃርጊንቲ ዓሶንታ ፑርቶ ዓያና ዓርቂ ዓሶ ቢያ ዬሱሴ ባንሢ ዔኪ ዔኪ ሙካኔ። 33 ካታሞ ዓሳ ቢያ ማኣሮ ጋሮይዳ ቡከንቲ ዓኣኔ። 34 ዬሱሴ ሚርጌ ዲማ ዲማ ደርዖና ሜታዳ ዓሶ ፖሲሴኔ፤ ፑርቶ ዓያኖዋ ዓሶፓ ኬሴኔ፤ ፑርቶ ዓያና ዬሱሴ ያናታቲያ ዔራኔ፤ ማዔቶዋ ዔያታ ፔቲ ባኣዚ ጋዓንዳጉዲ ዬሱሴ ዔያቶ ዓይሢባኣሴ።

ዬሱሴ ጌሊላይዳ ዔርዜሢ
(ሉቃ. 4:42-44)

35 ካሪያ ዑፃ፥ ሳዓ ዲሚ ዓኣንቲ ዬሱሴ ጳጩ ኬሰካፃ ሺኢቃኒ ዓሲባኣ ቤሲ ዓኣጳኔ። 36 ሲሞኦኔና ዒዛኮ ላንንሢ ዬሱሴ ኮሲ ጊንፃ ዓኣጳኔ። 37 ዔያታ ዒዛ ጴንቃያ፡- «ዓሳ ቢያ ኔና ኮዓንቲቱዋይ?» ጌዔኔ።

38 ዬሱሴ ማሃዖ፡- «ታ ሙኬሢ ዔርዜኒ ማዔያታሢሮ ዔርዜኒ ሃያ ዑኬ ዓኣ ጉርዶ ኑ ዓኣጳም» ጌዔኔ።

39 ዬያሮ ዓይሁደ ዓሶኮ ሺኢጲያ ማኣራ ዔርዚ ዔርዚ ሃሣ ፑርቶ ዓያኖዋ ዓሶፓ ኬሲ ኬሲ ጌሊላ ዓጮ ቢያ ሃንቲኔ።

ዑፃ ኬሰካ ደርዓሢና ዓርቂንቲ ዓሢ ዬሱሴ ፓሣሢ
(ማቴ. 8:1-4፤ ሉቃ. 5:12-16)

40 ዑፃይዳ ኬሰካ ፑርቶ ደርዓሢና ቶ ዓርቂንቲ ፔቲ ዓሲ ዬሱሴ ኮራ ሙኪ ዒዛኮ ቶኮ ጴማ ጉሞዓታዖ፡- «ኔ ኮዔቲ ታና ጌኤሻኒ ዳንዳዓኔ» ጌሲ ሺኢቄኔ።

1:39 1:39 ማቴ. 4:23፤ 9:35። † 1:40 1:40 ዑፃይዳ ኬሰካ ፑርቶ ደርዓሢ፡- ጋዓዛ ጌኤኸ ማፃኣፓ ጋዓ ጎይያና ዑሢዳ ኬሰካያ ዓሲዳፓ ዓሲ ዓርቃኒ ዳንዳዓ ደርዖ ቢያኬ (ሉቂ. ዓከ 13 ጌዳ ዛጌ)።

41 ዩሱሴያ ሚጨንታ? ኩጮና ዒዛ ካላሚ፡- «ጌኤሽኬ! ኔ ጌኤሽካንዳጉዲ ታ ኮዔኔ» ጌዔኔ። 42 ዑያይዳ ከሰካ ፑርቶ ደርዓሢ ዓሢ ሃሻዛ ቤዘማና ዒዚ ጌኤሽኬኔ። 43 ዩሱሴ ዓሢ ዳካእና ሂዚ ጌዒ ኮሺ ላቲ ዓይሢኔ፡- 44 «ሃያ ባኮ ያእማኣ ኔ ከኤዙዋጉዲ ኔና ዔሬ፤ ጋዓንቴ ዓኣዲጋፓ ኔና ቁኤሳሢም ዳዌ፤ ዴሮማኣ ኔኤኮ ጌኤሽኪፃ ማርካ ማዓንዳጉዲ ዩያጉዴ ደርዓሰካፓ ዳቄ ዓሳ ዒንጎም ጌዒ ሙሴ ዓይሢ ዒንጊያ ያእሲም ዒንጌ።»

45 ያዒ ማዔቶዋ ዓሢ ዒኢካፓ ከሰካዎ ዓሲም ቢያ ቤዘይዳ ከኤዚሢ ዓርቁኔ። ዩያይዳፓ ዔቁያና ዩሱሴ ዎኖ ካታም ማዔቶዋ ፔጌና ጌላኒ ዳንዳዒባኣሴ። ጋዓንቴ ካታምኮ ዙላ ዓሲባኣ ዔዌ ቤሰካ ናንጋኔ፤ ዓሳ ቢያ ቤዛፓ ዒዛ ባንሢ ሙካኔ።

2

ዩሱሴ ዎቦ ዓሢ ፒሺሢ (ማቲ. 9:1-8፤ ሉቃ. 5:17-26)

1 ዩሱሴ ዳካ ዓቢኮ ገንፃፓ ቁፒርናሆሜ ጌይንታ ካታሚሎ ማዒ ሙከኔ፤ ዒዚ ዒኢካ፣ ናንጋ ማኣራ ዓኣሢ ዋይዘንቴኔ። 2 ሚርጌ ዓሲ ሙኪ ጋሮና ዙሎና ቤሲባይዚ ኩሚ ቡኪንቴኔ፤ ዩሱሴያ ዔያቶም ቃኣሎ ከኤዛኔ። 3 ዩማና ያይደ ዓሲ ፔቴ ሃንታኒ ዳንዳዑዋ ዎቦ ዓሲሰኬያ ከዲ ዩሱሴ ባንሢ ሙከኔ። 4 ዴርኮ ዲቡዋፓ ዔቁያና ዓሢ ዔያታ ዩሱሴ ሂሊሳኒ ዳንዳዒባኣሢሮ ዩሱሴ ዓኣ ዛሎና ሳኮ ሻሂ ዩሱሴኮ ቤርታ ዒዛ ከደና ሃላሢና ዎላ ከይሴኔ። 5 ዩሱሴ ዔያቶኮ ዎማዒ ጉሙርቁሢ ዓኣቴያ ዛጋያ፣ ሃንታኒ ዳንዳዑዋ ዎቦ ዓሢም፡- «ታ ናዓሢዮ ጎማ ኔኤኮ ዓቶም ጌዒንቴኔ» ጌዔኔ።

6 ሙሴ ዔርዜ ዎጎ ዔርዛዘንሢዳፓ ፔቴ ፔቴዘንሢ ዒኢካ ዴዒ ዓኣዎ ፔ ዒኖና፡- 7 «ዎዲ ሃይ ዓሢ ሃያ ጌዒ ጌሰታይ? ሃይ ያእሲ ጫሽኪሢኔ፤ ፔቴ ያእሲዳፓ ዓታዛ ጎማ ዓቶም ጋዓኒ ዳንዳዓሢ ያናዳይ?» ጌዒ ማሌኔ።

8 ዩማዒ ጌዒ ዔያታ ማላኣና ዩሱሴ ቤዘማና ዔያቶኮ ዒኖ ማሊዮ ፔ ዓያኖና ዔራዎ ሂዚ ዔያቶም ጌዔኔ፡- «ዒንሢ ዒኖና ዓይጎሮ ሃያ ጌይ ማላይ? 9 ሃያ ሃንታኒ ዳንዳዑዋ ዎቦ ዓሢም ጎማ ኔኤኮ ዓቶም ጌዒንቴኔ» ጌዒሢና «ዔቁ ኔኤኮ ኔና ዔኪሙኮና ሃላሢ ከዲ ዓኣዴ» ጌዒሢዳፓ ዎና ሹሌዓይ? ጋዓዎ፣ 10 ዓሲ ናዓሢኮ * ሳይይዳ ጎማ ዓቶም ጋዓኒ ዎልቁና ዓኣ ቢታንቶ ዓኣያ ማዔሢ ዒንሢ

1:44 1:44 ሊዊ. ዓከ 4:1-32። * 2:10 2:10 ዓሲኮ ናዓሢ፡- ጋዓ ሱንፃ ዩሱሴ ኮዮ ሃይሶ ማጻጸፊዳ ፔና ዔኤላ ሱንፃከ።

ዔራንዳጉዲ» ጌዔስካፓ ሃንታኒ ዳንዳዑዋ ዋባሢ። 11 «ታ ኔኤም ጋዔ፤ ዔቁ ኔና ኬዲ ሙኮና ሃላሢ ኬዲ ኔ ማኣሪ ዳንዳ» ጌዔ።

12 ሃንታኒ ዳንዳዑዋ ዋባሢያ ቤዘማና ዔቃያ ፔና ኬዲ ዔኪ ሙኮና ሃላሢ ኬዲ ቢያ ዓሳ ዛጋንቴ ኬስኬ። ዩያሮ ዓሳ ቢያ ዲቃቴ ሄርሻያ፡- «ሃያ ጉዳ ባኣዚ ኦ ዛጊ ቤቁ ባኣሴ» ሂዚ ጌዒ ጌዒ ያኦሲ ጋላቴ።

ዩሱሴኮ ሌዊ ዔኤሊያ
(ማቴ. 9:9-13፤ ሉቃ. 5:27-32)

13 ዩማፓ ዩሱሴ ጌሊላ ባዘ ዓጮ ለሚ ዓኣዳ፤ ዳራ ቢያ ዒዛ ባንሢ ሙካዛ፤ ዒዚ ዔያቶ ዔርዘ። 14 ዩካፓ ዒዚ ዳንዳኣና ዒልፒዮሴ ናኣዚ ሌዊ ጎያሢ ኮርሞም ማዓ ባኣዚፓ ቢያ ሚኢሽ ቡኩሳያታሢር ዒዚ ፔኤኮ ማዳ ቤዛ ዓኣንቴ ዛጋያ፡- «ሃኒ ዩዔ» ጌዔ፤ ዒዚያ ዔቁ ዒዛ ጊንያ ዓኣዳ።

15 ዩካፓ ዩሱሴ ሌዊ ማኣራ ሙኤዚር ጊኢጋዛ ሚርጌ ዓሲ ዒዛ ጊንያ ሃንታሢር ዔያቶይዳፓ ሚርጌሢ ኮርሞም ማዓ ባኮይዳፓ ሚኢሽ ቡኩሳዘንሢና ጎሞ ዓሶናታያ ዩሱሴና ዒዛኮ ጊንያ ሃንታ ናኣቶና ዋላ ሙዒኒ ዳዔ። 16 ፔርሴ ዓሶ ዜርፃፓ ማዔ፤ ሙሴ ዔርዘ ዋጎ ዔርዘዘንሢ ዩሱሴ ሚኢሽ ቡኩሳ ዓሶና ጎሞ ዓሶና ዋላ ሙዒሢ ዛጋያ፡- «ዓይጎር ዒዚ ዩያጉዳ ዓሶና ዋላ ሙዒይ?» ጌዒ ዩሱሴኮ ጊንያ ሃንታዘንሢ ያኦጮ።

17 ዩሱሴ ዔያታ ዩያ ጋዒሢ ዋይዛያ፡- «ዳኤሻ ዔራ ዓሲ ሃርጊንቴ ዓሲም ኮይሳንዳኣፓዓቴም ዋሊ ዓሲም ኮይሱዋሴ፤ ታኣኒ ሙኬሢ ጎሞ ዓሶ ዔኤሊኒ ማዓንዳኣፓዓቴም ጌኤኸ ዓሶ ዔኤሊኒ ሙኪባኣሴ» ጌዔ።

ሙያ ሃሺያ ዳምቦ ዛሎ ያኦጮንቴ ያኦጮሢ
(ማቴ. 9:14-17፤ ሉቃ. 5:33-39)

18 ማስካ ዮሃንሴኮ ጊንያ ሃንታዘንሢና ፔርሴ ዓሶና ሙያ ሃሺያ ዳምቦ ካፓ፤ ዩያሮ ዓሳ ዩሱሴ ባንሢ ሙካያ፡- «ማስካ ዮሃንሴ ጊንያ ሃንታዘንሢና ፔርሴ ዓሶና ሙያ ሃሺ ዳምቦ ካካፓንቴ፤ ኔ ጊንያ ሃንታዘንሢ ዩያጉዲ ካፑዋኣሢ ዓይጎርዳይ?» ጌዔ።

19 ዩሱሴ ዔያቶም ማሃያ፡- «ዑኡታሢ ዔያቶና ዋላ ዓኣንቴ ዔፖ ዓሳ ሙያ ሃሺያ ዳምቦ ካፓኒ ዳንዳዓ? ዑኡታሢ ዔያቶና ዋላ ዓኣንቴ ዔያታ ሙያ ሃሺያ ዳምቦ ካፓኒ ዳንዳዑዋሴ። 20 ጋዓንቴ ዑኡታሢ ዔያቶይዳፓ ዳማዳንዳ ዋዳ ሙካንዳ፤ ዩዳ ዋዶና ዔያታ ሙያ ሃሺያ ዳምቦ ካፓንዳ፤» ጌዔ።

21 «የናታቱያ ዓኪ ዓፒላይዳፓ ዔኪ ጨሚ ዓፒላይዳ ዓገ ሲኩዋሴ፤ ዓገ ሲኩቶ ዓኮ ዓገፀ ጉርሚ ጨሞ ዓፒሎ ዳዳርዘንዳኔ፤ ዳርዒፀኣ ቤርታኣሰካፓ ፔቶ ዳልጋንዳኔ። 22 ዩያጉዲ ሶልኪ ዑሺ ሞሆ ጨንቄ ያቲዳ ሺሜ ሞሃንቱዋሴ፤ ሞሃንቱቲ ጋዓንቲ ሺሜ ዑዣ ቡርቂ ያቶ ዲኡሳንዳኔ። ዑዣኣ ላኣሊንታንዳኔ። ዩያር ሺሜ ዑሺም ዓኪ ጌኤሺ ያቲ ኮይሳኔ።»

ዓይሁደኮ ሃውሾ ዓቦ ዛሎ ያኦጨንቲ ያኦጨሢ
(ማጥ. 12:1-8፤ ሉቃ. 6:1-5)

23 ዩሱሴ ዒዛኮ ጊንፆ ሃንታዘንሢና ሞላ ዓይሁደኮ ሃውሾ ኬሎና ፔቲ ዛርጌ ጎሺ ጊዴና ዓኣዳንቲ ዒዛኮ ጊንፆ ሃንታዘንሢ ዛርጎ ቲሻሢ ዲኡዚ ዲኡዚ ዔኪሢ ዓርቄኔ። 24 ዩያር ፔርሴ ዓሳ ዛጋያ፡- «ሃኣዛጌ፣ ኔኤኮ ጊንፆ ሃንታዘንሢ ዓይሁደኮ ሃውሾ ኬሎና ማዳንቱዋ ባኣዚ ዓይጎር ማዳይ?» ጌዒ ያኦጨኔ።

25 ዩሱሴ ማሃያ፡- «ዳውቲ ፔኤኮ ዓሶና ናይዲንቲ ሜታዳ ሞደና ዒዚ ዓይጎ ማዳቶዋ ዒንሢ ማሊ ናባቢባኣዳዳ? 26 ዓቢያታሬ ጎያሢ ቄኤሶኮ ቢያ ዑሢ ማዒ ማዳ ሞደና ዒዚ ያኦሲ ማኣሪ ጌሊ ቄኤሶይዳፓዓቲም ያኦማኣ ላኣጊንቲያ ማዒ፣ ያኦሲም ዒንጎና ካፆ ሙዔኔ፤ ዒዛና ሞላ ዓኣ ዓሶማኣ ዒንጌኔ።»

27 ሃሢ ዩሱሴ ሂዚ ጌዔኔ፡- «ዓይሁደኮ ሃውሺያ ኬላ ዓሲም ማዢንታንዳኣፓዓቲም ዓሲ ዩኖ ሃውሾ ኬሌሎም ማዢንቲባኣሴ።

28 ዩያጉዲ ዓሲኮ ናዓሢ ዩኖ ሃውሾ ዓቤሎኮዋ ጎዳኬ።»

3

ዩሱሴ ኩቺ ሞቦ ዓሲ ዳቂሼሢ
(ማጥ. 12:9-14፤ ሉቃ. 6:6-11)

1 ዩካፓ ዩሱሴ ዓይሁደ ዓሶኮ ቡኪንቶ ቤዘ ማዒ ጌሌኔ፤ ዒኣካ ፔቲ ኩቺ ሞቦ ዓሲ ዓኣኔ። 2 ዓይሁደ ዓሶኮ ቡኪንቶ ቤዘይዳፓ ፔቲ ፔቲ ዓሳ ዩሱሴ ሞጎና ዓይሢሳኒ ኮዓያ፡- «ሂንዳ ሃኖ ዒዚ ሃውሾ ዓሶና ሃያ ሞቦ ዓሢ ፓሣቲ ኑ ዛጎም» ጌዒ ዒዛ ካፔኔ። 3 ዩሱሴ ኩጮ ሞቦ ዓሢም፡- «ሃይካ ሙኪ ባኣካ ዔቄ» ጌዔኔ። 4 ዩካፓ ዒዚ ዔዔቶ ያኦጨያ፡- «ዓይሁደኮ ሃውሾ ኬሎና ዓይሢንቲሢ ኮሺ ማዳንዳጉዲም ፑርታ ማዳንዳጉዲዳይ? ሺምፖ ዳዳቂሾም ሞቦ ባባይዘምዳይ?» ጋዓዛ፣ ዔዔታ ጋዓንቲ ዚቲዮ ጌዔኔ። 5 ዩሱሴ

2:23 2:23 ላሚ. ሞማ 23:25። 2:25 2:25 1ሳሙ. 21:1-6። 2:26 2:26 ሉዊ. ዓኬ 24:9።

ዔያቶሶ ዒና ዔኩዋያ ማዒ ደጩሢሮ ያዪጋፓ ዒኢካ ዓኣ ዓሶ ደጋዲ ዛጋያ ዋሶ ዓሢሞ፡- «ኩጮ ኔኤኮ ፒሼ» ጌዔኔ። ዒዚያ ፒሼ ዋደና ኩጮ ዳቄኔ። 6 ዬያሮ ፔርሴ ዓሳ ዓይሁደ ዓሶኮ ቡኪንቶ ቤዛፓ ኬሰካዖ ዑኩና ዋማይዲ ዬሱሴ ዔያታ ባይዛንዳቲያ ካኣታሢ ሄሮዲሴ ዓሶና ዋላ ዘርቲኔ።

ዴራ ባዘ ዓጫ ዬሱሴ ባንሢ ቡኪንቲሢ

7-8 ዬሱሴ ዒዛኮ ጊንያ ሃንታዞንሢና ዋላ ጌሊላ ባዘ ባንሢ ዴንዴኔ። ዒማና ዒዚ ማዳ ባኮ ዋይዜ ዓሳ ማርጌሢ ዒዛ ባንሢ ሙኬኔ፤ ዔያታ ሙኬሢ፡- ጌሊላይዳፓ፣ ዪሁዳይዳፓ፣ ዬሩሳላሚይዳፓ፣ ዔደሚያሴይዳፓ፣ ዮርዳኖሴ ዋሮኮ ሱካ ዓኣ ዓጫፓ ሃሢ ደርሴና ሲደና ጌይንታ ካታማፓኬ። 9 ዳሮኮ ኮሺ ዲቢያይዳፓ ዔቄያና ዓሳ ዒዛ ቱቺ ሜታሱዋጉዲ ዋኣያና ፒንቆ ጎንጎ ዒዛም ጊኢጊሻንዳጉዲ ዒዛኮ ጊንያ ሃንታዞንሢ ዒ ዓይሢኔ።

10 ማርጌ ዓሶ ዒዚ ቤርታ ዓውሴሢሮ ሃርጌና ሜታዳ ዓሳ ቢያ ዒዛኮ ዑያ ካኣማኒ ኮዒ ሂዒንታኔ። 11 ፑርቶ ዓያና ዬሱሴ ዛጌ ዋደና ቢያ ዒዛኮ ቤርታ ሎኦሚ ሎኦሚ፡- «ኔኤኒ ያኦሲ ናዓሢኬ» ጌዒ ጌዒ ዒላቲኔ።

12 ዬሱሴ ፑርቶ ዓያኖም ዒዛኮ ያኦም ኬኤዙዋጉዲ ደዲሺ ጎሬኔ።

ዬሱሴ ታጳ ላምዖ ዳኪንቲዞንሢ ደኦሪሢ

(ማቲ. 10:1-4፤ ሉቃ. 6:12-16)

13 ዬሱሴ ጌሚሮ ኬሰካዖ ዒዚ ኮዔዞንሢ ፔ ባንሢ ዔኤሌኔ፤ ዔያታኣ ዒዛ ባንሢ ሙኬኔ። 14 ዔያታ ዒዛና ዋላ ማዓንዳጉዲ፣ ዔርዛንዳጉዲ ዔያቶ ዳካኒ ታጳ ላምዖንሢ ደኦሪ፡- «ዳኪንቲዞንሢ» ጋዓ ሱንሢ ጊሢኔ። 15 ሃሢ ፑርታ ዓያና ኬሳንዳጉዲ ዋልቄና ዓኣ ቢታንቶ ዔያቶም ዒንጌኔ።

16 ታጳ ላምዖ ዳኪንቲዞንሢ ማዒ ደኦሪንቲዞንሢ ሃንሢኬ፡- ጳዲሮሴ ጌዒ ሱንያ ጌሦና ሲሞኦኔ፣ 17 ቦያኔርጌሴ ጌይፃ ፑጉንሢጉዲ ማዔ ዓሶንሢ ጌዒ ሱንያ ጌሢንቲ ዜብዲዮሴ ናኣቶ ያይቆኦቤና ዒዛኮ ጌርሲ ዮሃኒሴ፣ 18 ዒንዲራሴ፣ ፒልጶሴ፣ ቤርቲሌሞሴ፣ ማቲዮሴ፣ ቶኦማኦሴ፣ ዒልፒዮሴ ናኣዚ ያይቆኦቤ፣ ታዲዮሴ፣ ፔ ዓጮ ሚጩንታ ሲሞኦኔ፣ 19 ዬሱሴ ዓኣሢ ዒንጌ ዓሰቆሮንቶ ዪሁዳንታኬ።

ዬሱሴና ቤዔልዛቡሌ ጌይንታ ፑርቶ ዓያኖኮ ሱኡጋሢና

(ማቲ. 12:22-32፤ ሉቃ. 11:14-23፤ 12:10)

20 ዩካፓ ዩሱሴ ማእሪ ጌላዛ ሚርጌ ዓሲያ ሙኪ ቡኬሢሮ ዒዛና ዒዛኮ ጊንያ ሃንታዞንሢናም ዴዒ ሙዒን ማጌጌ። 21 ዩሱሴኮ ማእሮ ዓሳ፡- «ዒዚ ዣኸካኔ» ዓሳ ጋዓሢ ዋይዚ ዒዛ ዓርቂ ዔካኒ ሙኬጌ።

22 ዩሩሳላሚፓ ሙኬ ሙሴ ዔርዜ ዋጎ ዔርዛዞንሢ፡- «ዒዛይዳ ቢዔልዛቡሌ ዓኣኔ፣ ዒዚ ፑርቶ ዓያኖ ኬሳሢ ሃያ ፑርቶ ዓያኖኮ ሱኡጋሢ ማዔ ቤዔልዛቡሌናኬ» ጌዒ ጌዒ ጌሰታጌ።

23 ዩሱሴ ዔያቶ ፔ ባንሢ ዔኤሊ ኮኦኪንሢና ሂዚ ዔያቶም ጌዔ፡- «ፃላሂ ፃላሂ ዋዲ ኬሳኒ ዳንዳዓይ? 24 ፔቴ ካኦቲ ዓጪ ዋሊና ፓቂንቲ ያልቲቶ ዩኖ ዓጮ ካኦቲማ ደዲ ናንጋኒ ዳንዳዑቡ። 25 ሃሣ ፔቴ ማእሪ ዓሲ ዋሊና ዣሊ ፓቂንቲቴ ዩና ማእሪላ ማእሪ ማዓኒ ዳንዳዑቡ፤ 26 ዩያጉዲ ፃላሂ ዋሊና ፓቂንቲቶ ጋፒንሢ ማዓንዳኦፓዓቲም ዔቃኒ ዳንዳዑቡ፤

27 «ሃሣ ፔቴ ዋልቁና ዓኣ ዓሲ ማእሪ ጌላኒ ዒዛ ዋልቆሲ ቤርታዲ ቲኪባኦ ዒዛኮ ዓኣ ባኮ ቡሪ ዔካኒ ዳንዳዒንቲቡ።»

28 ዩሱሴ ሃሣ ኬኤዛዎ፡- «ጎኔ ታ ዒንሢም ጋዓጌ፤ ዓሳ ማዳ ጎሞና ሃሣ ያኦሲ ጫሽካ ጫዣታዎ ዓቶም ጌዒንታንዳጌ። 29 ጋዓንቲ ዓያና ጌኤሽ ጫሽካሢም ቢያ ናንገና ጋሌ ማዓንዳኦፓዓቲም ጎማ ዓቶም ጌዒንታዓኬ» ጌዔጌ። 30 ዩሱሴ ዩኖ ጌዔሢ ዓሳ፡- «ዒዛይዳ ፑርታ ዓያና ዓኣኔ» ጌዔሢሮኬ።

ዩሱሴኮ ዒንደና ጌርሲንሢና
(ማቴ. 12:46-50፤ ሉቃ. 8:19-21)

31 ዩሱሴኮ ዒንደና ጌርሲንሢና ዒዚ ዓኣ ቤዞ ሙኪ ካራ ዔቃዎ ዓሲ ዳኪ ዒዛ ዔኤሊሴጌ። 32 ዒዛኮ ዓጫ ዴዒ ዓኣ ዓሳ ዒዛም፡- «ኔኤኮ ዒንዳኣ፣ ጌርሲንሢና፣ ጌሮንሢ * ካራ ኔና ኮዓጌ» ጌዒ ኬኤዜጌ።

33 ዩሱሴ ዔያቶም፡- «ዒንዳ ታኣኮ ያናዳይ? ጌርሲንሢያ ያናንሢዳይ?» ጌዒ ማሃዎ፣ 34 ዒዛኮ ዓጫ ዴዔ ዓሶ ባንሢ ዛጊ ዛጊ፡- «ሃኣቶ ዛጉዋቴ፣ ታኣኮ ዒንደና ጌርሲንሢና ሃኣቶኬ፤ 35 ያናታቴያ ያኦሲ ዓይሢያ ኩንሣዞንሢ ቢያ ታኣኮ ዒሾ ሚሾንታ ዒንደንታኬ» ጌዔጌ።

3:22 3:22 ማቴ. 9:34፤ 10:25። 3:29 3:29 ሉቃ. 12:10። * 3:32 3:32 ጌሮንሢ፡- ጋዓዞ ፔቴ ፔቴ ሚናኣ ማፃኦፓ ቃሱቡ።

4

ዜርሢ ዜርቃ ዓሲ ኮኦኪንሢ (ማቴ. 13:1-9፤ ሉቃ. 8:4-8)

1 ዩሱሴ ጌሊላ ባዞ ዓጫ ለሚ ዔርዚሢ ዓርቄ። ኮሺ ሚርጌ ዓሲ ዒዛ ባንሢ ሙኪ ቡኪንቴያ ማዔሢር፣ ዒዚ ዋኦያና ፒንቆ ጎንጎ ጋርጌሊ ዴዔ፤ ዴሪ ጋዓንቴ ቢያ ባዞ ዓጫ ዔቄ። 2 ዒዚ ዔያቶም ኮኦኪንሢና ሚርጌ ባኦዚ ዔርዜ፤ ዔርዚያዋ ሂዚ ጌዒ ዓርቄ፡-

3 «ዋይዙዋቴ! ፔቴ ዓሲ ዜርሢ ዜርቃኒ ኬሰኬ፤ 4 ዒዚ ጎዞይዳ ዜርቃኦና ፔቴ ፔቴ ዜርፃ ጎይያ ዓጫ ኬዳዛ ካፓ ሙኪ ሙዔ፤ 5 ዛሎ ዜርፃ ዳካ ዓጪ ዓኦ፣ ሃኦሻ ሳዓይዳ ኬዳያ ሚርጌ ዓጪ ባኦሢር ዑኩና ባቃሌ። 6 ማዔቶዋ ዓባ ኬሰኬ ዎድና ሹሌ፤ ፃጲ ባኦሢርዋ ማሌ። 7 ዛሎ ዜርፃ ዓንገሢ ቶሻ ባኦካ ኬዴም ዓንገያ ዑጊ ባይዜሢር ዓኦቶዎ ዓቴ። 8 ዓቴ ዜርፃ ሃሢ ቃራ ሳዓይዳ ኬዴሢር ባቃሌ፤ ባቃላኦ ዑጊ ካፄ፤ ፔቴዛ ሃይሢታሚ ዓኦ፤ ባጌላ ላሂታሚ ዓቴዛኦ ጭታ ዓኦ።»

9 ዩሱሴ፡- «ሃያ ዋይዛሢ ኮሺ ዋይዞንጎ!» ጌዔ።

ዩሱሴ ኮኦኪንሢና ኬኤዚሳኒ ማሄ ባኮ (ማቴ. 13:10-17፤ ሉቃ. 8:9-10)

10 ዩሱሴ ፔኤር ማዔ ዎድና ዒዛ ኮራ ዋይዞር ሙኬ ዓሶንታ ዒዛኮ ገንያ ሃንታ ታጾ ለምያ ኦኦቶንታ ኮኦኪንሢና ዒዚ ኬኤዜሢኪኮ ቡሊያ ዎኦጩ። 11 ዒዚ ዔያቶም ሂዚ ጌዔ፡- «ዒንሢም ዎኦሲኮ ካኦቶም ማኦርኮ ዓኦሺንቴ ዔራቶ ዒንገንቴ፤ ሃንጎዋቶ ዙላ ዓኦኦንሢም ጋዓንቴ ቢያ ባኦዚ ኮኦኪንሢና ኬኤዜንታ። 12 ያዲ ማዔሢ፡-

ዔያታ ዎኦሲ ባንሢ ማዔ
ጎማ ዔያቶም ዓቶም ጌዒንቴዋጉዲ
ዛጎ ዛጋያታዎ ዴንቁዋሴ
ዋይዞ ዋይዛያታዎ ዒና ዔኩዋሴ »
ጌይንቴ ጎይያናኬ።

ዜርሢ ዜራ ዓሲኮ ኮኦኪንሢ ቡሊያ (ማቴ. 13:18-23፤ ሉቃ. 8:11-15)

13 ዩሱሴ ዔያቶም ሂዚ ጌዔ፡- «ዒንሢማኦ ሃይ ኮኦኪንሢ ዔርቱዋዳዳ? ሂዳያ ሃንጎ ኮኦኪንሢ ቢያ ዎዲ ዒንሢ ዔራኒ ዳንዳዔይ? 14 ዜርቃሢ ዎኦሲ ቃኦሎ ዜርቃ፤ 15 ቃኦላ ዜርቄንታ ዎድና ጎይያ ዓጫ ኬዴ ዜርፃላ ዳዋሢ፡- ቃኦሎ ዋይዛኦና ቤዞማና

4:1 4:1 ሉቃ. 5:1-3። 4:12 4:12 ዒሲ. 6:9-10።

ዔያቶኮ ዒኖይዳ ዜርቁንቴ ቃኦሎ ጻላሄ ዔካ ዓሶኬ። 16 ዬያጉዲ ሃኦቾ ሳዖይዳ ዜርቁንቴህ ዳዋሂ፡- ቃኦሎ ዋይዛዖ ዑኩና ዋዛዲ ዔካዘንሂኬ፤ 17 ጋዓንቴ ዔያታ ዳካ ዋዴር ማዓንዳኦገዓቴም ዖደሲ ጻጲ ባኦሂር ዳካ ዋዴኮ ጊንፃገ ዖኦሲ ቃኦሎ ዛሎና ሜቶና ዳውሲሂና ሙኬቶ ዳቢንቴ ኔጉዋዖ ሃሻኔ። 18 ዓንጊዖ ቶሾ ባኦካ ዜርቁንቴ ዜርፄላ ዳዋሂ፡- ቃኦሎ ዋይዛ ዓሶንሂኬ፤ 19 ጋዓንቴ ሃያ ዓጮ ናንጎር ሜታዲያና ቆሎ ናሹሞና ሜሌ ፓሠዋ ባኦዚ ሱኦካዲሂ ዔያቶኮ ዒኖይዳ ጌላዖ ዖኦሲኮ ቃኦሎ ዋሊሲ ዓኦፑዋያ ማሃኔ። 20 ቃር ዓጮይዳ ዜርቁንቴ ዜርፃ ዳዋሂ፡- ጋዓንቴ ቃኦሎ ዋይዚ ዔካ ዓሶኬ። ዬያጉዴ ዓሳ፡- ፔቴይ ሃይሂታሚ፣ ባገሂ ላሂታሚ፣ ዓቴሂ ፄኤታ ዓኦፒ ዓኦፓኔ።»

ዓኦሻንቴ ፖዒ
(ሉቃ. 8:16-18)

21 ሄሊሳዖ ዬሱሴ ዔያቶም፡- «ዓሲ ፖዒ ፖዒሳዖ ዔኤቢና ጉኡፒ ጌሃ? ጌሃሂ ፖዓ ጴዳያ ጴጌ ቤሲዳቱዳዳ? 22 ዋይቴቶዋ ዓኦሻንቴ ባኦዚ ፔጋዲዋዖ ዓኦቻና ባኦዚ ዔርቱዋዖ ዓታዓኬ። 23 ዬያር ዋይዛ ዋይዚ ዓኦሂ ዋይዘንጎ» ጌዔኔ።

24 ዬሱሴ ለሚ ዔያቶም፡- «ዋይዛ ባኮር ዒንሂ ኮሺ ዔሩዋቴ፤ ዒንሂ ማካ ባኮማና ዒንሂም ማኪንታንዳኔ፤ ዬያገ ዑህ ዒንሂም ቃሲንታንዳኔ፤ 25 ዔኤቢ ዓኦሂም ጊዳ ቃሲንታንዳኔ፤ ዔኤቢባኦ ዓሂዳገ ዳካታዖ ዓኦቶ ዒማ ዔከንታንዳኔ» ጌዔኔ።

ባቃሊ ዑጋ ዜርሂኮ ኮኦኪንሂ

26 ሄሊሳዖ ዬሱሴ ዔያቶም ሂዚ ጌዔኔ፡- «ዖኦሲኮ ካኦቱማ ሳዓ ዜርሂ ዜርቃ ዓሲ ማላኔ። 27 ዓሂያ ዋንቶና ጊንዓኔ፤ ካራዛ ዒዚ ጴጫኔ፤ ዋማይዲታቴያ ዒዚ ዔሩዋንቴ ዜርፃ ባቃሊ ዑጋኔ። 28 ሳዓ ፔኤር ቤርታዲ ባቃልሲ፣ ሄሊሳዖ ጉኡሸኪሲ ዳዋኔ፤ ጊንፃገ ጉኡዦ ዑዖይዳ ዓኦፒ ጴዳኔ። 29 ሃኦካ ካዲ ሜሌም ቡር ዋዳ ሄላዛ ዓሂ ዑኩና ሃኦኮ ቡኩሳኔ።»

ዳካ ሴናፒጩ ጌዒንታ ዜርሂኮ ኮኦኪንሂ
(ማቴ. 13:31-34፤ ሉቃ. 13:18-19)

30 ዬሱሴ ሂዚ ጌዔኔ፡- «ዖኦሲኮ ካኦቱማ ዓይጎ ማላኔ ኑ ጋዓንዳይ? ዓይጌንዴ ኮኦኪንሂና ኑ ዒዞ ኮሺ ኬኤዘንዳይ? ጌዒ

4:21 4:21 ማቴ. 5:15፤ ሉቃ. 11:33። 4:22 4:22 ማቴ. 10:26፤ ሉቃ. 12:2።
 4:24 4:24 ማቴ. 7:2፤ ሉቃ. 6:38። 4:25 4:25 ማቴ. 13:12፤ 25:29፤ ሉቃ. 19:26። 4:29 4:29 ዓ.ዪ. 3:13።

ያከፍኑ። 31 ዲዛ ሴናፒጩ ጌዲንታ ዳኮ ዜርጻሎ ማለኔ፤ ዲዛ ዜርቁንታ ዎዶና ሳዓ ዜርቁንታ ዜርጋይዳፓ ቢያ ኮሺ ዳካኬ። 32 ዜርቁንቲ ባቃሌሢኮ ጊንፃ ጋዓንቴ ዑጊያና ቱኮ ባኮ ቢያይዳፓ ባሻኔ። ጫሪንጮ ካፓ ዳዓንዳያ ሄላንዳኣና ዴኤፒ ካኣፒ ጌታኔ።»

33 ዬሱሴ ዴራ ጳቂሢ ዳንዳዓያ ዬንሢና ዬንሢ ማላ ሚርጌ ኮኦኪንሢና ያኦሲኮ ቃኣሎ ኬኤዜኔ። 34 ዲዚ ዔያቶም ኮኦኪንሢሢላያ ኬኤዙዋሴ፤ ጋዓንቴ ዲዚ ፔኤኮ ጊንፃ ሃንታዘንሢና ሌሊ ዓኣ ዎዶና ቢያ ባኣዚ ዔያቶም ኮሺ ፔጋሲ ኬኤዛኔ።

ዬሱሴ ባዘ ጉዳሢ ዚቲዳሢ
(ማቴ. 8:23-27፤ ሉቃ. 8:22-25)

35 ዬዮ ዓቦ ዋንቶ ዬሱሴ ፔኤኮ ጊንፃ ሃንታዘንሢ፡- «ኦኤኒ ባዘኮ ለንጌሮ ሱኮ ፒንቆም» ጌዔኔ። 36 ዔያታ ዴሮይዳፓ ዴማዲ ዴዒ ዓኣ፣ ዋኣያና ፒንቆ ጎንጎና ዬሱሴ ዔኪ ዴንዳኣና ሜሌ ዋኣያና ፒንቆ ጎንጊያ ዓኣኔ። 37 ማዓዛ ደዲ ዓልጋ ዋኣያይዳ ዔቁ ዋኣፃ ጎንጋ ኩማንዳያ ሄላንዳኣና ጉዳሢ ዋኣፃ ሂዓኔ። 38 ዬማና ዬሱሴ ዋኣያና ፒንቆ ጎንጎኮ ጊንፃ ዛላ ኬሬ ጌሢ ላሂ ዓኣንቴ ዲዘኮ ጊንፃ ሃንታዘንሢ ዲዛ ጴቻዮ፡- «ኦና ዔርዛሢዮ! ኦኤኒ ኩዳንቴም ኔኤኒ ዚቲዮ ጋዓ?» ጌዔኔ።

39 ዲዚ ጴጫዮ ዠባሮ ጎሬኔ፤ ባዘዋ፡- «ዓጊዲፕ! ዚቲ ጌዔ!» ጌኤኔ፤ ዠባራኣ ዓጊሦ ሃሻዛ ቢያ ባካ ዚቲዮ ጌዔኔ። 40 ዬያሮ ዬሱሴ ዲዘኮ ጊንፃ ሃንታዘንሢም ጋዓዮ፡- «ዓይጎሮ ዲንሢ ሂዲ ዓጊጫይ? ጉሙርቂሢ ዎይቲ ዲንሢኮ ባይቂይ?» ጌዔኔ።

41 ዔያታ ኮሺ ዓጊጫ፡- «ዓህ! ሃይ ጉዳሢንታ ባዘንታ ዓይሢንታሢ ያናዳይ?» ዋሊ ኮራ ጌዔኔ።

5

ዬሱሴ ፑርታ ዓያናና ዓርቁንቴ ዓሲሰኬያ ፓሢሢ
(ማቴ. 8:28-34፤ ሉቃ. 8:26-39)

1 ዬሱሴና ዲዘኮ ጊንፃ ሃንታዘንሢና ዋኣያና ፒንቆ ጎንጎ ቶጊ ጌሊላ ባዘ ፒንቆዮ ጌርሴኖኔ ዓጮ ሄሊኔ። 2 ዲማና ዬሱሴ ዋኣያና ፒንቆ ጎንጎይዳፓ ኬኬዳኣና ፑርታ ዓያናና ዓርቁንቴ ዓሲ ዴኡፒ ካይዚፓ ኬሰኪ ካኣጫኔ። 3 ዬያ ዓሢኮ ናንጋ ዴኡፒ ቤሲዳኬ፤ ያኦኒያ ዲዛ ካኒቢራቴና ቱኪ ቃዛኒ ዳንዳዑዋሴ፤ 4 ዲዘኮ ቶኮና ኩጮና ሚርጌ ኬሊ ዓንጊ ዴጻና ካኒ ቢራታና ቱኡታኔ፤ ጋዓንቴ ዲ ቢያ ዎዶና ካኖቢራቶዋ ዴኡዚ ዴኡዚ ቶኮ ዓንጎዋ ሚንሢ ሚንሢ ኬኤራኔ፤ ዬያሮ ዲዛ ዓርቁ ቃዛኒ ዳንዳዓ ዓይጎ ዓሲያ ባኣሴ። 5 ቢያ

ከሌ ዓመና ርኦሮና ዱኡፖ ባኣኮይዳ፣ ዲኮ ዑጾይዳ ዒላቲ ዒላቲ ሃንታጾ፣ ዑጾጾ ፔኤኮ ቲሊንገና ቲቂ ቲቂ ኪጻጻ።

6 ዒዚ ዩሱሴ ዳካ ሃኬ ዓኣንቲ ዳንቃጾ ባንሢ ጳሽኪ ሙኪ ጉምዓቲ ዚጌኑ። 7 ዩካፓ ፑኡፒ ዑኡሲና፡- «ኔኤኒ፣ ፑኡፒ ጾኦሲ ናዓሢዮ ዩሱሴ! ኔኤና ታኣና ዓይጎ ፔቱሞ ዓኣይ? ጾኦሲ ሱንጾና ታ ኔና ሺኢቃኔ ሃዳራ ታና ሜታሲፖ» ጌዒ ዒላቲኔ። 8 ዩያ ዒዚ ጌዒሢ፡- «ሃይ ኔ ፑርቶ ዓያናሢ፣ ሃያ ዓሢ ሃሺ ከሰከ!» ጌዒ ዩሱሴ ዓይሢሢሮከ።

9 ዩሱሴ ዒዛ፡- «ሱንጻ ኔኤኮ ጾናዳይ?» ጌዒ ጾኦጌኔ፤ ዒዚያ፡- «ኦኡኒ ሚርጌታሢሮ ሱንጻ ታኣኮ ዳሬከ» ጌዒ ማሃኔ።

10 ፑርቶ ዓያናና ዓኣ ዓሢ ዩኖ ዓጫፓ ዩሱሴ ዔያቶ ዳውሱዋጉዲ ዶዲሺ ሺኢቁኔ።

11 ዩኖ ቤዘይዳ ሚርጌ ዓሲኮ ቆሎ ጉዲንሢ ወዴ ጌሚር ጎኦባ ሄንቃኔ፤ 12 ዩያር ፑርቶ ዓያና ዩሱሴ ኮራ፡- «ሃዳራ ኦና ሃሴኬ ጉዲንጾ ባንሢ ዳከ፤ ኦኡኒ ዔያቶይዳ ዓኣዲ ጌሎም» ጌዒ ሺኢቁኔ።

13 ዒዚ ዔያታ ጌላንዳጉዲ ዓይሢዛ፣ ፑርቶ ዓያና ዓሢዳፓ ከሰከ ጉዲንጾይዳ ጌሌኔ፤ ጉቤ ወዳ ሴካ ለምጾ ሺያ ማግ ጉዲንሢ ማጎ ዋኣጾ ባንሢ ዲርጊ ባዘይዳ ጌሊ ዔኤዲንቲ ሃይቁኔ።

14 ጉዲንጾ ሄንቃዘንሢ ጳሽኪ ዳንዲ ካታሞና ኮይሎ ጉርዶ ቢያይዳ ሃይሶ ሚርጌና ዳልጊሼኔ፤ ዓሳ ማዔ ባኮ ዛጋኒ ፔኤኮ ማኣራፓ ማኣራፓ ከሰከኔ፤ 15 ዔያታ ዩሱሴ ባንሢ ሙካጾ ዩይ ቤርታ ሚርጌ ፑርቶ ዓያናና ዓርቁንቲ ዓሢ ዣኣዣሢዳፓ ዳቁ፣ ዓፒሎ ፔኤኮ ማይንቲ፣ ዳዒ ዓኣንቲ ዔያታ ዛጊ ዲቃቲ ዒጊጫኔ። 16 ዩያ ቤርታዲ ዛጌ ዓሳ ፑርቶ ዓያና ዓርቁ ዓሢና ጉዲንጾይዳ ማዲንቲ ባኮ ቢያ ዔያቶም ከኤከኔ።

17 ዩያር ዩኖ ዓጮ ዓሳ ዩሱሴ ዔያቶኮ ዓጫፓ ከሰከ ዓኣዳንዳጉዲ ዒዛ ሺኢቁኔ።

18 ዩሱሴ ዋኣጾና ፒንቆ ጎንጎ ጌላኣና ፑርቶ ዓያና ዓርቁንቲ ፖዔ ዓሢ፡- «ሃዳራ ታ ኔኤና ዋላ ዓኣደም» ጌዒ ሺኢቁኔ።

19 ዩሱሴ ጋባንቲ ዒዛ ላኣጌኔ፤ ዩሱሴ ዒማና ዒዛም፡- «ኔ ማኣሪ ዓኣዲጋፓ ጎዳ ኔኤም ዎዚጉዳ ፑኡፒ ባኣዚ ማዴቶዎ ሃሣ ዎዲ ኔና ማኣራቶዎ ኔ ማኣሮ ዓሶም ከኤከ» ጌዒኔ።

20 ዓሢ ዩሱሴ ዒዛም ማዴ ባኮ «ታጾ ካታሞንሢ» ጌይንታ ዓጫ ከኤዛዛ፣ ዎይዜ ዓሳ ቢያ ዲቃቲ ሄርሼኔ።

ዒያዒሮሴኮ ናይሰከኖንታ ዩሱሴኮ ዓፒሎ ካኣሜ ላኣሊሰከኖ ዛላ

(ማቲ. 9:18-26፤ ሉቃ. 8:40-56)

21 ዩሱሴ ዋኣዖና ፒንቆ ጎንጎና ባዞ ሱኮ ገንሣ ማዒ ፒንቃዛ ማርጌ ዴሬ ዒዛ ኮራ ቡኩኔ፤ ዒማና ዒዚ ባዞ ዓጫኬ። 22 ዒኢካ ዒያዒርሴ ጌይንታ፣ ዓይሁዶ ዓሶኮ ቡኩንቶ ቤዞ ሱኡጎይዳፓ ፔቴሰኬይ ሙኪ ዩሱሴ ዴንቃዖ ዒዛኮ ቶኮ ዴማ ሎኦሚ፡- 23 «ታኣኮ ዳካ ዉዲር ናይሰኬማ ሃርጊንቲ ባኣሴ ሃይቃኒ ዑኩኔ! ዩያር ሙኪ ዒዛ ዳቃንዳጉዲ ሃሣ ሸምፔና ዒዛ ናንጋንዳጉዲ ሃዳራ ኔኤኮ ኩጮ ዒዛ ዑፃ ጌሣቴራ» ጌዒ ዶዲሺ ሺኢቄ።

24 ዩያር ዩሱሴ ዒዛና ዎላ ዓኣዳኒ ዔቄ፤ ዒማና ማርጌ ዓሲ ዩሱሴና ዎላ ጎይዖ ዒዛ ቱቺ ዴንዳ።

25 ዒኢካ ታጳ ላምዖ ሌዔ ጉቤ ሱጉሣ ሸኣቲ ማርጌ ማታሳ ላኣሊሰኬና ዓኣኔ። 26 ዒዛ ማርጌ ዴኤሻ ዔራ ዓሶ ኮራ ዓኣዴቶዎ ፔኤኮ ማኢሾ ቢያ ጉሪ ጋፒሴኔ፤ ጋዓንቴ ዳቆንዶ ዎዳ ሴካ ባሻንዳኣፓዓቲም ፖዒባኣሴ። 27 ዒዛ ዩሱሴ ዛሎ ዎይዜያታሣር ዴርኮ ባኣኪና ዒዛኮ ገንዖ ዛሎና ሙኪ ዓፒሎ ካኣሜ። 28 ዩያ ዒዛ ማዴሣ፡- «ታ ዒዛኮ ዓፒሎታዖ ካኣሜቶ ዳቃንዳ።» ጌዒከ።

29 ዩማ ዒዛ ዓፒሎ ሄሄላዛ ዒዛኮ ሸኣታ ሱጉፃ ዔቄ፤ ሃርጋሰካፓ ዳቄሣ ዒዛም ዑፃይዳ ዔርቴ። 30 ቤዞማና ዩሱሴይዳፓ ዎልቄ ኬሰኬሣ ዒዚ ዔራዖ ዴር ባንሣ ሺሪ፡- «ታኣኮ ዓፒሎ ሄላሣ ዖናዳይ?» ጌዒ ዖኦጮ።

31 ዒዛኮ ገንዖ ሃንታ ናኣታ፡- «ዓሳ ሃያይዲ ቱቺንቲ ዓኣዳሣ ኔ ዛጋያታዖ «ዖኦኒ ታና ካኣሜይ» ኔኤኒ ዎዲ ጋዓይ?» ጌዒ ማሄ።

32 ዩሱሴ ጋዓንቴ ዩኖ ዖኦኒ ማዴቶዎ ዔራኒ ኮር ሺሪ ዛጌ። 33 ዓሴላ ዒዛም ዓይጌ ማዴንቴቶዎ ዔራሣር ዒጊቹምና ጎጋይቄ ጎጋይቄ ዒዛኮ ቶኮ ዴማ ሎኦሚ ጎኑም ቢያ ኬኤዜ። 34 ዩሱሴ ዒዛም፡- «ታ ናዔሌ፣ ኔና ኔኤኮ ጉሙርቄዖ ፓሣ፤ ኮሺና ዓኣዴ፣ ማታፓኣ ዳቄ» ጌዔ።

35 ዩሱሴ ዩኖ ኬኤዛ ጎይሣ ዓኣንቴ ዒያዒርሴ ማኣራፓ ኪኢታ ዓሲ ሙኪ፡- «ናዔላ ኔኤኮ ሃይቄሣር ማይ ኔኤኒ ዔርዛሣ ዓይጎር ላቢሳይ?» ጌዒ ዒዛም ኬኤዜ።

36 ዩሱሴ ጋዓንቴ ዩያ ዔያታ ጋዓሣ ዎይዛዖ ዒዛም፡- «ፔቴታዖ ዒጊጪፖ ጉሙርቄሣ ሌሊ ጉሙርቄ» ጌዔ። 37 ማዓዛ ዩሱሴ ጳዒርሴና ያይቆኦቤና ያይቆኦቤኮ ጌርሲ ዮሃኒሴናይዳፓ ዓታዛ ዖኦኒያ ዒዛና ዓኣዳንዳጉዲ ኮይባኣሴ። 38 ዔያታ ዒያዒርሴ ማኣሪ ሄላዛ ዓሳ ዒኢካ ዲርጌ ዒላቲ ዒላቲ ዩኤካንቴ ዩሱሴ ዛጌ። 39 ዒማና ዒዚ ጋር ጌላዖ፡- «ሃይ ዲርጋሣና ዩኤፖና ዓይጎርዳይ? ናዔላ ገገንዓንዳፓዓቲም ሃሃይቄባኣሴ» ጌዒ ዔያቶም ኬኤዜ።

40 ዓሳ ዒዛኮ ሃይሶ ቦሃዎ ሚኒጩን፤ ዩሱሴ ጋዓንቴ ጉቤሢ ዙሎ ከሲ፡ ናዔሎኮ ዓደና ዒንደና ሃሣ ዒዛኮ ሃይሣ ገንዖ ሃንታ ናኣቶንሢና ዋላ ናዔላ ዓኣ ቤዘ ጌሌኔ። 41 ዒዚ ዒዛኮ ኩጮ ዓርቃዎ፡- «ፃሊታ ኩሚ!» ጌዔኔ። ጌይፃ «ዓንቆ፥ ታኣኒ ኔና ዔቆ! ጋዓኔ» ጌይሢኩ።

42 ዬና ናዔላ ታጰ ላምዎ ለዔ ናይኩ፤ ቤዘማና ዒዛ ዔቃዎ ሴካ ሃንጋ ጌዒ ሃንቴሢ ዓርቄኔ፤ ዬይ ያዲ ማዔ ዋደና ዓሳ ዘጋዎ ሚርጌና ዲቃቲ ሄርሼኔ። 43 ጋዓንቴ ዩሱሴ ዔያቶም ያኦማኣ ከኤዙዋጉዲ ደዲሺ ላታዎ፡- «ዒዘም ሙዎንዶ ባኣዚ ዒንጉዋቴ» ጌዔኔ።

6

ዩሱሴ ናዚሬቴይዳ ዒዒንቴሢ (ማቴ. 13:53-58፤ ሉቃ. 4:16-30)

1 ዩሱሴ ያፓ ቤዘ ሃሺ ፔኤኮ ዓጮ ካታሞ ሙኩኔ፤ ዒዛኮ ገንዖ ሃንታዘንሢ ያዒዛ ገንዖ ሙኩኔ። 2 ዓይሁደኮ ሃውሾ ዓቦና ዔያቶኮ ቡኪንቶ ቤዘ ዒዚ ዔርዚሢ ዓርቄኔ፤ ሚርጌ ዓሲ ዒኢካ ዓኣኔ፤ ዒዚ ከኤዛሢ ዔያታ ዋይዘዎ፡- «ዓንካፓ ዒዚ ሃያ ቢያ ዴንቄይ? ዋዚጉዴ ዔራቶዳይ ዒዘም ዒንገንቴሢ? ሃያ ዲቃሣ ዓኮ ባኮ ዋዲ ዒዚ ማዳይ?» ጌዒ ጌዒ ዒዛ ሄርሼኔ። 3 ገንሣ ሃሣ ዔያታ ጋዓዎ፡- «ማዔቶዋ ሃይ ሚዎ ዓርሳ ሃኣማሢቱዓዳ? ዒንዴላ ዒዛኮ ማይራሞ ሃሣ ጌርሲንሢ ዒዛኮ ያይቆኦ፤ ዮሳ፥ ዩሁዳ፥ ሲሞኦኔንታ ጌርንሢ ዒዛኮ ሃይካ ኑኡና ዓኣዘንሢቱዓዳ?» ጌዒ ዒዚ ከኤዛ ባኮ ዔኩሞዎ ሃሼኔ።

4 ዩሱሴ ዔያቶም ከኤዛዎ፡- «ዎኦሲ ማሊሢ ከኤዛይ ሜሌ ዓሲ ኮራ ቦቦንቲንታኔ፤ ፔኤኮ ዓጮይዳ፥ ፔኤኮ ዒጊኖ ባኣኮና ፔኤኮ ማኣሮ ዓሶና ባኣካ ቦቦሂንታኔ» ጌዒ ማሄኔ።

5 ዒዚ ዒኢካ ዳካ ሃርገንቴ ዓሲኮ ሌሊ ዑፃ ኩጮ ጌሢ ፓሢያፓዓቲም ሜሌ ዓኪ ዲቃሣ ባኣዚ ማዳኒ ዳንዳዒባኣሴ። 6 ዓሶኮ ጉሙርቂሢ ባኣሢሮ ዒዚ ዲቃቴኔ፤ ዬካፓ ዩሱሴ ጉርዶ ባኣኮ ሃንቴ ሃንቴ ዔርዚኔ።

ዩሱሴ ታጰ ላምዎ ዳኪንቴዘንሢ ኮዮ ሃይሶ ከኤዘም ዳኬሢ (ማቴ. 10:5-15፤ ሉቃ. 9:1-6)

7 ዒዚ ታጰ ላምዎ ዒዛኮ ገንዖ ሃንታ ናኣቶ ፔ ባንሢ ዔኤሊ ላምዎ ላምዎ ማሂ ዔያቶ ዳኬኔ፤ ዒዚ ዔያቶም ፑርቶ ዓያና ዑዎይዳ ዋልቄና ዓኣ ቢታንቶ ዒንጌኔ። 8 ዩሱሴ ዔያቶም ከኢታዎ፡- «ዒንሢ ሳይዎኮ

ኮኦሎፓ ዓታዛ ጋላ፡ ጋላ ዓርቆ ሉካ፡ ሚኒሸታቶዋ ቡራሻይዳ ዓጊ ዔኪፖቴ» ጌራ ዓይሣይ። 9 ዒ ኬኤዛዎ፡- «ቶካ ዒንሣኮ ዲርሲ ዓአሣንዳፓዓቲም ቃሲ ላምዎ ማአዎ ማአዒፖቴ፤ 10 ዓንካአ ማዎም ዒንሣ ዓሲ ማአሪ ጌሌቶ ዒኢካፓ ኬሰካንዳያ ሄላንዳአና ዒማካ ዴዑዋቴ፤ 11 ዋካ ማዔቶዋ ዓሳ ዒንሣሲ ዔኩዋያና ዋይዙዋ ቤዛ ቢያ ዒንሣኮ ቶኮ ሲላሎ ፕዒፓፓ ኬሰኪ ዓአዲዋቴ። ዬይ፡- ዔያቶም «ዒንሣና ዔራዋቴ» ጋዓ ማርካ ማዓንዳኔ» ጌዔ።

12 ዬያሮ ዔያታ ኬሰኪ ዓሳ ፔኤኮ ጎሞ ቡኡፃንዳጉዲ ኬኤዜኔ። 13 ዔያታ ሚርጌ ፑርታ ዓያናኣ ኬሴኔ፤ ሃሣ ሚርጌ ሃርጊንቴ ዓሲ ዛይቴ ቲሺና ቲሽኪ ዓውሴኔ።

ማሰካ ዮሃንሴኮ ሃይሶ
(ማቴ. 14:1-12፤ ሉቃ. 9:7-9)

14 ዬሱሴኮ ማዳ ቢያ ቤዘይዳ ዋይዚንቴሣር ካኣቲ ሄርዲሴያ ዒዛ ዛሎ ዋይዜኔ። ፔቴ ፔቴ ዓሳ፡- «ማሰካ ዮሃንሴ ሃይባፓ ዔቄኔ፤ ዬያሮ ሃይ ጉቤ ዋይዚንታ ባካ ዒዛና ማዲንታያኬ» ጋዓ።

15 ዓሳ ዛላ፡- «ዒዚ ዔኤሊያሴኬ» ጋዓ፤ ዛላ ሃሣ፡- «ሚናኣ ያኦሲ ማሊያ ኬኤዛዘንሣዲፓ ፔቴያኬ» ጋዓ።

16 ዬያ ካኣቲ ሄርዲሴ ዋይዛዎ፡- «ዬይ ታኣኒ ቶኦኮ ቲቂሴ ማሰካ ዮሃንሴታዎ ሃይባፓ ዔቄያዋይ ማሌቱዋዋይ!» ጌዔ። 17 ሄርዲሴ ፔኤኮ ጌርሲ ፒልጶሴ ማቾ ሄርዲያዳ ዔኬም፣ 18 ዬያ ዛሎና ማሰካ ዮሃንሴ፡- «ጌርሲ ማቾ ዔኮና ኔኤኒ ዳቤኔ» ጌራ ጎሬሣር ካኣቲ ዒዛ ዓይሣ ቱኡሴኔ።

19 ዬያሮ ሄርዲያዳ ዮሃንሴ ኮሚ ዋዲሳኒ ኮዔቶዋ ዒዛ ዳንዳዒባኣሴ። 20 ዓይጎር ጌዔቶ ካኣቲ ሄርዲሴ ማሰካ ዮሃንሴ ጌኤሺ ሃሣ ዓሎ ዓሲ ማዔሣ ዔሪ ዓጊጪ ካፓሣርኬ። ማሰካ ዮሃንሴ ኬኤዛ ዋይና ካኣቲ ዲቃታቶዋ ዋዛና ዒዛሲ ዋይዛኔ።

21 ማዓዛ ካኣቲ ሄርዲሴ ፔኤኮ ሸይንቴ ኬሎ ቦንቻያ ማዔሣር ዓጮ ዋይሣ ዓሶና ፖኦሊሶኮ ሱኡጎና ፔቴ ፔቴ ጌላላ ዓጮይዳ ዓርቲ ዓሶናም ዴኤፒ ሙኡዚ ጊኢሺኔ፤ ዬና ሄርዲያዳም ዒዛ ማሊያና ካኣማያ ማዔኔ። 22 ዒማና ሄርዲያዳኮ ናኣ ሙዎ ቤዛ ጌሊ ኮያና ካኣቲንታ ዒዛና ዋላ ዓኣ ዓሶዋ ዋዛሴሣር ካኣቲ ናዔሎም፡- «ኔኤኒ ኮዓ ባካ ዓይጌንዴ ማዔታቶዋ ያኦጩ፣ ታኣኒ ዒንጋንዳኔ፤ 23 ታኦኮ ካኣቱዋኮ ዛሎ ማዔቶዋ ኔኤኒ ያኦጩ ባኣዚ ቢያ ዒንጋንዳኔ» ጌራ ጫኣቄኔ።

6:8 6:8 ሉቃ. 10:4-11። **6:11** 6:11 ዳኪ. ማዶ 13:51። **6:13** 6:13 ያይ. 5:14። **6:15** 6:15 ማቴ. 16:14፤ ማር. 8:28፤ ሉቃ. 9:19። **6:18** 6:18 ሉቃ. 3:9-20።

24 ዲዛ ዲንዶ ኮይላ ኬሰኪ ዓኣዲ፡- «ዓይኅ ታ ዲዛ ያኦጩቶ ቀራዳይ?» ጌዒ ያኦጩኑ። ዲንዳ፡- «ማሰካ ዮሃንሴኮ ቶኦኮ ታኣም ዲንገ ጌዒ ያኦጩ» ጌዒ ማሄኑ።

25 ናዔላ ዑኩና ሩኡሪ ካኣቲ ባንሢ ማዒ ሙካዖ፡- «ማሰካ ዮሃንሴኮ ቶኦኮ ሃሢ ሃይማካ ጎንጊዳ ታኣም ኔ ዲንጋንዳጉዲ ታ ኮዓኔ» ጌዒ ያኦጩኑ።

26 ሂዚ ጌዒ ዲዛ ያኦጩሢር ካኣቲ ኮሺ ያዬኔ፤ ጋዓንቴ ዲዛ ያኦጩ ባኣዚ ኩንሢሂ ዲዛኮ ሾኦጩ ጉቤሢኮ ቤርታ ዲዚ ጫኣቋሢር ዲዚ ላኣጋኒ ዳንዳዒባኣሴ። 27 ዬያሮ ካኣቲ ዑኩና ፖኦሊሶይዳፓ ፔቴሰኬያ ማሰካ ዮሃንሴኮ ቶኦኮ ቲቂ ዔኪ ዬዓንዳጉዲ ዳኬኔ፤ ፖኦሊሳሢ ቴኡዞ ማእሪ ዴንዲ ማሰካ ዮሃንሴኮ ቶኦኮ ቲቂ። 28 ቲቂንቴ ቶኦኮ ጎንጊዳ ዓገሊ ዔኪ ናዔሎም ዲንገኔ፤ ናዔላ ዔኪ ዲንዴሎም ዲንገኔ። 29 ማሰካ ዮሃንሴኮ ገንዖ ሃንታዞንሢ ዬያ ዋይዜ ዋዶና ሙካዖ ሌዞ ዲዛኮ ዔኪ ዳኡኬኔ።

ዬሱሴ ደንጎ ሺያ ዓሲ ሙኡዜሢሢ

(ማቲ. 14:13-21፤ ሉቃ. 9:10-17፤ ዮሃ. 6:1-14)

30 ዳኪንቴዞንሢ ዳኪንቴ ቤዘይዳፓ ማዒ ዬሱሴ ኮራ ቡኬኔ፤ ዔያታ ማዴ ባኮና ዔርዘሢሢ ቢያ ዲዛም ኬኤዜኔ። 31 ዲዚ ዔያቶም፡- «ዲንሢር ሌሊ ታኣና ዎላ ዓሲባኣ ቤሲ ሙኩ ዳካ ሃውሹዎቴ» ጌዔኔ። ዬያ ዒ ጌዔሢ ዔያቶ ኮይላ ሙካ ዓሶና ዓኣዳ ዓሶና ሚርጋዞ፤ ሙዒኒያ ዔያቶም ማጌሢርኩ። 32 ዬያሮ ዓሳባኣ ቤዘይዳ ዔያታ ሌሊ ማዓኒ ዎኣዖና ፒንቆ ጎንጎ ቶጊ ዓኣዴኔ።

33 ማዔቶዎ ዔያታ ዓኣዳኣና ሚርጌ ዓሲ ዔያቶ ዛጊ ዔሪ ፔኤኮ ካታማፓ ኬሰኪ ቶኪና ጳሽኪ ጳሽኪ ዔያቶ ቢራዖ ዔያቶ ኮራ ቡኬኔ። 34 ዬሱሴ ዎኣዖና ፒንቆ ጎንጎይዳፓ ኬዳኣና ሚርጌ ቡኬ ዴር ዛጋዖ ዔያታ ሄንቃ ዓሲባኣ ማራይጉዴያ ማዔሢር ዲዛኮ ዲና ዔያቶ ሚጩንቴኔ፤ ዬያሮ ዲዚ ሚርጌ ባኣዚ ዔርዘሢሢ ዓርቄኔ።

35 ሳዓ ዲባና ጋዓኣና ዲዛኮ ገንዖ ሃንታ ናኣታ ዲዛ ባንሢ ሙኪ፡- «ሳዓ ዓማኔ፤ ቤዛ ሃይ ዔኤቢባኣ ዓሲ ናንጉዎ ዳውሎኬ፤ 36 ሙዖ ባኣዚ ዓሶኮ ባኣሢር ሃይካ ጉርዶይዳፓ ዴንዲ ፔኤኮ ሙዖ ባኣዚ ሻንቃንዳጉዲ ዓሶ ዳኬ» ጌዔኔ።

37 ዬሱሴ ጋዓንቴ፡- «ዔያታ ሙዓንዳ ባኣዚ ዲንሢ ዔያቶም ዲንጉዎቴ» ጌዒ ማሄኑ። ዔያታ፡- «ሂዴቶ ዓሳ ሙዓንዳ ካሢ ፔቴ ዓሲ ላምዖ ጻኤታ ኬሊ ማዴም ዲንገንታንዳ ሚኢሺና ሻንቂ ኑ ዲንጎንደም?» ጌዒ ያኦጩኑ።

6:34 6:34 ፓይ. ማፃ 27:17፤ 1ካኣቶ. ማ 22:17፤ 2ዖኦሲ. ዓሃኬ 18:16፤ ሂዚ. 34:5፤ ማቲ. 9:36።

38 ይደር ዩሱሴ ዔያቶ ያእጫዎ፡- «ዓላፒኒ ካሣ ዓላቴ ሂንዳ ዴንዲ ዛጉዋቴ» ጌዔኔ። ዔያታ ዛጋዎ፡- «ደንጎ ካሣና ለምዎ ሞሎሰከንሢና ዓላኔ» ጌይ ከኤዜኔ።

39 ዩሱሴ ፔ ጊንዖ ሃንታዞንሢም ዓሶ ፓቂ ፓቂ ቡጩይዳ ዴይሠዋቴ ጌዒ ዓይሢኔ። 40 ይደር ዓሳ ዋሊ ጊንዖ ዛላ ጭታ ዛላ ደንጊታሚ ማዒ ፓቂንቲ ፓቂንቲ ዴዔኔ። 41 ዩካፓ ዩሱሴ ደንጎ ካዖንሢና ለምዎ ሞሎንሢና ዔኪ ጫሪንጮ ባንሢ ዛጊ ያኦሲ ጋላታዎ ቡንዲ ዒዛኮ ጊንዖ ሃንታ ናኦታ ዓሶም ጊሸካንዳጉዲ ዒንጌኔ፤ ሃሣ ለምዎ ሞሎንሢና ቢያሢም ጊሸከኔ። 42 ቢያሢ ሙዒ ሚሸከኔ። 43 ዓሳ ሙዒ ሚሸካዛ ዓቴ ካሣና ሞላሢናኮ ደንቦ ዒዛኮ ጊንዖ ሃንታ ናኦታ ታጻ ለምዎ ዳልጊ ሌማቴ ኩሙሢ ዔከኔ። 44 ካሣ ሙዒ ዓሶይዳፓ ዓቲንቆ ፓይዳ ሌሊ ደንጎ ሺያ ሄላያከ።

ዩሱሴኮ ዋኦዎ ዑፃ ሃንቲዎ
(ማቴ. 14:22-33፤ ዮሃ. 6:15-21)

45 ዩሱሴ ዓሶ ዳካኦና ዒዛኮ ጊንዖ ሃንታዞንሢ ዑከና ዋኦዎና ፒንቆ ጎንጎና ሱኮ ቤቴሳይዳ ጌይንታ ቤዞ ቢሪ ዒዛ ፒንቃንዳጉዲ ዒ ዓይሢኔ። 46 ዒዚ ዓሶ ኮሺ ዓኦዲዋቴ ጌዔሢኮ ጊንዖፓ ሸኢቃኒ ጌማሪ ከሰከኔ። 47 ሳዓ ዓማኦና ዋኦዎና ፒንቆ ጎንጋ ዋኦዎ ሳዛ ዓኦንቲ ዩሱሴ ፔኤር ሌሊ ሳይዳ ዓኦኔ። 48 ዒዛኮ ጊንዖ ሃንታዞንሢ ዔያቶኮ ቤርታ ዠባርሻ ዠባርይዳፓ ዔቆያና ዋኦዎና ፒንቆ ጎንጎ ዒሸ ባሸንቲ ሚርጌ ማታዳንቲ ዒዚ ዛጌኔ፤ ዩይ ያዲ ማዔሢ፡- ዲሞኮ ሴካ ባራሪ ኮይዳ ቂኢቃኦና ጉዴያናከ፤ ዩሱሴ ባዞ ዑፃ ቶኪና ሃንቲ ሙካዎ ኮርሳ ዔያቶኮ ቢሪ ዓኦዲኒ ዑከኔ። 49 ጋዓንቲ ዔያታ ዒዚ ዋኦዎ ዑፃ ሃንታንቲ ዛጋዎ ዓልጎ ዔኤከፔ ዔያቶም ማላዛ ዒጊጪ ዒላቴኔ። 50 ቢያሢ ዒዛ ዛጋዎ ዲቃቴኔ።

ዒዚ ጋዓንቲ ቤዞማና፡- «ሃይ ዒንሢ ሞይታይ፤ ታናከ ዒጊጪፖቴ» ጌዒ ዔያቶ ደዲሸኔ። 51 ዩካፓ ዒዚ ዔያቶ ኮራ ዋኦዎና ፒንቆ ጎንጎ ጋር ጌላዛ ዠባራ ዠባርሺዎ ሃሸኔ። ዒዛኮ ጊንዖ ሃንታ ናኦታ ጉቤ ሃያጉዴ ባኦዚ ጌዒ ኮሺ ዲቃቴ ሄርሸኔ። 52 ዓይጎር ጌዔቶ ዒና ዔያቶኮ ደንጎ ካሣና ማዲንቲ ባኮ ጳቂሠዋዎ ማዒ ደጩሢኦ።

ዩሱሴ ጌንሴሬጃ ጎዎ ቤዛ ሃርጊንቲ ዓሶ ዓውሴሢ
(ማቴ. 14:34-36)

53 ዔያታ ባዞና ፒንቂ ጌንሴሬጃ ካታሞ ሄሌኔ፤ ዋኦዎና ፒንቆ ጎንጎ ዔያታ ባዞ ዓጫ ዓኦ ሳዩ ባንሢ ደጪሲ ቱከኔ። 54 ዔያታ ዋኦዎና ፒንቆ ጎንጎይዳፓ ከከዳኦና ዓሳ ዩሱሴ ቤዞና ዔሬኔ። 55 ይደር

ዩሱሴ ዓኣጳፊ ቤዘይዳ ቢያ ዒዚ ዓኣ ቤዘ ዋይዜ ዓሳ ጉርዶ ባኣኮ ጳሽኪ ሃርጊንቴ ዓሶ ሃሎና ኬዲ ኬዲ ዒዛ ባንሢ ዔኪ ሙከሢ ሳርቄ።⁵⁶ ዩሱሴ ዓኣጳፊ ቤዘይዳ ቢያ፡- ጉርዶ ባኣኣ፡ ካታሞይዳ፡ ካታሞ ዙላ ሃርጊንቴ ዓሶ ዒዛ ቤርቶ ዓሳ ቡኪንታ ቤዘ ዔኪ ዔኪ ሙከኔ፤ ዒዛኮ ዓፒሎ ዓጮ ሳርቄኒያ ዔያታ ሸኢቃ። ዓፒሎኮ ዓጮ ሳርቄሢያ ቢያ ዳቃ።

7

ዓሳ ኬሴ ዋጎ ዩሱሴ ማኬሢ (ማቴ. 15:1-9)

1 ፔርሴ ዓሶና ዩሩሳላሜፓ ሙኬ ፔቴ ፔቴ ሙሴ ዔርዜ ዋጎ ዔርዛ ዓሶና ዩሱሴ ኮራ ቡኬ።² ዩሱሴኮ ጊንፆ ሃንታዘንሢዳፓ ፔቴ ፔቴዘንሢ ሙሴ ዋጋ ዓይሢ ጎይፆ ጌኤሸኪባኣ ኩቲና ሙዓንቴ ዔያታ ዛጌ።

3 ፔርሴ ዓሶንታ ሃሃ ዓቴ ዓይሁዶ ዓሳ ጨማ ዔያቶኮ ኬሴ ዋጎ ካፒያና ኩጮ ፔኤኮ ኮሺ ማሰቲባኣፆ ሙኡዚ ሙዑዋሴ።⁴ ዩያጉዲ ቦኦካፓ ማዓፆ ማሰቲዋፆ ሙዑዋሴ፤ ሃሃ ዑሺ ዑሸኮ ማሄ፡ ፆቲ፡ ጎንጊ፡ ሻኣላ፤ ዩያ ቢያ ማሰኮ ባኣዚና ዩያ ማላ ማሌ ማርጌ ዋጌ ዔያታ ካፓ።

5 ዩያር ፔርሴ ዓሶና ሙሴ ዔርዜ ዋጎ ዔርዛ ዓሶና፡- «ኔኤኮ ጊንፆ ሃንታዘንሢ ዓይጎር ጨማ ኬሴ ዋጎኮ ዑሣ ዓኣጳይ? ዓይጎር ዔያታ ኩጮ ማሰቲዋፆ ሙዓይ?» ሂዚ ጌዒ ዩሱሴ ፆኦጮ።

6 ዒዚ ዔያቶም ማሃ፡- «ዒንሢ ዓሲ ዓኣፒሞ ሄርሺንቲሮ ማዳ ዓሳ! ዒሲያሴ ጎፆ ፆኦሲ ማሊፆ ኬኤዛሢ ዒንሢ ዛሎ ኬኤዛ፡- ሃይ ዳራ ዳንጎና ታና ቦንቻኔ

ዒና ዔያቶኮ ታጊዳፓ ማርጌ ሃኬያኬ፤

7 ዔያታ ዓሲ ዋጌ ዔርዚ ዔርዚ

ታና ጉሪ ሉኡዙሞና ካኣሸካፆ ማላኔ ጌዒ ኬኤዜሢ ጎኔኬ።

8 «ዩያር ዒንሢ ፆኦሲ ዓይሢፆ ሃሺ ዓሲ ዋጌ ካፓ።»

9 ላሚ ዩሱሴ ዔያቶም ሂዚ ጌዔ፡- «ዒንሢኮ ዋጎ ዒንሢ ካፓኒ ጌዒ ፆኦሲ ዓይሢፆ ዒንሢ ማርጌና ቦሂ ሃሻ፤¹⁰ ሙሴ ሳዶና ዒንዶና ቦንቻ፤ ዓዶና ዒንዶና ጮሸኬሢ ዋፆጎቶንጎ» ጋዓ።

11 ጋዓንቴ ፔቴ ዓሲ ዓዶና ዒንዶና ማኣዶንዶሢ ሃሺ ዒንሢሞ፡- ሳዶና ዒንዶና ማዶንዶ ባኮ ዛሎ ቢያ ፆኦሲም ታ ዒንጎ ባኣዚ

7:7 7:7 ዒሲ. 29:13። 7:10 7:10 ኬሲ. ማፆ 2:12፤ 21:17፤ ለዊ. ዓኬ 20:9፤ ላሚ. ዋማ 5:16።

ዲንጌ፤ ጋዓዛ፤ 12 ዬይ ዓሢ ዓዶና ዲንዶና ማእዲዎጉዲ ዲንሢ ዓይሣ፤ 13 ሂዲያና ዲንሢ ዲንሢኮ ዔርዚያ ካፓኒ ጌዒ ያኦሲኮ ቃኦሎ ሃሻ፤ ሃሣ ዬያጉዴ ባኦዚ ሚርጌ ዲንሢ ማዳ፤»

ዓሲ ኪንሢና ዓኦያ ማሃ ባኦዚ
(ማቴ. 15:10-20)

14 ዬሱሴ ዴር ፔ ባንሢ ለሚ ዔኤሊ ሂዚ ጌዔ፤- «ቢያሢ ዲንሢ ኮሺ ዋይዙዎቴ፤ 15 ዓሲ ኪንሢና ዓኦያ ማሃ ባኦዚ ዓሲዳፓ ኬሰካ ባኦዚ ማዓንዳኦጋዓቴም ዙልካፓ ጌላ ባኦዚ ዓሲ ኪንሢና ዓኦያ ማሁዋሴ። * 16 [ሃያ ዋይዛሢ ኮሺ ዋይዘንጎ!።]

17 ዬካፓ ዬሱሴ ዴር ሃሺ ኬኤያ ጌላዛ ዒዛኮ ጊንያ ሃንታ ናኦታ ዬኖ ጌይፊሎኮ ቡሊያ ኬኤዛንዳጉዲ ያኦጩ፤። 18 ዲዚያ ዔያቶም ሂዚ ጌዒ ማሄ፤- «ዲንሢያ ሃሣ ዬያ ዔሩዋዓዳ? ዙልካፓ ዓሲኮ ዳንጋና ጎጲ ጌላ ባኦዚ ዓሲ ኪንሢና ዓኦያ ማሁዋኦሢ ዲንሢያም ዔርቱዓዳ? 19 ዓይጎር ጌዔቶ ዳንጎና ጎጲ ጌሌዜላ ዙሎ ጊንሣ ኬሰካኦጋዓቴም ዲና ባንሢ ጌሉዋሴ።» ዬያር ዬሱሴ ሙኡዚ ቢያ ሙዒንታኒ ዳንዳዓያ ማዔሢ ኬኤዜ፤።

20 ዬሱሴ ለሚ ሂዚ ጌዔ፤- «ዓሲ ኪንሢና ዓኦያ ማሃ ባኦዚ ዓሲዳፓ ኬሰካ ባኦዚ፤ 21 ዓሲኮ ጋርሲ ዲናፓ ኬሰካ ፑርታ ባኦዚ፤- ኮይሱዋ ጎይሢና ዙኦሰካ ኮኦሚሢ፤ ዉሱሞ፤ ዓሲ ዎዲሢ፤ 22 ዓኒ ሃሣ ማቾ ማዒባኦያና ላሂሢ፤ ታዳቆ ጌዒሢ፤ ፑርቱሞ፤ ጌሺሢ፤ ዓኒ ሃሣ ማቾ ማዒባኦያና ላሂኒ ዑሢ ዓርቂ ዓማሊሢ፤ ፔ ሺኔና ሃንቲሢ፤ ቁኦሩሞ፤ ፑሽኪሢ፤ ያቶርሞ፤ ማሊሢ ባይሱሞኬ። 23 ዓካሪ ዬይ ፑርቶ ባካ ጉቤ ዓሲ ዒኔፓ ኬሰኪ ዓሲ ጎማሳ፤።»

ፔቴ ላኦሊሰኬናኮ ጉሙርቂያ
(ማቴ. 15:21-28)

24 ዬካፓ ዬሱሴ ዔቂ ፃርሴ ካታሞ ኮይሎይዳ ዓኦ ጉርዳ ዴንዲ ፔቴ ዓሲ ማኦሪ ጌላያ ዲኢካ ዒ ዓኦሢ ያኦኒያ ዔሩዋጉዲ ኮዔ፤፤ ጋዓንቲ ዒ ዓኦሺንታኒ ዳንዳዒባኦሴ። 25 ናይሰኬና ዒዛኮ ፑርታ ዓያናና ዓርቂንቲ ላኦሊሰኬና ዬሱሴ ዲኢካ ዓኦሢ ዋይዚ ዑኬና ሙካያ ቶካ ዒዛኮ ሎኦጫ፤። 26 ላኦሊሰ ሶኦሪያ ዓጪዳ ፖኖቂ ጌይንታ ቤሰካ ሾይንቲ ጌሪኬ ዜርፃፓ ማዔያኬ፤ ዒዛ ዒዛኮ ናዔሎይዳፓ ፑርቶ ዓያኖ ዬሱሴ ኬሰንዳጉዲ ሺኢቄ፤። 27 ዬሱሴ ጋዓንቲ፤- «ናኦቶ ሙያ ዔኪ ካናቶም ዲንጊሢ ኮይሱዋሴ፤ ሂንዳ ቤርታዲ ናኦታ ሙዒ ሚሽኮንጎ» ዒዛም ጌዔ፤።

* 7:15 7:15 ፔቴ ፔቴ ሚናኦ ማፃኦ፤- ፓይዲ 16 ጌዳ ቃሳ፤ ዬና ቃኦሌላ 4:23 ጌዳ ዓኦዞ ማላ፤።

28 ዒዛ፡- «ጎኔኬ ጎዳሂኮ፤ ያዲ ማዕቆቶ ካናታ ጎንጎ ዳማ ናኣቶይዳፓ ዲኢኤህሂ ሙሙ-ዒያቱዒዳ» ጌዒ ዒዛም ማህኔ።

29 ዬያሮ ዬሱሴ፡- «ዬያ ኔ ጌይዖና ፑርቶ ዒያና ኔኤኮ ናዕሎይዳፓ ኬሰኬኔ፤ ማኣሪ ማዒ ዒኣዲ» ዒዛም ጌዒኔ።

30 ዒዛ ማኣሪ ማዒ ሙካንቴ ፑርቶ ዒያና ናዕሎይዳፓ ኬሰኬሂሮ ናዕላ ኮሺ ሻኣሎይዳ ላሂ ዒኣንቴ ዛጌኔ።

ዬሱሴ ዋይዚና ዳንጋና ባይቄ ዓሲሰኬያ ፓህህሂ

31 ዬሱሴ ዓርሴ ዓጫፓ ኬሰካዖ ሲዶና ጌይንታ ዓጮና ታጳ ካታም ጌይንታ ዓጮይዳና ጌዒ ጌለላ ባዘ ሙከኔ። 32 ዒማና ዒኢካ ዒዛ ባንሂ ዋይዚና ዳንጋና ባይቄ ዓሲ ዓሳ ዓኪ ሙካዖ ዬሱሴ ዒዛ ዑዖ ኩጮ ጌህንዳጉዲ ሺኢቄኔ። 33 ዬሱሴ ዓሶ ባኣካፓ ዓሂ ዲማሲ ኬሰዖ ዓሂኮ ዋዮይዳ ኬኤሎ ዳኬኔ፤ ሃህ ጨቕያ ጨቲ ዒዛኮ ዒንዲርዘ ካኣሜኔ። 34 ዬማፓ ዬሱሴ ለካ ጨሪንጮ ባንሂ ዛጌ፤ ሚጨንቴ «ዪይያ!» ጋዓዖ፡- «ዔፓታ» ጌዒኔ። ዬና ጌይዖ «ቡለንቴ» ጌይሂከ።

35 ዬማ ጋዓኣና ዓሂኮ ዋዮና ዒንዲርዘና ቡለንቴም ሜታባኣያ ጌኤሺ ጌሰተሂ ዓርቄኔ። 36 ዬሱሴ ዬያ ዖኣማኣ ኬኤዙዋጉዲ ዓሶ ዓይህኔ፤ ጋዓንቴ ዔያቶም ኬኤዙዋጉዲ ዓይህሂዳፓ ባሼ ዔያታ ኬኤዜኔ። 37 ዬያ ዋይዜህ ቢያ ሚርጌና «ሃያጉዳ ባኣዚ» ጌዒ ዲቃቲ ሄርሺሂና፡- «ጉቤ ባኣዚ ኮሺ ማዳኔ፤ ዋያ ባይቄሂ ዋይዛንዳጉዲ፤ ዳንጋ ባይቄሂያ ጌሰታንዳጉዲ ማህኔ» ጌዒኔ።

8

ዬሱሴ ዖይዶ ሺዮ ዓሶ ሙኡዜሂ (ማቲ. 15:32-39)

1 ዬማና ላሚ ሃህ ሚርጌ ዳሬ ቡከኔ። ዬያ ቡከ ዓሶኮ ሙዖንዶ ባኣዚ ባኣሂሮ ዬሱሴ ዒዛኮ ጊንዖ ሃንታ ናኣቶ ፔ ባንሂ ዔኤለዖ ሂዚ ጌዒኔ፡- 2 «ሃይ ዓሳ ሃኣዛጉዋቲ ሃይሆ ኬሊ ሄላንዳኣና ታኣና ዋላኬ፤ ሃህ ሙዖንዶ ባኣዚ ዔያቶኮ ባኣሂሮ ታና ሚቻኔ፤ 3 ዛላ ዔያቶኮ ሃኬይዳፓ ሙኤያኬ፤ ሃያ ናዮና ታኣኒ ዔያቶ ዳኬቶ ጎይዖ ዔያታ ላባንዳኔ» ጌዒኔ።

4 ዒዛኮ ጊንዖ ሃንታ ናኣታ፡- «ሂዴቶ ሃያ ዳውሎ ቦኣሎይዳ ሃያ ዓሶም ቢያ ጌዳ ሙኡዜ ዳንቃኒ ዳንዳዒ ዖናዳይ?» ጌዒኔ።

5 ዬሱሴ ዔያቶም፡- «ዓኣፒኒ ካህ ዒንሂኮ ዓኣይ?» ጌዒ ዔያቶ ዖኣጮኔ፤ ዔያታ፡- «ላንካይ ካህ ዓኣኔ» ጌዒኔ።

6 ዲዚ ዓሳ ሳዓ ደዓንዳጉዲ ዓይሣየ ለንካዎ ካሦንሢ ዔኪ ያኦሲ ጋላታየ ቡንጂ ደሮሞ ጊሽካንዳጉዲ ዲዛኮ ጊንጾ ሃንታ ናኦቶሞ ዒንጋዛ፣ ናኦታ ዓሶሞ ጊሽኬኔ። 7 ዔያቶኮ ሃሣ ዳካ ሞላ ዓኦንቴ ዩንሢሮዎ ጋላታየ ደሮሞ ዒንጋንዳጉዲ ዓይሣኔ። 8 ዓሳ ቢያ ሙዒ ሚሽካዛ ዓቴ ደንቦ ዔያታ ለንካይ ዳልጊ ሌማቴ ኩንሢ ዔኬኔ። 9 ዩያ ሙዔ ዓሶኮ ገይዳ ያይደ ሺያ ኩማንዳያኬ፤ ዩሱሴ ዔያቶ ዳኬሢኮ ጊንጾ፣ 10 ዲዛኮ ጊንጾ ሃንታ ናኦቶና ሞላ ሞኦያና ፒንቆ ጎንጎ ጋሮ ጌሊ ዳልማኮታ ጌይንታ ዓጮ ዓኦጳ።

ፔርሴ ዓሶኮ ዲቃሣ ዓኪ ባኦዚ ማዲንታንዳጉዲ ያኦጪያ
(ማቴ. 16:1-4)

11 ፔርሴ ዓሳ ዩሱሴ ባንሢ ሙኪ ዲዛና ሞላ ማርሞ ዓርቄኔ፤ ዔያታ ዲዛ ጌኤሲና ፒራኒ ኮዓዎ ያኦሲዳፓ ማዔያ ዓኪ ዲቃሣ ባኦዚ ዳሞንዳጉዲ ዲዛ ያኦጪኦ። 12 ዩሱሴ ዒማና ፔ ዒና ጋርሲሞ ጌሰታዎ፡- «ሃሮ ሞደ ዓሳ ዲቃሣ ዓኪ ባኦዚ ማዲንታንዳጉዲ ዓይጎሮ ኮዓይ? ጎኔ ታ ዒንሢሞ ጋዓኔ፤ ፔቴታዎ ዔያቶሞ ጎኦሞ ዔርዛ ባኦዚ ማዲንታዓኬ» ጌዔኔ።

13 ዲዚ ዔያቶ ሃሻዎ ለሚ ሞኦያና ፒንቆ ጎንጎና ባዘኮ ሶንጌሮ ሱኮ ፒንቄኔ።

ፔርሴ ዓሶና ሄሮዲሴናኮ ሙኦቆ ጻኦዘ ኮኦኪንሦ
(ማቴ. 16:5-12)

14 ዲዛኮ ጊንጾ ሃንታ ናኦታ ጋላ ዔካንዳዎ ሞላዘ ሞኦያና ፒንቆ ጎንጎይዳ ዓኦ ዓሶኮ ፔቴ ካሣይዳፓ ዓታዛ ዓኦ ባኦዚ ባኦሴ። 15 ዩሱሴ፡- «ፔርሴ ዓሶና ሄሮዲሴናኮ ሙኦቆ ጻኦዘይዳፓ ካፒንቁዎቴ» ጌዔኔ።

16 ዔያታ ሞሊ ኮይላ፡- «ዲዚ ዩያ ጌዔሢ ኦኦኮ ጋላ ባኦሢሮ ናንዳኔ» ጌዒ ዘርቲሢ ሳርቄኔ።

17 ዩሱሴ ዩያ ማሊያ ዔያቶኮ ዔራዎ ሂዚ ዔያቶሞ ጌዔኔ፡- «ካሣ ኦኦኮ ባኦሢሮኬ» ጌይ ዒንሢ ዓይጎሮ ማላይ? ሃሞ ሄላንዳኦና ዒንሢ ማሊ ጳቂሡሞ ሃሣ ዒንሢሞ ዔርቁሞዳ? ዒና ዒንሢኮ ዔኩሞያ ማዒ ሃጊ ደጮ ጎይሣዳ? 18 ዓኦፓ ዒንሢኮ ዘጉሞዳዳ? ሞያ ዒንሢኮ ሞይዙሞዳዳ? ሞዲ ዒንሢ ኮይላ ማሊንቁሞይ! 19 ሃያኮ ቤርታ ደንጎ ካሦንሢ ደንጎ ሺዮ ዓሶሞ ታኦኒ ቡንጂ ዒንጌ

8:11 8:11 ማቴ. 12:38፤ ሉቃ. 11:16። **8:12** 8:12 ማቴ. 12:39፤ ሉቃ. 11:29።
8:15 8:15 ሉቃ. 12:1። **8:18** 8:18 ዔር. 5:21፤ ሂዚ. 12:2፤ ማር. 4:12።

ዎድና ደንቦ ዲንህሂ ዓኣፒኒ ሌማቴ ኩሙህሂ ዔቂሴይ» ጋዓዛ፥ ዔያታ፡- «ታጳ ላምዎ ሌማቴ ኩሙህሂ» ጌዔኔ።

20 ሃህ ዒዚ፡- «ታኣኒ ላንካዎ ካሃ ያይዶ ሺዮ ዓሶም ቡንፂ ዒንጌ ዎድና ዓኣፒኒ ሌማቴ ኩሙህሂ ሃሸና ደንባ ዒንህሂ ዔኬይ?» ጌዒ ዔያቶ ያኦጩኔ። ዔያታኣ፡- «ላንካይ ዳልገ ሌማቴ ኩሙህሂ» ጌዒ ማሄኔ።

21 ዒዚ ዒማና «ሂዳዎ ሃማ ሄላንዳኣና ዒንህሂ ጳቂሁዎያዳ?» ዔያቶም ጌዔኔ።

ዩሱሴ ቤቴሳይዳይዳ ፔቴ ዓኣፒ ባይቄ ዓሲሰኬያ ፓህህሂ

22 ዔያታ ቤቴሳይዳ ሄላዛ ዓሳ ፔቴ ዓኣፒ ባይቄ ዓሲ ዩሱሴ ኮራ ዔኪ ሙካዎ ዒዚ ፔ ኩጮና ካኣማንዳጉዲ ዒዛ ሺኣቄኔ።

23 ዩሱሴ ዓኣፓ ባይቄ ዓሂኮ ኩጮ ዓርቂ ጎቺ ጉርዶ ባኣካፓ ኬሳዎ ዓሂኮ ዓኣፖይዳ ጩቴሂኮ ገንፃፓ ዓኣፖ ዒዛኮ ካኣማዎ «ዳካ ኔኤም ዔኤቢ ጳዳ» ጌዒ ዒዛ ያኦጩኔ።

24 ዓኣፓ ባይቄህ ጳግ ጌዒ ዛጋዎ፡- «ሂዮ ታኣኒ ዓሲ ዴንቃኔ፤ ጋዓንቴ ዔያታ ዓገፃ ሚሂ ማላኔ» ጌዔኔ።

25 ዩሱሴ ዓሂኮ ዓኣፖይዳ ኩጮ ላሚ ጌሄኔ፤ ዩማና ዓሂ ጌኤሺ ዛገኔ፤ ዓኣፓኣ ዳቄኔ፤ ቢያ ባኣዚ ጌኤሺ ዛገሂ ዓርቄኔ። 26 ዩካፓ ዩሱሴ ዒዛም፡- «ጉርዶ ባኣኮ ዓኣዲፖ» ጌዒ ዓይሂ ማኣሪ ዳኬኔ።

ጳዒርሴኮ ዩሱሴ ዛሎ ማርካቶ (ማቴ. 16:13-20፤ ሉቃ. 9:18-21)

27 ዩካፓ ዩሱሴና ዒዛኮ ገንፃ ሃንታ ናኣቶና ፒልጶሴ ቂሳሪያ ጌይንታ ካታሞኮ ኮይላ ዓኣ ጉርዶ ባንሂ ዴንዲ ዴንዲ ጎይፃ ዓኣዎ፡- «ዓሳ ታና ያናኬ ጋዓይ?» ጌዒ ዒዛኮ ገንፃ ሃንታዘንሂ ኮራ ያኦጩኔ።

28 ዔያታ ማሃዎ፡- «ዛላ ኔና ማሰካ ዮሃኒሴኬ ጋዓኔ፤ ሃንጎሞታ ኔና ዔኤሊያሴኬ ጋዓኔ፤ ዓቴ ዓሳ ሃህ ያሲ ማሊዎ ኬኤዛዘንሂዳፓ ፔቴያኬ ኔና ጋዓኔ» ጌዔኔ።

29 «ዒንህሂ ታና ያናኬ ጋዓይ?» ጌዒ ዒዚ ዔያቶ ያኦጩኔ። ጳዒርሴ ማሃዎ፡- «ኔኤኒ ሜሲሄኬ»* ጌዒ ማሄኔ።

30 ዩሱሴ ዔያቶ፡- «ታ ዛሎ ያኦማኣ ኬኤዚፖቴ» ጌዔኔ።

8:28 8:28 ማር. 6:14-15፤ ሉቃ. 9:7-8። * 8:29 8:29 ሜሲሄኬ፡- ሜሲሄ ሃህ ገንሃ ኪሪሰቶሴ ጌይፃ ዔብሪ ዓሶ ሙኤጮና ካኣቱሞም ዓርቆናያ (ዶኦሞናያ) ጌይሂኬ።

8:29 8:29 ዮሃ. 6:68-69።

ዩሱሴ ዒዛ ሄላንዳ ሜቶና ሃይሶና ዛሎ ኬኤዜሢ
(ማቴ. 16:21-28፤ ሉቃ. 9:22-27)

31 ዩሱሴ ፔኤኮ ጊንጾ ሃንታ ናኣቶ ሂዚ ጌዒ ዔርዚሢ ሳርቄቴ፡- «ዓሲኮ ናዓሢ ሚርጌ ሜቶ ዔካንዳያ ኮይሳኔ፤ ዓይሁዶ ጨሞና ቄኤሶኮ ሱኡጎና ሃሣ ሙሴ ዔርዜ ዎጎ ዔርዛዘንሢና ቤርታ ቦሂንታንዳኔ፤ ሃይቂያ ሃይቃንዳኔ፤ ማዔቶዎ ሃይሣ ዓቢኮ ጊንፃፓ ሃይባፓ ዔቃንዳኔ።» 32 ዒዚ ዬያ ዔያቶም ጋፕዲ ፔጋሲ ኬኤዛዛ ጳዲሮሴ ዒዛ ዲማሲጋፓ፡- «ያዲ ጌዒፖ» ጌዒ ዒዛ ጎሬኔ። 33 ጋዓንቴ ዩሱሴ ዒዛኮ ጊንጾ ሃንታ ናኣቶ ባንሢ ሺሬ ዛጋፖ፡- «ኔኤኒ ፃላሄ ታ ኮሬፓ ሺኢኬ፤ ኔኤኮ ማሊፃ ፆኦሲዳፓቱሞሴ፤ ዓሲዳፓኬ» ጌዒ ጳዲሮሴ ጎሬኔ።

ዩሱሴ ጊንሢ ሃንቲሢ ጨጊሳ ባኣዚ
(ማቴ. 10:38-39፤ 16:24-28፤ ሉቃ. 9:23-27፤ 14:26-27)

34 ዬካፓ ዩሱሴ ዴሮንታ ዒዛኮ ጊንጾ ሃንታ ናኣቶንታ ፔ ባንሢ ዔኤላፖ ሂዚ ጌዔ፡- «ፆናታቶዎ ታኣና ዎላ ሃንታኒ ናሽካሢ ፔና ሃሺ፤ ሃይቢም ጊኢጌያ ማዒ ታ ጊንጾ ሃንቶንጎ።» 35 ፆናታቶ ፔ ናንጎ ዓይሳኒ ናሽካሢ ዒዛ ባይዛንዳኔ፤ ጋዓንቴ ታናንታ ታኣኮ ኮዦ ሃይሶ ዛሎሮ ፔኤኮ ናንጎ ዓኣሢ ዒንጋሢ ጋዓንቴ ናንጎ ፔኤሲ ባይዛዓኬ፤ 36 ዓሲ ሳይይዳ ዓኣ ባኮ ቢያ ዴንቃፖ ፔኤኮ ናንጎ ባይዜቶ ዓይጎ ማኣዳይ? 37 ሃሣ ዓሲ ፔ ናንጎ ቤዞ ዓይጎ ጨጋኒ ዳንዳዓይ? 38 ፆኦሲ ቦንቹዎ፤ ጎሞ ዓሶ ሾይንቶ ሃያ ቤርታ ታ ዛሎንታ ታኣኒ ዔርዜ ባኮ ዛሎዎ ኬኤዛኒ ቦርሲንታ ዓሲዳ ቢያ ዓሲኮ ናዓሢያ ፔ ዓይኮ ቦንቹና ሃሣ ጌኤዦ ኪኢታንቹናኣ ዎላ ሙካፖ ዬያ ዓሢዳ ቦርሲንታንዳኔ።

9

1 ሃሣ ዩሱሴ ዔያቶም ሂዚ ጌዔ፡- «ጎቴ ታ ዒንሢም ጋዓኔ፤ ሃሢ ሃይካ ዓኣ ዓሶ ባኣካ ፆኦሲ ካኣቱማ ዎልቄና ዬዓኣና ዛጋንዳያ ሄላንዳኣና ፔቴ ፔቴ ሃይቂንዲዎ ዓሲ ዓኣኔ።»

ዩሱሴኮ ዓውካሮ ላኣሚንቶ
(ማቴ. 17:1-13፤ ሉቃ. 9:28-36)

2 ላሆ ዓቢኮ ጊንፃፓ ዩሱሴ ጳዲሮሴንታ ያይቆኦቤንታ ዮሃኒሴንታ ሌሊ ፔኤና ዎላ ዔኪ ፑኤፒ ዲካ ኬሰካዛ ዔያቶኮ ቤርታ ዒዛኮ ዓውካራ ላኣሚንቲ ጳዴኔ። 3 ዓፒላ ዒዛኮ ኮሺ ቦኦሬኔ፤ ዓጨዳ

8:34 8:34 ማቴ. 10:38፤ ሉቃ. 14:27። 8:35 8:35 ማቴ. 10:39፤ ሉቃ. 17:33፤ ዮሃ. 12:25። 9:2 9:2 2ጴጌ. 1:17-18።

ጾኑኒያ ማሰኪ ጌኤሺ ቦኑሪሳያይዳፓ ዑሣ ዓኣጳ ቦኑሬኔ። 4 ይማና ዔኤሊያሴና ሙሴና ጳዲ ዩሱሴና ዋላ ገሰታንገቴ ዔያታ ዳንቄኔ። 5 ጳጳርሴ ዩሱሴ ኮራ፡- «ዔርዛሢዮ! ሃይካ ኑ ናንጋቴ ኮሺኪ፤ ዩያር ፔቴ ኔኤም፡ ፔቴ ሙሴም፡ ፔቴ ዔኤሊያሴም ማዓያ ሃይሣ ዉዲ ኦኡኒ ማዦም» ጌዔኔ። 6 ዔያታ ሃይሣሢ ኮሺ ዲቃቴ ዓኣሢር ጳጳርሴ ፔኤር ዓይጎ ጋዓቴያ ዔሪባኣሴ።

7 ሻኣሬ ዔያቶ ሙኪ ባይዜኔ፤ ባይዜ ሻኣርይዳፓ፡- «ሃይ ታኣኮ ታኣኒ ናሽካ ናዓሢኪ፤ ዒዚ ጋዓሢ ዋይዙዋቴ» ጋዓ ዑኡሲ ዋይዘንገቴኔ። 8 ቤዞማና ሺሪ ዔያታ ዛጋያ ዩሱሴፓ ዓታዛ ሜሌ ያናኣ ዳንቄባኣሴ።

9 ዲካፓ ዔያታ ኬዳኣና ዩሱሴ፡- «ዒንሢ ዛጌ ባኮ ዓሲኮ ናዓሢ ሃይቄ ሃይባፓ ዔቃንዳያ ሄላንዳኣና ያኦማኣ ኬኤዚፖቴ» ጌዔኔ።

10 ዩያ ዒ ጌዔ ባኮ ዔያታ ዋይዚ ዔኬኔ፤ ጋዓንገቴ፡- «ሃይቢፓ ዔቄሢ ጌይሢ ዋዚ ጌይሢዳይ?» ጌዒ ዋላ ገሰገቴኔ። 11 «ሙሴ ዔርዜ ዋጎ ዔርዛ ዓሳ ዔኤሊያሴ ቤርታ ሙካኒ ኮይሳኔ ዓይጎር ጋይ?» ጌዒ ዔያታ ዩሱሴ ኮራ ያኦጩኔ።

12 ዒዚ ዔያቶም፡- «ጎኔኬ፤ ዔኤሊያሴ ቤርታዲ ሙካኒና ጉቤ ባኮ ገኢገሻኒ ኮይሳኔ፤ ማዔቶዋ ዓሲ ናይ ሜቶ ዔካንዳሢና ቦሂንታንዳሢያ ጻኣፒንገቴ ባኣዓዳ? 13 ታኣኒ ዒንሢም ኬኤዛኔ፡- ዔኤሊያሴ ቤርታዲ ሙኬኔ፤ ቤርታዲ ዒዛ ዛሎ ጻኣፒንገቴሢ፡ ዩያ ዓሳ ኮዓ ባኮ ቢያ ዒዛይዳ ማጳኔ» ጌዔኔ።

ፑርታ ዓያና ዓርቄ ናይሰኬያ ዩሱሴ ዓውሴሢ
(ማቴ. 17:14-21፤ ሉቃ. 9:37-43)

14 ዩሱሴንታ ዒዛና ዋላ ዲኮ ኬሰኬ፡ ዒዛ ገንጾ ሃንታ ሃይሣንሢንታ ሃንጎ ዓቴ ገንጾ ሃንታዘንሢ ኮይላ ሙካንገቴ ሚርጌ ዴሬ ዔያቶ ኮራ ቡኪ፤ ሃሣ ሙሴ ዔርዜ ዋጎ ዔርዛ ዓሳኣ ዔያቶና ዋላ ማርማኔ። 15 ዒኢካ ዓኣ ዴራ ዩሱሴ ዛጌ ዋዶና ሚርጌ ዲቃቴ ሄርሻያ ዒዛ ባንሢ ጳሽኪ፡- «ኮሺዳ?» ጌዔኔ። 16 ዩሱሴ ዒዛኮ ገንጾ ሃንታ ናኣቶ ኮራ፡- «ዔያቶና ዋላ ዒንሢ ማርማሢ ዓይጎዛላዳይ?» ጌዒ ያኦጩኔ።

17 ዴር ባኣካፓ ፔቴ ዓሲ ሂዚ ጌዔኔ፡- «ዔርዛሢዮ! ገሰገጡዋ ፑርታ ዓያና ዓርቄ ናይ ታ ኔ ኮራ ዔኪ ሙኬኔ። 18 ዔቄ ዋዶና ሳዓ ዒዛ ጳዲሳኔ፤ ዳንጎና ዲባሲ ዓቺ ዳይሲሳኔ፤ ዑያዋ ዒዛኮ ሜልዚ ሌሲጉዲ ማሃኔ፤ ዩያ ፑርቶ ዓያና ዒዛይዳፓ ኬሳንዳጉዲ ኔኤኮ ገንጾ ሃንታ ናኣቶ ታ ያኦጩያታንገቴ ዔያታ ኬሳኒ ዳንዳዒባኣሴ።»

9:7 9:7 ማቴ. 3:17፤ ማር. 1:11፤ ሉቃ. 3:22። 9:11 9:11 ሚል. 4:5፤ ማቴ. 11:14።

19 ዩሱሴ ዔያቶም ሂዚ ጌዔኔ፡- «ዒንሢ ጉሙርቁዋ ዓሳ ዓይዴ ሄለንዳኣና ታ ዒንሢና ዋላ ናንጋንዳይ? ዓይዴ ሄለንዳኣና ታኣኒ ገባንዳይ? ሂንዳ ናፆ ታ ባንሢ ዔኪ ሙኩዋቲ።» 20 ዔያታ ናዓሢ ዩሱሴ ባንሢ ዔኪ ሙኩኔ፤ ፑርቶ ዓያና ዩሱሴ ዴዴንቃፆ ናፆ ሳዓ ጳዲሳዛ ናዓሢያ ሳዓ ኮላዲ ዳንጎና ዲባ ዩይሴኔ። 21 ዩሱሴ ናፆኮ ዓዶ ኮራ፡- «ዓይዳፓ ዓርቂ ሃይ ናዓሢ ሃያይዳይ?» ጌዒ ያኦጩኔ።

ናፆኮ ዓይ ማሃፆ፡- «ዓኣላ ዓኣንቴ ዓርቃፆኩ፤ 22 ፑርቶ ዓያና ዒዛ ዋዳኒያ ሚርጌ ዋዴና ታሚዳ፤ ዋኣሢዳ ከኤራሢሮ ኔኤም ዳንዳዒንታቲ ሃዳራ ኑና ሚጨንቲ ማኣዴ» ጌዔኔ።

23 ዩሱሴ፡- «ኔኤም ዳንዳዒንታቶ ኔኤኒ ዋይቲ ጋዓይ? ጉሙርቃሢም ቢያ ባኣዚ ዳዳንዳዒንታኔ!» ጌዔኔ።

24 ቤዘና ናፆኮ ዓይ፡- «ጉሙርቁፆ ታ ጉሙርቃኔ፤ ጋዓንቴ ጉሙርቁሢ ፓጨሢ ፓና ማኣዴ» ጌዒ ዒላቲኔ።

25 ዓሳ ዲርጊ ዩዓሢ ዩሱሴ ዛጋፆ ፑርቶ ዓያናሢም፡- «ሃይ ኔኤኒ ናፆኮ ዋፍና ዳንጎና ባይቁያ ማሄ ዓያናሢያ ናዓሢዳፓ ኔኤኒ ኬሰካንዳጉዲ፤ ላሚ ገንሣ ኔኤኒ ዒዛይዳ ጌሉዋጉዲ ታ ኔና ዓይሣኔ!» ጌዒ ጎሬኔ።

26 ፑርቶ ዓያናሢ ዴኤፒ ዑኡሲና ዒላታፆ ናዓሢያ ሚርጌና ባርዲሴሢኮ ገንፆ ኬሰካዛ ናዓሢ ሃይቁ ሌሲጉዲ ማሌሢሮ ሚርጌ ዓሳ ሃይቁኔ ጌዔኔ። 27 ጋዓንቴ ዩሱሴ ናዓሢኮ ኩጮ ዓርቂ ዔቁሴኔ፤ ናዓሢያ ዔቁኔ።

28 ዩካፓ ዩሱሴ ማኣሪ ጌሌሢኮ ገንፆ ዒዛኮ ገንፆ ሃንታ ናኣታ ዒዛ ደማሲ፡- «ዓይጎር ኑኤኒ ፑርቶ ዓያና ከሳኒ ዳንዳዒባኣይ?» ጌዒ ያኦጩኔ።

29 ዩሱሴ ከኤዛፆ፡- «ሃያ ጉዴሢ ሺኢጲሢና ሃሣ [ሙኡዚ ሃሺ ሺኢቁሢና] ማዒባኣታቶ ሜሌ ዓይጎና ከሰኩዋሴ» ጌዔኔ።

ዩሱሴ ዒዛ ሄለንዳ ሜታሢና ሃይሶና ዛሎ ሃሣ ከኤዜሢ
(ማቲ. 17:22-23፤ ሉቃ. 9:43-45)

30 ዩሱሴና ዒዛኮ ገንፆ ሃንታ ናኣቶና ዩኖ ቤዘ ሃሺ ጌሌላ ዓጮና ቲቁ ዴንዴኔ፤ ዩሱሴ ዒዚ ዓኣ ቤዘ ያኣኒያ ዔራንዳጉዲ ኮዒባኣሴ። 31 ዓይጎር ጌዔቶ ዒማና ዒዚ ፔኤኮ ገንፆ ሃንታ ናኣቶ፡- «ዓሲኮ ናዓሢ ዓሲ ኩሸካ ዓኣሢ ዒንገንታንዳኔ፤ ዔያታኣ ዒዛ ዋዳንዳኔ፤ ሃይቁሢኮ ገንፆ ሃይባፓ ሃይሣሳ ከሎና ዔቃንዳኔ» ጌዒ ዔርዚሢዳ ዓኣሢሮኩ።

32 ዒዛኮ ገንፆ ሃንታዘንሢም ዩይ ዒ ጌዔ ባካ ዔርቲባኣሴ፤ ማዔቶዋ ማሄ ዒዛ ያኦጩኒ ዔያታ ዒጊጩኔ።

ቢያፓ ባሼ ያናዳይ?

(ማቴ. 18:1-5፤ ሉቃ. 9:46-48)

33 ዩሱሱና ዲዛኮ ጊንፆ ሃንታዞንሢና ቁፒርናሆሜ ሙኪ ማኣሪ ጌሌሰካፓ ዩሱሱ ዲዛኮ ጊንፆ ሃንታዞንሢ ኮራ፡- «ዲንሢ ዋንዴ ጎይጆይዳ ዓኣዖ ዋላ ማርማሢ ዓይጌንዴዳይ?» ጌዒ ዖኦጮኔ፡፡

34 ዔያታ ጋዓንቴ ዚቲዮ ጌዔኔ፡፡ ዓይጎር ጌዔቶ ዔያታ ጎይፆ፡- «ኑ ጊዳፓ ቢያ ባሼሢ ያናዳይ?» ጌዒ ማርማሢሮከ፡፡ 35 ዩሱሱ ዴዔሢኮ ጊንፆ ታጶ ላምጆንሢ ዔኤላዖ፡- «ቢያፓ ቤርታ ማዓኒ ኮዓይ ያናታቶዋ ቢያፓ ጋፒንሢና ሃሃ ቢያም ማዳያ ማዓንዳያ ኮይሳኔ» ጌዔኔ፡፡ 36 ዩካፓ ፔቴ ዳካ ናይ ዔያቶ ቤርታ ዔቁሲ ናዖ ኮንቁፓፓ ሂዚ ጌዔኔ፡- 37 «ሃያጉዴ ናኣቶይዳፓ ፔቴታዖ ታ ሱንጆና ቦንቺ ዔካሢ ታና ዔካኔ፤ ታና ዔካሢ ታና ሌሊቱዋንቴ ታና ዳኬሢያ ዔካኔ፡፡»

ዩሱሱኮ «ኑና ዲፀዋኣሢ ኑኡና ዋላኬ» ጌዒዖ

(ሉቃ. 9:49-50)

38 ዮሃንሴ ዩሱሱም፡- «ዔርዛሢዮ! ፔቴ ዓሲ ኔ ሱንጆና ፑርታ ዓያና ኬሳንቴ ኑ ዛጋዖ ዲዚ ኑኡና ዋላቱዋኣሢሮ ዲዛ ኑኡኒ ላኣጌኔ» ጌዒ ኬኤዜኔ፡፡

39 ዩሱሱ ማሃዖ፡- «ታ ሱንጆና ዓኪ ዲቃሢ ባኣዚ ማዲ ማዲ ቤዘና ታ ዑፃ ፑርታ ጌሰታንዳይ ባኣሢሮ ሃሹዋቴ ላኣጊፖቴ፤ 40 ዓይጎር ጌዔቶ ኑና ዲፀዋኣሢ ቢያ ኑ ዓሲኬ» ጌዔኔ፡፡ 41 ጎኔ ታ ዲንሢም ጋዓኔ፤ ዲንሢ ታኣሮ ማዔሢሮ ፔቴ ሙርሳና ዋኣሢ ዲንሢ ዑሻ ዓሢም ዋኣዖ ዑሼሢ ዛሎር ዲንጊንታንዳ ባኣዚ ባይቃዓከ፡፡

ጎሜኮ ካራ ማዓ ባኣዚ

(ማቴ. 18:6-9፤ ሉቃ. 17:1-2)

42 ዩሱሱ ኬኤዛዖ፡- «ታና ጉሙርቃ፡ ሃንሢ ዳኮንሢፓ ፔቴማ ዳቢሳያ ያና ማዔቶዋ ፑኡፒ ዋንሢ ሆላ ቱኪ ባዘይዳ ኬኤሪንቴቶ ቃራኬ፤ 43 ዩያር ኩጫ ኔና ዳቢሳቴ ቲቁ ኔኤፓ ኬኤሬ፤ ላምፆ ኩቺ ዓኣንቴ ጋኣናኣሜይዳ፡ ታም ባይቁዋኣሢዳ ኬኤሪንቴፃፓ ጉንጆ ማዒ ናንጎ ማኣሪ ጌሊፃ ቃራኬ፡፡ [44 ጋኣናኣሜ ጌይንታ ቤዛ ዲኢካ ዓኣ ፀርቃላ ሃይቁዋያ፡ ታማኣ ባይቁዋ ቤሲኬ፡፡] 45 ቶካ ኔና ዳቢሳቴ ኔኤፓ ቲቁ ኬኤሬ፤ ላምፆ ቶኪ ቢያ ዓኣንቴ ጋኣናኣሜ ጌሊፃፓ ጉንጆ ማዒ ናንጎ ማኣሪ ጌሊፃ ቃራኬ፡፡ [46 ጋኣናኣሜ ጌይንታ ቤዛ ዲኢካ

9:34 9:34 ሉቃ. 22:24፡፡ **9:35** 9:35 ማቴ. 20:26-27፤ 23:11፤ ማር. 10:43-44፤ ሉቃ. 22:26፡፡ **9:37** 9:37 ማቴ. 10:40፤ ሉቃ. 10:16፤ ዮሃ. 13:20፡፡ **9:40** 9:40 ማቴ. 12:30፤ ሉቃ. 11:23፡፡ **9:41** 9:41 ማቴ. 10:42፡፡ **9:43** 9:43 ማቴ. 5:30፡፡

ዓላ ፀርቃላ ሃይቁዋያ፡ ታማኣ ባይቁዋ ቤሲኩ።] 47 ዓላገ ኔና ዳቢሳቴ ኔኤገ ኩሲ ኩኤሬ፤ ላምዖ ዓኣፒ ዓኣንቴ ጋኣናኣሜ ጌሊጻገ ፔቴ ዓኣፒና ጸኦሲ ካኣቱዋ ጋር ጌሊጻ ቃራኩ። 48 ጋኣናኣሜ ጌይንታ ቤዛ ዒኢካ ዓላ ፀርቃላ ሃይቁዋያ፡ ታማኣ ባይቁዋ ቤሲኩ።

49 «ጸኦሲም ዒንጎ ባኣዚ ሶኦጌ ዋሂ ጌኤሾሂጉዲ ዓሲ ቢያ ታሚዳ ጌሊ ጌኤሾኪ ከሰካንዳኔ፤

50 «ሶኦጌ ኮሺኩ፤ ጋዓንቴ ሶኦጌ ሶኦጌ ማዒፆ ዓቴቴ ዓይጎና ዒንሂ ገንሂ ሶኦጌ ማሃንዳይ?

«ዒንሂኮዋ ሶኦጌ ዓኣያ ማዖንጎ፤ ሴካና ሃንጋና ዋላ ገኢጊ ኮሺ ናንጉዋቴ።»

10

ዩሱሴ ላኣሊ ዓንጂሂ ዛላ ዔርዘሂ
(ማቴ. 19:1-12፤ ሉቃ. 16:18)

1 ዩሱሴ ዬኖ ዓጮይዳገ ዔቁ ዪሁዳ ዓጮና ጌዒ ዮርዳኖሴ ዋሮ ሱኮ ፒንቄኔ፤ ሚርጌ ዴሬ ዒዛ ባንሂ ሙኬሢሮ ዒዚ ሚናኣገ ዔርዘሂጉዲ ሃሃ ዔርዘሂ ዓርቄ።

2 ፔቴ ፔቴ ፔርሴ ዓሳ ዩሱሴ ባንሂ ሙካዖ ጌኤሲና ዒዛ ፒራኒ ኮዓሂሮ፡- «ዓሲ ፔ ማቾ ዓንጅንዳጉዲ ዋጋ ዓይሃ?» ጌዒ ጸኦጮኔ።

3 ዩሱሴ፡- «ሙሴ ዒንሂ ዬያ ዛሎ ዋዚ ጌይ ዓይሃ?» ጌዒ ጸኦጮሂና ማሃኔ።

4 ዔያታ፡- «ሙሴ ዋጋ ዓንጅንቶ ዔርዘያ ጻኣገና ዋርቃታ ዒንጊጋገ ዓንጅንዳጉዲ ጋዓኔ» ጌዔኔ።

5 ዩሱሴ ዔያቶም ሂዚ ጌዒ ማሃኔ፡- «ሙሴ ያዒ ጌይ ዓይሃሂ ዒንሂኮ ዒና ዋይዘ ዒፂ ደዳሂ ዛገኩ። 6 ጋዓንቴ ማኸንቶኮ ዓይፃገ ጌኤዢ ማጻኣገ ጋዓ ጎይፆ ጸኦሲ ዓቲንቄና ላኣሊና ማሂ ማኸኔ፤ 7 «ዩያር ዓሲ ዓደና ዒንደና ሃሺ ማቾና ዋላ ፔቴ ማዓኔ፤ 8 ላምዖንሂያ ፔቴ ዑሂ ማዓኔ» ይካገ ሴካ ላምዖ ማዒፆ ዓቴም ፔቴ ማዓኔ። 9 ዩያር ጸኦሲ ዋኣፂሂ ጸኦኒያ ቡሎገ።»

10 ዩሱሴኮ ገንፆ ሃንታ ናኣታ ማኣሮ ባንሂ ማዔ ዋደና ላሚ ዒዛ ዛላ ዩሱሴ ጸኦጮኔ። 11 ዩሱሴ ዔያቶም ማሃዖ፡- «ዖና ማዔቶዋ ፔ ማቾ ዓንጂ ሜሌ ላኣሊ ዔካሂ ዘኦሰካ ኮኦማያ ማዓኔ።

9:47 9:47 ማቴ. 5:29። 9:48 9:48 ዒሲ. 66:24። 9:50 9:50 ማቴ. 5:13፤ ሉቃ. 14:34-35። 10:4 10:4 ላሚ. ዋማ 24:1-4፤ ማቴ. 5:31። 10:6 10:6 ማኸ. ማፃ 1:27፤ 5:2። 10:8 10:8 ማኸ. ማፃ 2:24። 10:11 10:11 ማቴ. 5:32፤ 1ቆሮ. 7:10-11።

12 ይያጉዲ ሃሣ ያናታቴያ ፔ ዓሊፓ ዓንጂገቲ ሜሌሞ ሎዓ ላአሌላ ዒኢታያ ማዓኔ ገይሢኬ» ገዔኔ።

ይሱሴኮ ናአቶ ዓንጂያ
(ማቲ. 19:13-15፤ ሉቃ. 18:15-17)

13 ፔቴ ፔቴ ዓሳ ፔኤኮ ናአቶኮ ይሱሴ ኩጮና ዑዖ ካአማንዳጉዲ ዔኪ ሙካዛ ይሱሴኮ ጊንዖ ሃንታ ናአታ ይኖ ዓሶ ጎሬኔ። 14 ይሱሴ ይዖ ዛጋዖ ዳጋዲ ፔኤኮ ጊንዖ ሃንታ ናአቶሞ ሂዚ ገዔኔ፡- «የኦሲ ካአቱማ ሃንሢ ዔያቶ ጉይዘንሢሞ ማዔሢሮ ናአታታ ኮራ ሙኮንጎ፤ ሃሹዋቴ፡ ላአጊፖቴ፤ 15 ጎኔ ታ ዒንሢሞ ጋዓኔ፤ ያኦሲኮ ካአቱሞ ናይ ማዒ ዔኩዋ ዓሲ ፔቴታዖ ዒኢካ ገሌንዲዋሴ!» 16 ይሱሴ ይካፓ ናአቶ ኮንቁ፡ ኩጮ ዑዖ ገሢ ዓንጂኔ።

ፔቴ ዖርጎቺ ዓሲ
(ማቲ. 19:16-30፤ ሉቃ. 18:18-30)

17 ይካፓ ይሱሴ ኬሰኪ ጎይዖ ዓአዳንቴ ፔቴ ዓሲሰኬያ ጳሽኪ ሙኪ ቤርታ ጉሞዓታዖ፡- «ኮዥ ዔርዘሢሮ! ናንጊና ናንጊ ዴንቃኒ ዓይጎ ማዳንዲያ ታና ኮይሳይ?» ገዒ ያኦጮኤ።

18 ይሱሴ ማሃዖ፡- «ዓይጎር ኮዥሢሮ ኔኤኒ ታና ጋዓይ? ፔቴ ያኦሲዳፓ ዓቴሞ ሜሌ ኮሺ ያኦኒያ ባአሴ። 19 ኔኤኒ ዓይሢያንሢ ዔራኔ፤ ይንሢያ፡- <ዓሲ ዋዲፖ፡ ላአሊ ዒኢሲፖ፡ ወኡቁፖ፡ ሉኡዙሞና ማርካቲፖ፡ ገሺፖ፡ ዓዶና ዒንዶና ቦንቼ፡ ጋዛንሢኬ።»

20 ዓሢያ፡- «ዔርዘሢሮ! ይያ ዓይሢያ ቢያ ናአቶፓ ዓርቃዖ ታኣኒ ካፓኔ» ገዔኔ።

21 ይሱሴ ናሹሞና ዒዛ ዛጋዖ፡- «ፔቴ ባአዚ ሌሊ ዓቴኔ፤ ዴንዲ ኔኤኮ ዓአ ባኮ ቢያ ሻንቺ ማንቆ ዓሶሞ ጊሻኪ ዒንገ፤ ይካፓ ታ ጊንዖ ሙኪ ሃንቲ፤ ጮሪንጮ ማአራ ቡኪንቴ ቆሎ ኔኤኮ ዓአያ ማዓንዳኔ» ገዔኔ። 22 ዓሢ ይያ ዋይዛዖ ዓአፖ ካር ቱኬኔ፤ ኮሺ ዒ ዖርጎቺታሢሮ ያዪ ያዪ ዴንዴኔ።

23 ይሱሴ ጊንዖ ሃንታ ናአቶ ባንሢ ሺራዖ፡- «ዖርጎቺ ዓሲሞ ያኦሲ ካአቱሞይዳ ገሌሢ ዋዚጉዲ ሜታንዳይ!» ገዔኔ።

24 ጊንዖ ሃንታ ናአታ ይኖ ይሱሴ ገዔዘ ዋይዚ፡- «ሃያጉይ ባአዚ» ገዒ ዲቃቴኔ፤ ጋዓንቴ ይሱሴ ላሚ፡- «ናይዮቴ! ያኦሲ ካአቱሞይዳ ገሌሢ ዋዚ ሜታንዳይ! 25 ዖርጎቺ ዓሲ ያኦሲ ካአቱሞይዳ ገሌንዳሰካፓ ጋአላ ናርፔ ዒኢናና ገላኒ ሹሌዓንዳኔ» ገዔኔ።

10:15 10:15 ማቲ. 18:3። 10:19 10:19 ኬሲ. ማፃ 20:12-16፤ ላሚ. ሞፃ 5:16-20።

26 ጊንፆ ሃንታ ናኣታ ዩሱሴ ጌዔሢና ኮሺ ዲቃቲ ሄርሻዮ፡- «ያዒ ማዕቶ ማይ ያኑኒ ዲቃኒ ዳንዳዒ!» ዋሊ ኮራ ጌዔኔ።

27 ዩሱሴ ዔያቶ ባንሢ ዛጋዮ፡- «ጎኔና ዩይ ዓሲም ዳንዳዒንቲዋሴ፤ ጋዓንቲ ያኦሲም ዳዳንዳዒንታያኬ፤ ቢያ ባኣዚ ያኦሲም ዳንዳዒንታኔ» ጌዔኔ።

28 ጳዊሮሴ ዒማና፡- «ሃይሾ ኑኡኒ ቢያ ባኣዚ ሃሺ ኔ ጊንፆ ሃንታንቲዋ» ጌዔኔ።

29 ዩሱሴ ሂዚ ጌይ ማሄኔ፡- «ጎኔ ታኣኒ ጋዓኔ፤ ታናንታ ታኣኮ ኮዦ ሃይሶንታሮ ጌዒ ፔኤኮ ማኣሮ፣ ጌርሲንሢ፣ ጌርንሢ፣ ዒንዳ፣ ዓይ፣ ናኣቶንታ ጎዦንታ ሃሻሢ ባሽና ዴንቃንዳኔ። 30 ሃያ ዋደይዳታቲያ ዒዳንቲ ዳከንቲያ ዔካያታዎዋ ፔኤኮ ማኣሮ፣ ጌርሲንሢ፣ ጌርንሢ፣ ዒንዳንሢ፣ ናኣቶንታ ጎዦንታ ሚርጌ ያኤታ ጳንጩ ማሃ ዔካንዳኔ፤ ሙካ ዓጮይዳኣ ናንገና ናንገ ዴንቃንዳኔ። 31 ጋዓንቲ ቤርቲ ማዕ ጎኣሶ ማላ ሚርጌ ዓሳ ጊንሢም፤ ጊንፆ ዓቲ፣ ላቤያ ማላ ሚርጌ ዓሳ ቤርቲም ማዓንዳኔ።»

ዩሱሴ ፔና ሄላንዳ ሜቶና ሃይሶና ዛሎ ሃሣ ኬኤዜሢ
(ማቲ. 20:17-19፤ ሉቃ. 18:31-34)

32 ዩሩሳሌም ዴንዳ ጎይያይዳ ዔያታ ዓኣንቲ ዩሱሴ ዔያቶኮ ቤርታ ቤርታ ዴንዳኔ፤ ጊንፆ ሃንታ ናኣታ፡- «ሃያጉዴ ባኣዚ» ጌዒ ዩዮ ሃይሶ ዲቃቲ ሄርሻኔ፤ ሃንጎ ዒዛና ዓኣ ዓሳ ዒጊጩኔ። ዒዚ ጊንሢ ላሚ ዒዛ ሄላንዳ ባኮ ኬኤዛኒ ታጳ ላምዎንሢ ፔ ባንሢ ዔኤላዎ ሂዚ ጌዒ ኬኤዜኔ፡- 33 «ሃይሾ ኑኡኒ ዩሩሳሌም ዴንዳይዳኬ፤ ዓሲኮ ናዒሢ ቁኤሶኮ ሱኡጎና ሙሴ ዔርዜ ዎጎ ዔርዛዘንሢናም ዓኣሢ ዒንጊንታንዳኔ፤ ዔያታኣ ዒዚ ሃይቃንዳጉዲ ጌዒ ጌሰቲ ኩንሣንዳኔ፤ ዓይሁዴ ማዒባኣ ዓሶም ዒዛ ዓኣሢ ዒንጎንዳኔ፤ 34 ዓይሁዴ ማዒባኣ ዴራ ዒዛ ቦሃንዳኔ፣ ጨታንዳኔ፣ ዠራፓና ጳርቃንዳኔ፤ ሃሣ ዎዳንዳኔ። ጋዓንቲ ሃይሦ ዓቢኮ ጊንፆ ሃይባፓ ዔቃንዳኔ።»

ያይቆኦቤና ዮሃንሴናኮ ያኦጪዎ
(ማቲ. 20:20-28)

35 ዜብዲዮሴኮ ናኣታ ያይቆኦቤና ዮሃንሴና ዩሱሴ ኮራ ሙካዮ፡- «ኑና ዔርዛሢዮ! ኑኡኒ ያኦጫ ባኮ ኔኤኒ ማዳንዳጉዲ ኑ ኮዓኔ» ጌዔኔ።

36 ዩሱሴ፡- «ዓይጎ ታኣኒ ማዳንዳጉዲ ዒንሢ ኮዓይ?» ጌዒ ያኦጩኔ።

10:31 10:31 ማቲ. 20:16።

50 ዲዚ ፔኤኮ ቃሲ ዑፃ ማኣዔ ዓፒሎ ከኤሪ፥ ጵሊ ዔቃፆ ዩሱሴ ባንሢ ዓኣዳኔ።

51 ዩሱሴ፡- «ታኣኒ ዓይኅ ዎኦቶም ኔኤኒ ኮዓይ?» ጌዒ ያኦጩኔ።
ዲዚ፡- «ዔርዘሢሃዮ! ሃዳራ ታኣኒ ዘጋንዳጉዲ ዓኣፖ ታኣም ፖዒሴ» ጌዒ ማሃኔ።

52 ዩሱሴ፡- «ሂዳቶ ዳንዳ፤ ኔ ጉሙርቂፃ ኔና ዓውሴኔ» ጌዔኔ።
ዓሢያ ቤዘማና ዘጌኔ፤ ጎይፆናኣ ዩሱሴ ጊንፆ ዓኣዳኔ።

11

ዩሱሴኮ ፑኡፒ ቦንቾና ዩሩሳላሜ ጌሊፆ

(ማቴ. 21፡1-11፤ ሉቃ. 19፡28-40፤ ዮሃ. 12፡12-19)

1 ዩሱሴና ዲዘኮ ጊንፆ ሃንታዘንሢና ዩሩሳላሜ ሙኪ ዑካፆ ዘይቶ ሪሚቶ ዲኮ ኮይላ ዓኣ ቤቴፓጌና ቢታኒያ ጌይንታ ካታሞንሢ ሙከኔ፤ ዩሱሴ ዲዘኮ ጊንፆ ሃንታ ናኣቶይዳፓ ላምፆሰከንሢ ቤርታ ሂዚ ጌዒ ዳከኔ፡- 2 «ሃና ሴኮ ጉርዳሎ ዲንሢ ቤርታዲ ዓኣዳዎቴ፤ ዲኣካ ዲንሢ ሄሄላፆ ያኣኒያ ቶገባኣ ሃሪ ናይ ቱኡቲ ዓኣንቴ ዳንቃንዳኔ፤ ቡሊ ሃኒ ዔኪ ዩዑዎቴ፤ 3 ያኣኒያ ዲንሢ ዓይጎር ቡላይ ጌዒ ያኦጩቶ ሳዳም ኮይሳሢርከ፤ ዑከና ዲዚ ማሂ ዳካንዳኔ ጌዒ ከኤዘዎቴ።»

4 ዔያታኣ ዳንዳፆ ሃሮ ናፆማ ጎይፆ ዓጫ፥ ማኣሪ ካርካ ቱኡቲ ዓኣንቴ ዳንቂ ቡሊኔ፤ 5 ዲማና ዲኣካ ዔቂ ዓኣ ዓሶፓ ፔቴ ፔቴ ዓሲ፡- «ሃሮ ናፆ ዎዳኒ ቡላይ?» ጌዒ ያኦጩኔ።

6 ዔያታኣ ዩሱሴ ጌዔሢ ያኦጩ ዓሶም ማሂ ከኤዘዘ ዓሳ ዔያቶ ሃሼኔ። 7 ላምፆ ጊንፆ ሃንታ ናኣቶንሢ ሃሮ ናፆ ዔኪ ዩሱሴ ኮራ ሙካፆ፥ ዔያታ ፔኤኮ ዓፒሎ ሃሮ ናፆ ዙላ ጌሣዘ ዩሱሴ ቶጌኔ። 8 ሚርጌ ዓሳ ፔኤኮ ዓፒሎ ጎይፆ ሂኢሣዘ ዘሎ ዓሳ ካፆፓ ዎላሺ ሚንሢ ሚንሢ ጎይፆ ሂኢሣኔ። 9 ዩሱሴኮ ቤርቶና ጊንፆናይዳ ዓኣ ዳራ ቢያ፡- «ያኣሲ ጋላቲንቶም! ጎዳ ሱንፆና ሙካሢ ያኣሲ ዓንጃንጎ፤ 10 ሃጊ ሙካ፥ ኦኡኮ ዓዳሢ፥ ዳውቴ ካኣቱማ ዓንጃንቴያከ! ጋላታ ጫሪንጮይዳ ያኣሲም ማፆንጎ!» ጌዒ ዲላቴኔ።

11 ዩሱሴ ዩሩሳላሜ ሄሊ ያኣሲኮ ጌኤዢ ማኣሪ ጌላፆ ዓጫ ዓኣ ባኮ ቢያ ዘጌኔ፤ ሳዓ ዓሚሢር ታጶ ላምፆንሢና ዎላ ዩሩሳላሜፓ ከሰከ ቢታኒያ ጎፆ ቤዘ ዓኣዳኔ።

ዩሱሴ ጋዳንቂ ቤሌሴ ጌይንታ ሚፃሎ

(ማቴ. 21፡18-19)

11:9 11:9 ዓይኑ. 118:25-26።

12 ጉቴ ቢታኒያፓ ዔያታ ማዓኣና ዩሱሴ ናይዲንቴኔ። 13 ፔቴ ዋርቂ ዓኣያ ቤሌሴ ጌይንታ ሚሢ ሃኬ ዴንቃፆ ጎፆንቴ ዒዘይዳ ዓኣፒ ናንጋንዳኔ ጌዒ ሚጻሎ ባንሢ ዓኣዴኔ። ጋዓንቴ ሚጻላ ዓኣፑዋ ዋይ ማዔሢሮ ዒላሺፓ ዓታዛ ፔቴታፆ ዓኣፒ ዒዚ ዴንቁባኣሴ። 14 ዩያሮ ዩሱሴ ሚጻሎ፡- «ሃይፓ ሴካ ፆኣኒያ ኔጊዳፓ ዓኣፒ ሙፆፓ» ጌዔኔ። ዩያ ዒዚ ጋዓኣና ጊንፆ ሃንታ ናኣታ ዋይዘኔ።

ዩሱሴ ጌኤዦ ማኣራ ኮርማ ዓሶ ዳውሴሢ
(ማቴ. 21:12-17፤ ሉቃ. 19:45-48፤ ዮሃ. 2:13-22)

15 ዩሱሴ ዩሩሳላማ ሙካፆ ጌኤዦ ማኣሮ ጌሊ ዒኣካ ሻንቻ ዓሶና ሻንቃ ዓሶና ዳውሴሢ ዓርቄኔ። ሚኢሾ ላኣማ ዓሶኮ ሚኢሾ ጌሆሢና ደኣሎ ሻንቻ ዓሶኮ ፆይቶና ሃዒ ደይሴኔ። 16 ፆኣኒያ ዓይጎ ባኣዚ ኬዲ ጌኤዦ ማኣሮኮ ዲሮ ጋሮና ዓኣዳንዳጉዲ ዒ ኮዒባኣሴ። 17 ዩሱሴ ዴሮ ሂዚ ጌዒ ዔርዘኔ፡- «ታኣኮ ማኣራ ዓሴ ዜርሢ ቢያኮ ሺኢ ጰሢ ማኣሪኬ» ጌዒንቴ ፆኣፒንቴ ባኣዓዳ? ዒንሢ ጋዓንቴ ዉሴ ዓኣሺንታ ቤሴ ማሃኔ» ጌዔኔ።

18 ቄኤሶኮ ሱኡጎንታ ሙሴ ዔርዘኔ ዋጎ ዔርዘዞንሢንታ ዩሱሴ ዩያ ኬኤዛኣና ዋይዘኔ፤ ዒዚ ኬኤዛሢ ዴራ ቢያ ዲቃቴ ሄርሻሢሮ ዔያታ ዒጊጫፆ ዋዲ ዓርቂ ዒዛ ባይዛንዳቴያ ካራ ኮዔኔ።

19 ዩሱሴና ጊንፆ ሃንታ ናኣቶና ሳዓ ዓማዛ ካታማፓ ኬሰኬኔ።

ቤሌሶ ሚጻሎኮ ማሊፆ
(ማቴ. 21:20-22)

20 ዚሮ ጉቴሎ ጉቴ ዓሚ ጎይፆና ዔያታ ዴንዳፆ ቤሌሶ ሚጻላ ፆጲና ማሊ ዓኣንቴ ዴንቄኔ፤ 21 ጰዒሮሴ ዚጊኖ ዩሱሴ ጌዔሢ ጰቂሣፆ፡- «ዔርዘሢሮ! ኔኤኒ ጋዳንቄ ሚጻላ ሃይሾ ማሊኔ» ጌዔኔ።

22 ዩሱሴ ዔያቶም ማሃፆ፡- «ፆኣሴ ጉሙርቁዋቴ፤ 23 ጎኔ ታ ዒንሢም ጋዔኔ፤ ፆኣኒያ ላምፆ ዒኔና ማይባኣፆ ታኣኒ ኮዓ ባካ ማዓንዳኔ» ጌዒ ጉሙርቁሢና ሃያ ዲኮ ሃይፓ ዔቂ ባዘይዳ ኬኤሪንቴ» ጌዔቶ ኬኤሪንታንዳኔ። 24 ዩያሮ ሺኢ ጰሢና ዓይጎ ባኣዚ ታቶም ዒንሢ ሺኢ ቁቶ ዒንሢም ማዔያጉዲ ጉሙርቁዋቴ፤ ዒንሢ ሺኢ ቃ ባካ ቢያ ዒንሢም ዒንጊንታንዳኔ። 25 ጫሪንጫ ዓኣ ዓዳሢ ዒንሢ ጎም ዓቶም ጋዓንዳጉዲ ዒንሢ ሺኢ ቃኒ ዔቃ ዋደና ዓሴዳ ዒንሢ ዓርቄ ኮሜ ዓኣቶ ሃሹዋቴ። [26 ዒንሢ ማሊ ዓሶኮ

11:17 11:17 ዒሴ. 56:7፤ ዔር. 7:11። 11:23 11:23 ማቴ. 17:20፤ 1ቆር. 13:2። 11:25 11:25 ማቴ. 6:14-15።

ዳቢንቶ ዓቶም ጌባባኦቶ ጫሪንጫ ዓኣ ዓዳሢ ዒንሢ ጎሞ ዓቶም ጌባንዲዋሴ» ጌዔኔ።፡*
ዩሱሴ ዓይጎ ቢታንቶና ማዳቴያ ያኦጪንቴ ያኦጪያ
 (ማቴ. 21:23-27፤ ሉቃ. 20:1-8)

27 ዔያታ ላሚ ዩሩሳላሜ ማዒ ሙከኔ፤ ዩሱሴ ጌኤዦ ማኣር ጌሊ ሃንታንቴ ቁኤሶኮ ሱኡጋ፣ ሙሴ ዔርዜ ዋጎ ዔርዛዘንሢንታ ጪማኣ ዒዛ ኮይላ ሙካዎ፡- 28 «ሃያ ባኮ ቢያ ኔኤኒ ማዳሢ ዓይጎ ቢታንቶናዳይ? ሃሃ ሃያ ባኮ ማዳንዳጉዲ ቢታንቶ ኔኤም ዒንጌሢ ያናዳይ?» ጌባ ያኦጪ።።

29 ዩሱሴ ማሃዎ፡- «ታኣኒያ ዒንሢ ፔቴ ባኣዚ ያኦጪንዳኔ፤ ዒንሢ ታኣም ማሃቶ ታኣኒ ዓይጎ ቢታንቶና ሃያ ባኮ ማዳቴያ ዒንሢም ከኤዛንዳኔ፤ 30 ዮሃኒሴኮ ማሰኪያ ያኦሲፓሞ ዓሲፓዳይ? ሂንዳ ታኣም ከኤዙዋቴ» ጌዔኔ።።

31 ዔያታ፡- « <ዓካሪ ኑ ዋዚ ጋዓንዳይ? ጌባ ዋላ ዘርታዎ፣ ያኦሲፓኬ» ጌባ ኑኤኒ ማሃቶ ሂዳዎ ዒንሢ ዓይጎር ዮሃኒሴ ከኤዛሢ ጉሙርቁባኣይ? ዒዚ ጋዓንዳኔ። 32 <ዓሲፓኬ» ኑኤኒ ጌዔቶሽ?» ዓሲፓኬ ዔያታ ጎዑዋጉዲ ዴራ ቢያ ማሰካ ዮሃኒሴ «ጎኔና ያኦሲ ማለሢ ከኤዛ ዓሲኬ» ጋዓሢር ዒጊጪ።። 33 ዩያር፡- «ኑኤኒ ዔሩዋሴ» ጌባ ማሃኔ።።

ዩሱሴያ፡- «ያዒታቶ ታኣኒያ ዓይጎ ቢታንቶና ሃያ ባኮ ማዳቶ ዒንሢም ከኤዛዓ» ጌዔኔ።።

12

ዎይኖ ቱካ ዓሶ ማሊሲ ከኤዘና ኮኦኪንሃ
 (ማቴ. 21:33-46፤ ሉቃ. 20:9-19)

1 ሄለሳዎ ዩሱሴ ዩኖ ኮኦኪንሢና ሂዚ ጌባ ከኤዚሢ ዓርቄኔ፡- «ፔቴ ዓሲ ዎይኔ ጌይንታ ሙዎ ዓኣፒ ዓኣፓ ሚሢዳ ባልጋ ባኣዚ ቱኬኔ፤ ዓጮዋ ኮሺ ዲርቄ ዩኖ ካፃዛ ሄርቄ ጩኡጲ ዑሺ ኮሽንደ ዔቴያ ላሌ ሹቺዳ ቆኦቄ ቦኣኪ ጊኢጊሺኔ፤ ሃሃ ዎይኔሎ ካፓ ዓሶም ዴግ ጌዔ ሴኤላ ሴኤሊ፣ ዩካፓ ዩኖ ቤዘ ጎሽኪ ጎሽኪ ታኣም ካፑዋቴ ጌባ ጎሽካ ዓሲም ዒንጊ ሃኬ ዓጪ ዴንዴኔ። 2 ዎይኖ ማንዎ ዎድና ዒዛ ሄላ ዘሎ ዔኪ ሙካንዳጉዲ ዒዛኮ ዓይሢንቲ ማዳ ዓሲ ጎሽካ ዓሶ ኮራ ዳኬኔ። 3 ጎሽካ ዓሳ ዒዛ ዩያ ዓይሢንቲ ማዳሢ ዓርቄ ጳርቄሰካፓ ኩቺ ጉሪ ማሂ ዳኬኔ። 4 ጊንሃ ሃሃ ጎኸ

* 11:26 11:26 ፔቴ ፔቴ ሚናኣ ማፃኣፓ ፓይ. 26 ጊዳ ቃሳኔ፤ ዩና ቃኣሌላ ማቴ. 6:15 ጊዳ ዓኣዘ ማላያኬ።።

ዓዴ ሜሌ ዓይሢንቴ ማዳያ ዳካዛ ጎሽካዘንሢ ዬያኮዋ ቶኦኮ ዲይ ዑራ፥ ቦርሲሲ ዳኬኔ፤ 5 ሄሊሲ ሃሣ ሜሌ ዳካዛ ዬያኦ ዋዳኔ፤ ዬያጉዴያ ሚርጌ ዓሲ ዳካዛ ዛሎ ጳርቂ ዛሎ ዋዳኔ። 6 ዓካሪ ጎዡ ዓዴ ማዳኒ ዓቴ ባኣዚ ፔኤኮ ናሽካ ናዓሢ ዳኪሢ ሌሊኬ፤ ዬያሮ ሳያንቴ ታኣኮ ናዓሢ ዔያታ ቦንቻንዳኣናንዳኔ» ሂዚ ጌዒ ማለዎ ቢያሢኮ ጋፒንያይዳ ፔቴ ናዓሢ ዳኬኔ። 7 ጋዓንቴ ጎሽካዘንሢ ዋሊ ኮራ ሃይ ዒዛ ዳካላንዳሢ ታሢሮ ሃኒ ዬዑዋቴ፤ ኦ ዒዛ ዋዳቶ ዒዛኮ ዓደኮ ዓኣ ባካ ቢያ ኦም ማዓንዳኔ» ጌዔኔ። 8 ዬያሮ ናዓሢ ዔያታ ዓርቂ ዋዲ ዬኖ ጎሽኮ ቤዜሎኮ ቲኢያ ዙላ ዔኪ ዓኣዲ ኬኤሬኔ። 9 ዓካሪ ዬኖ ጎሽሎኮ ዓዳሢ ዓይጎ ዋኦታንዳይ? ጌዔቶ ዒዚ ፔኤሮ ሙኪጋፓ ጎሽካ ዓሶ ዋዳንዳኔ፤ ዬኖ ጎዡ ቤዜሎ ሜሌ ጎሽካ ዓሲም ዒንጋንዳኔ። 10 ጌኤኮ ማዓኣፖይዳ፡-

«ማኣሮ ማዡ ዓሳ ቦሢ ሃሼ ሹጫሢ

ማኣሮኮ ሄሎ ማዔኔ፤

11 ዬይ ሃሣ ያኦሲ ማዳኬ፤

ኦኡኒ ዛጋዛ ዲቃሢ ሄርሺሳያኬ።»

ጌይንቴ ፃኣፒንቴሢ ዒንሢ ናባቢባኣዓዳ?

12 ዓይሁደኮ ሱኡጎ ማዔ ዓሳ ዬሱሴ ዬያ ኮኣኪንሃና ዔያቶ ዛላ ኬኤዜያ ማዔሢ ዔራዎ ዒዛ ዓርቃኒ ኮዔኔ፤ ጋዓንቴ ሚርጌ ዳሬ ዓኣያታሢሮ ዒጊጪ ዔያታ ዒዛ ሃሺ ዳንዳኔ።

ጊኢራ ጪጊሢ ዛላ ያኦጪንቴ ያኦጪሢ

(ማቴ. 22:15-22፤ ሉቃ. 20:20-26)

13 ፔርሴ ዓሶና ሄሮዲሴ ዓሶና ዛላፓ ማዔ ፔቴ ፔቴ ዓሲ ዬሱሴ ጌሰታ ጌኤዞና ዳቢንታቶ ቡኡዲ ዓርቃንዳጉዲ ዒዛ ኮራ ዳኪንቴኔ።

14 ዬንሢያ ዒዛ ኮራ ሙካዎ፡- «ዔርዛሢዮ! ኔኤኒ ጎኔ ኬኤዛያ ማዔሢ ኦኡኒ ዔራኔ፤ ዓሲ ዒጊጪሢና ዓሲ ታና ዋዚ ጋዓንዳይ? ጌዒ ኔ ማዳ ባኣዚ ባኣሢሮ ያኦሲኮ ጎይያ ጎኦምና ኔኤኒ ዔርዛኔ፤ ያዒ ማዓዛ ሮሜ ዓጮ ካኣቲም ጊኢራ ጪጊሢ ዋጋ ዓይሣም? ዓይሠቀይ? ኦኡኒ ጊኢሮንዳም? ሃሾንዳይ?» ጌዒ ያኦጪኦ።

15 ዬሱሴ ዔያቶኮ ጌኖ ማሊያ ዔራዎ፡- «ዒንሢ ታና ዓይጎሮ ጌኤሲና ቡኡዳኒ ኮዓይ? ሃንዳ ሮሜ ዓጮ ሚኢሾ ታና ዳውዋቴ» ጌዔኔ።

16 ዔያታ ሚኢሾ ዔኪ ሙካዛ ዒዚ፡- «ሃኖ ሮሜ ዓጮ ሚኢሾሎይዳ ዓኣሢኮ ዓውካሮና ፃኣፒንቴ ሱንያና ያኦሮዳይ?» ጌዒ ያኦጪኦ።

ዔያታ ማሃዎ፡- «ሮሜ ዓጩ ካአተሲኬ» ጌዔኔ።

17 ዬሱሴ፡- «ያዒ ማዔቶ ካአተሲ ካአተም፣ ያኦሲሲ ያኦሲም ዒንጉዋቱ» ጌዔኔ። ዔያታ ዒዛኮ ማሃዎና ኮሺ ዲቃቲ ሄርሼኔ።

ሃይቄ ዓሲኮ ዔቂሢ ዛላ ያኦጪንቴ ያኦጪሢ
(ማቴ. 22:23-33፤ ሉቃ. 20:27-40)

18 «ሃይቄ ዓሲ ሃይባፓ ዔቂንዲዋሴ» ጋዓ ሶዶቄ ዓሳ ዬሱሴ ኮራ ሙካዎ ሂዚ ጌዒ ዒዛ ያኦጪኔ፡- 19 «ዔርዛሢሃዮ! ሙሴ ዔርዜ ዋጎይዳ ኑም ፔቲ ዋጌ ፃአፒ ዒንጌኔ፤ ዬና ፔቲ ዓሲ ላኣሊ ዔካዎ ሾውዋዎ ሃይቄቶ ዒዛኮ ጌርሲ ላኣሌሎ ዔኪ ሃይቄሢም ፃጲ ጌሢ ናይ ሾዎንጎ» ጋዓያኬ። 20 ዓካሪ ሂንዳ ፔቲ ዓሲኮ ላንካይ ዓተንቄ ናይ ዓኣኔ ኑ ጎዎም፤ ዔያቶኮ ቶይዳሢ ላኣሊ ዔካዎ ሾውዋ ሃይቄኔ፤ 21 ሄሊሴ ጌኤዚ ሃይቄሢኮ ዬኖ ላኣሌሎ ዔካዎ ሃሃ ሾውዋ ሃይቄኔ፤ ሃይሣሳሢ ሃሃ ዬያጉዲ ማዔኔ፤ 22 ዬያይዳ ጎይሃ ላንኮ ጌርሲንሢ ሲያ ላኣሌሎ ዔካዎ ዳካላንዳ ናይ ሾውዋ ሃይቃዛ ሲያሢኮ ጋፒንፃ ላኣሌላ ሃይቄኔ፤ 23 ላንኮ ጌርሲንሢ ሲያ ዒዛ ዔኬያታሢ ጋፒንፃ ሃይቄ ዓሳ ዔቃ ዋዶና ዬና ላኣሌላ ዋያኮ ማቾ ማዓንዳይ?» ጌዒ ያኦጪኔ።

24 ዬሱሴ ዔያቶም ማሃዎ፡- «ዒንሢ ሃኣዒዲ ዳበንታሢ ፃአፒንቴሢ ያኦሲኮ ዋልቆና ዔሩዋኣሢ ሮቲዋይ? 25 ሃይቄ ዓሳ ዔቃዎ ጫሪንጫ ዓኣ ያኦሲኮ ኪኢታንቾጉዲ ማዓንዳፓ ዓቲም ዔኩዋሴ፤ ሎዑዋሴ። 26 ሃይቄ ዓሳ ዔቃዎ ዛሎ ማዔቶ ጋዓንቴ ያኦሲ ሙሴም ካዮ ባኣካ ታሞና ጴዲ ኬኤዜ ዋዶና ዓይጎ ኬኤዜቶዎ ሙሴ ማፃኦጎይዳ ዒንሢ ናባቢባኣዓዳ? ዬና ዓይጎዳይ ጌዔቶ፡- «ያኦሲ፤ ታኣኒ ዓብራሃሜ ያኦሲ፤ ዩሳኣቄ ያኦሲ፤ ያይቆኦሴ ያኦሲኬ» ጌዔሢ። 27 ያኦሲ ሸምፖና ናንጋ ዓሳ ያኦሲ፤ ሃይቄቶዎ ናንጌና ናንጋ ዓሳ ያኦሲኬ። ዒንሢ ጋዓንቴ ኮሺ ዳበንታኔ» ጌዔኔ።

ቢያፓ ባሽ ማዔ ዓይሥሢ
(ማቴ. 22:34-40፤ ሉቃ. 10:25-28)

28 ሙሴ ዔርዜ ዋጎ ዔርዛ ዓሳይዳፓ ፔቲሰኬያ ማርማሢ ዔያቶኮ ዋይዜኔ፤ ዬሱሴ ፔ ኮራ ያኦጪ ዓሳም ቃራ ማሃሢ ማሃሢ ዋይዚ ዒና ዔኬኔ፤ ዬይ ዓሢ ዬሱሴ ባንሢ ሙካዎ፡- «ያኦሲ ዓይሢ ዓይሢ ያይዳፓ ቢያ ባሽ ማዔ ዓይሢ ፃዎዳይ?» ጌዒ ያኦጪኔ።

12:18 12:18 ዳኪ. ማዶ 23:8። 12:19 12:19 ላሚ. ዋማ 25:5። 12:26 12:26 ኬሲ. ማፃ 3:6። 12:28 12:28 ሉቃ. 10:25-28።

29 ዩሱሴ ዲዛሞ ማሃዎ፡- «ቢያፓ ባሽ ማዔ ዲይሂዳ ሩሲራዔኤሌ ዋይዜ! ያኦሲ ኦኡኮ ፔቴ ያኦሲ ሌሊኬ፤ 30 ኔኤኒያ ኔኤኮ ያኦሲ ጉቤ ዲናፓ፣ ጉቤ ሹምፓፓ፣ ጉቤ ማሊፃፓ፣ ጉቤ ዋልቃፓ ናሽኬ» ጋዲያኬ ጌዔኔ። 31 ሃሃ ዬያ ማላያ ላምዓሳ ዲይሂዳ ማሊ ዓሲ ኔናጉዲ ማሂ ናሽኬ» ጋዲያኬ። ዬንሂ ላምዎ ዲይሂዳንሂዳፓ ማሊ ባሻያ ባኣሴ።»

32 ሙሴ ዔርዜ ዋጎ ዔርዛሂ ዩሱሴ ኮራ፡- «ሂዮ ፔኤር ኮሽኬ ዔርዛሂዮ! ያኦሲ ፔቴኬ፤ ዲዛይዳፓ ዓቴም ማሊ ያኦሲ ባኣሴ» ኔኤኒ ጌዔሂ ጎኔኬ፤ 33 ዬያር ዓሲ ጉቤ ዲናፓ፣ ጉቤ ሹምፓፓ፣ ጉቤ ማሊፃፓ፣ ጉቤ ዋልቃፓ ያኦሲ ናሽካኒ ኮይሳኔ፤ ሃሃ ማሊ ዓሲያ ፔና ማሂ ናሽካኒ ኮይሳኔ፤ ታሚና ሚቹ ያኦሲም ዲንጎ ባኮ ዲንጊያና ዬያ ጉዴያ ማሊ ዲንጎ ካኣኮይዳፓ ዬንሂ ላምዎ ዲይሂዳንሂዳ ካፒፃ ባሻያኬ» ጌዔኔ። 34 ዬይ ዋጎ ዔርዛሂ ዔራቶና ጳቂሂ ማሂሂ ዩሱሴ ዛጋዎ፡- «ኔኤኒ ያኦሲኮ ካኣቱማፓ ሃኬያቱዋሴ» ጌዔኔ።

ዩካፓ ዩሱሴ ኮራ ጫርቂ ያኦጩ ዓሲ ባኣሴ።

ሜሲሄ ዛሎ ያኦጩንቴ ያኦጩሂ
(ማቴ. 22:41-46፤ ሉቃ. 20:41-46)

35 ዩሱሴ ያኦሲኮ ጌኤኮ ማኣሮይዳ ዔርዚቤቃ ሂዚ ጌዒ ያኦጩኔ፡- «ሙሴ ዔርዜ ዋጎ ዔርዛ ዓሳ ስሪሰቶሴ ዳውቴ ናይኬ» ዓይጎር ጋዓይ? 36 ዳውቴ ፔ ቶኦኪና ዓያና ጌኤሽ ዲዛ ዲና ማሊሂ ጌሃዛ፡-

ያኦሲ፣ ታ ጎዳሂም * (ሜሲሄም)
ኔኤኮ ሞርኮ ኔ ቢታንቶ ዳማ
ታኣኒ ማሃንዳያ ሂላንዳኣና ታኣኮ ሚዛቆ ዛላ ዳዔ።
ጌዔኔ፤ ጌኤኔ። 37 ዓካሪ ዳውቴ ፔ ቶኦኪና ሳዳ» ጌዒ ዔኤሌቶ ማሲሄ ዳውቴኮ ዋይቲ ናይ ማዓይ?» ዬያ ዲዚ ጋዓኣና ሚርጌ ዓሲ ዲዛሲ ዋዛና ዋይዛኔ።

ዩሱሴ ዋጎ ዔርዛ ዓሳና ፔርሴ ዓሳና ዳቢንቴ ዓሲታሂ ኬኤዜሂ
(ማቴ. 23:1-37፤ ሉቃ. 20:45-47)

38 ዩሱሴ ዔርዚቤቃ ሂዚ ጌዔኔ፡- «የዶሲ ዓፒላ ማኣዒ ሴካ ሃንጋ ሃንቲሂና ሃሃ ቦኣኮይዳ ኮሺ ዔኤሊሂ ዔካኒ ናሽካ ሙሴ ዔርዜ ዋጎ ዔርዛ ዓሳይዳፓ ካፒንቱዋቴ፤ 39 ዔያታ ዓይሁዶ ዓሳኮ

12:30 12:30 ላሚ. ዋማ 6:4-5። 12:31 12:31 ላዊ. ዓኬ 19:18። 12:32 12:32 ላሚ. ዋማ 4:35። 12:33 12:33 ሆሴ. 6:6። * 12:36 12:36 ጎዳ፡- ሃጊ ሙካንዳ ማሲሄኬ። 12:36 12:36 ዓይኦ. 110:1።

ቡኪንቶ ቤዘይዳ ቦንቾ ያይታ። ሙኡዚም ዔኤሎ ቤሰካ ቦንቾ ቤሲ ዴንቂ ዳዓኒ ሩኡራኔ። 40 ዓሲ ዛጎም ጌዒ ያዶሲ ሺኢቆ ሺኢጲሢና ዓኒንሢባኣ ላኣሎኮ ማኣሮ ጌሺ ጌሺ ማንቁሳኔ፤ ዬያሮ ዔያቶይዳ ዴኤሢ ዋጌ ዋጊንታንዳኔ።»

ዜኤሮይንዴሎኮ ያኣሲም ዒንጎ ባኮ ዒንጊዩ
(ሉቃ. 21:1-4)

41 ያኣሲም ጌዒ ዓሳ ሚኢሾ ዒንጋ ሳኣዲኖኮ ዬሱሴ ቤርቶ ዛላ ዴዒ ዓኣዖ ዴራ ሳኣዲኖ ጋራ ሚኢሾ ዓጋንቴ ዛጌኔ፤ ዒማና ያርጎጮ ዓሳ ሚርጌ ሚኢሾ ዓጋዛ። 42 ፔቴ ማንቆ ዜኤሪንዴሰኬና ሙካዖ ዬኖ ዋዶ ሚኢሾና ላምዖ ሲኪና ማዓ ኮሺ ዳካ ሚኢሾ ዓጌኔ። 43 ዬሱሴ ፔኤኮ ጊንዖ ሃንታናኣቶ ዔኤላዎ፡- «ጎጌ ታ ዒንሢም ጋዓኔ፤ ሳኣዲኖይዳ ሚኢሾ ዓጌ ዓሳይዳጋ ባሺ ዓጌዛ ሃኖ ዓኒ ሃይቄ፣ ማንቆ ላኣሎኬ ጌዔኔ፤ 44 ዓይጎሮ ጌዔቶ ማሌ ዓሳ ቢያ ዒንጌሢ ዓኣ ቆሎይዳጋ ዲቢ ዑሣ ዓኣጴሢኬ፤ ዒዛ ጋዓንቴ ማንቆታዖ ፔኤኮ ዓኣማ ዓይሱዋዖ ዓጌኔ፤ ፔና ዋይሣንዳ ባኮንሢ ቢያ ዒንጌኔ።»

13

ዬሱሴ ጌኤዢ ማኣሮኮ ሻሂንቲዖ ዛሎ ኬኤዜሢ
(ማቴ. 24:1-2፤ ሉቃ. 21:5-6)

1 ዬሱሴ ጌኤዢ ማኣሮጋ ኬሰካንቴ ዒዛኮ ጊንዖ ሃንታዘንሢዳጋ ፔቴሰኬይ፡- «ዔርዛሢዮ! ሃያ ማኣሮ ማኡሮ ጊኢጊሾና ሹጮና ማኡንቴ ማኣራ ዋዚጉዲ ኮሽካቴያ ሂንዳ ዛጌ!» ጌዔኔ። 2 ዬሱሴ ማሃዖ፡- «ሃያ ጴጌፖ ማኣሮ፣ ሹጮና ማኡናሢ ኔኤኒ ዛጋ? ሃይ ማኣራ ደዓንዳኔ፤ ሹቺ ሹቺዳ ሃኣዒዲ ኬልቂንቲ ፔቴታዖ ዓታዓኬ» ጌዔኔ።

ጎዳ ሙኡኮኮ ቤርታ ዳውሲሢና ሜቶና ሙካንዳሢ
(ማቴ. 24:3-14፤ ሉቃ. 21:7-19)

3 ዬሱሴ ጌኤዢ ማኣሮኮ ቤርቶ ዛሎና ዛይቴ ሪሚቲ ዳካ ጎዖ ዲኮይዳ ኬሰኪ ዴዒ ዓኣንቴ ጴዲሮሴ፣ ያይቆኦ፤ ዮሃኒሴንታ ዒንዲራሴንታ ሌሊ ዲዛ ኮራ ሙካዖ፡- 4 «ዬይ ኔኤኒ ጌዔ ባካ ማዓንዳሢ ዓይዲዳይ? ዬይ ቢያ ማዓኒ ዑካኣና ዔርታሢ ዓይጎናዳይ? ሂንዳ ኦም ኬኤዜ» ጌዒ ያኣጮኦኔ።

5 ዬሱሴ ዔያቶም ማሃዖ፡- «ያኣኒያ ዒንሢ ዳቢሱዋጉዲ ዒንሢና ዔሩዋቴ፤ 6 ሚርጌሢ፡- ጎኣኒ ሜሲሃኬ» ጌዒ ጌዒ ታ ሱንዖና ሙኪ ሚርጌ ዓሲ ዳቢሳንዳኔ፤ 7 ዒንሢኮ ዑኬ ያልዚ ዔቆቶዋ ሃሃ ሃኬ ቤሰካ ዓኣ ያልዚ ሃይሴ ዋይዛዖ ዲቃቲፖቴ፤ ዬይ ማዑዋዖ

ዓታዓኬ፤ ጋዓንቴ ጋፒንግ ሃጊኬ። 8 ፔቴ ዜርፃ ሜሌ ዜርፃይዳ፣ ካኣታ ካኣቶይዳ ያልዚ ዔቁሳንዳኔ፤ ዲማ ዲማ ቤሰካ ሳዓ ዓጊፂሢና ናይዚና ማዓንዳኔ፤ ዬይ ቢያ ሾይቺ ዓርቂሢ ቆፂ ሜታሳሢጉዲ ሜቶኮ ቢያ ቤርቶኬ።

9 «ዒንሢያ ዒንሢ ዛሎ ኮሺ ዔሩዋቴ፤ ዓይጎር ጌዔቶ ዓሳ ዒንሢ ዋጊም ዓኣሢ ዒንጋንዳኔ፤ ዓይሁዴ ዓሶኮ ቡኪንቶ ቤዘይዳ ጳርቂንቲ ታኣኮ ዒንሢ ማርካ ማዓንዳጉዲ ታ ዛሎና ዋይሣ ዓሶና ካኣቶና ቤርታ ዒንሢ ዋጊም ሸኢካንዳኔ። 10 ጋፒንግ ሙካንዳሢኮ ቤርታ ጋዓንቴ ኮገፍ ሃይሳ ዲማ ዲማ ዜርፃም ቢያ ሄላኒ ኮይሳኔ። 11 ዓሳ ዒንሢ ዓርቂ ዋጊም ሸኢሻኣና ሐኡኒ ዓይጎ ከኤዛንዳና ገዳይ? ጌዒ ቤርታዲ ሜታዲፖቴ፤ ዒንሢ ሸኢኬ ዋዶና ዒንሢኮ ዒና ሙከሢ ከኤዙዋቴ፤ ዓይጎር ጌዔቶ ዒማና ከኤዛሢ ዓያና ጌኤሺ ማዓንዳፓ ዓቴም ዒንሢቱዋሴ። 12 ጌርሲ ፔኤኮ ጌርሲ፣ ዓዴ ፔኤኮ ናፃ ሃይቢም ዓኣሢ ዒንጋንዳኔ፤ ናኣታ ሾዔ ዓሶ ዒፂ ዓኣሢ ዒንጊሢና ዋዲሳንዳኔ። 13 ታ ዛሎር ዒንሢ ዓሲና ቢያ ዓዲንቴያ ማዓንዳኔ፤ ጋፒንግ ሄላንዳኣና ጊቢ ደዳሢ ጋዓንቴ ዳቃንዳኔ።»

ዩሩሳላሜ ዓጮይዳ ሄላኒ ዓኣ ፑርቶ ሜታሢ ዛሎ (ማቴ. 24:15-28፤ ሉቃ. 21:20-24)

14 «ሃሣ ዓሲ ዒኢሳ ፑርታ ባኣዚና ሻኣካ ባኣዚ ጴዳኒ ኮይሱዋ ቤሰካ ማዲንታንቴ ዒንሢ ዛጋንዳኔ፤ ዬያ ናባባሢ ዒና ዔኮንጎ፤ ዬኖ ዋዶና ዪሁዳ ዓጮይዳ ዓኣ ዓሳ ቢያ ዲኮ ባንሢ ቤቶንጎ። * 15 ሹጮና ማኮና ማኣርኮ ዑያይዳ ዓኣ ዓሲ ከኤፃፓ ከዲ ፔቴ ባኣዚ ዔካንዳኔ ጌዒ ኔጎፓ፤ 16 ጎሺዳ ዓኣዲ ዓኣ ዓሲ ዓፒሎ ፔኤኮ ዔካኒ ጊንሣ ማፃፓ፤ 17 ዬኖ ዋዶና ጎጳይንዳሢና ናኣቶ ዓኣሎ ዒንድንሢናም ባዴዔ፤ 18 ዬይ ቢያ ባርጊ ዋዶና ማዑዋጉዲ ሸኢቁዋቴ። 19 ዬኖ ዋዶና ያኦሲ ሳፃ ማኤማፓ ዓርቃፃ ሙኪ ዬኖ ከሎ ሄላንዳኣና ዛጊቤቁቢ ሜቶና ዋኣኖና ማሊ ሄላዓኬ። 20 ያኦሲ ዬያ ከሎኮ ፓይዶ ዳኪሲባኣያታቴ ዳቃኒ ያኦኒያ ዳንደዒንዳዋንቴኬ፤ ጋዓንቴ ዶኦሪንቴዘንሢ፤ ጌዒ ዬይ ከላ ቢያ ቃሚቃንዳኔ።

21 «ዬያር ዖና ማዔቶዋ ሜሲሄ ሃይሾ ሃካኬ፤ «ዬይሾ ያሶኬ» ጌዔቶ ጉሙርቂፖቴ። 22 ዋይቴይ ጌዔቶ ሉኡዚ ሜሲሄንሢና ሉኡዚ

13:9 13:9 ማቴ. 10:17-20። 13:13 13:13 ማቴ. 10:22። * 13:14 13:14 ዳኣኔ. 9:27 ጊዳ ዓኣሢ ዛጊ። 13:14 13:14 ዳኣኔ. 9:27፤ 11:31፤ 12:11። 13:15 13:15 ሉቃ. 17:31። 13:19 13:19 ዳኣኔ. 12:1፤ ዮሃ. ያፔዳ 7:14።

የኦሲ ማለሊህ ኬኤዛያ ማላ ዓሲ ሙካንዳኔ፤ ዔያቶም ዳንዳዒንቴቶ የኦሲኮ ዔርቲ ጉሙርቁንታ ዓሶታዎ ዳቢሳሊ ዓኪ ዲቃህ ባአዚና ማላታና ዔያታ ማዳንዳኔ። 23 ዒንሢና ኮሺ ዔሩቀቴ! ሃያ ባኮ ቢያ ዩይ ዎዳ ሄላንዳሢኮ ቤርታሲ ታ ዒንሢም ኬኤዛኔ።

ዓሲ ናዓሢኮ ሙኮ
(ማቴ. 24:29-31፤ ሉቃ. 21:25-28)

24 «ዬሮ ዎደና ዩያ ማቶኮ ቢያ ገንፃ ዓባ ደሚንዳኔ፥ ዓገናኣ ፖዒንዲቀሴ፤ 25 ኸኦጋሢያ ጫሪንጫፓ ኬዳዛ ጫሪንጫይዳ ዎልቁና ዓኣ ባካ ቢያ ዓገፃንዳኔ። 26 ዩካፓ ዓሲኮ ናዓሢ ደኤፒ ዎልቁና ቦንቸንቲ ሻኦሪና ሙኪ ጴዳንዳኔ፤ 27 ፔኤኮ ኪኢታንቸ ዒዚ ዳካዛ ዔያታ ያይዶ ዛሎ ቢያ ዳንዲ ዓጮኮ ጋፓፓ ጫሪንጫ ጋፓ ሄላንዳኣና ዓኣ ዒዛኮ ዶኦሪንቴዞንሢ ቡኩሳንዳኔ።»

ዎደኮ ጋፓንፃ ዔርዛ ቤሌሶ ሚጻሎ
(ማቴ. 24:32-35፤ ሉቃ. 21:29-33)

28 ዩሱሴ ኬኤዛዎ፡- «ቤሌሶ ሚጻሎኮ ኮኦኪንሣ ዒንሢም ዔርዛያ ማዓንዳጉዲ፤ ዒዛኮ ካኣፓ ዲ፡ ዒላሺ ኬሳ ዎደና ያጎሢ ፊ ቡኤሢ ዒንሢ ዔራሬ። 29 ዩያጉዲ ዒንሢያ ዩይ ባካ ቢያ ማዓዛ ዛጋዎ ዓሲኮ ናዓሢ ሙካ ዎዳ ቡኤሢና ሙኪ ካራ ዓኣሢ ዔሩቀቴ፤ 30 ጎኔ ታኣኒ ዒንሢም ጋዓኔ፤ ሃይ ሾይንታ ዓኣዳንዳሢኮ ቤርታ ዩይ ቢያ ማዓንዳኔ። 31 ጫሪንጫና ሳዎና ዓኣዳንዳኔ፤ ታኣኮ ቃኣላ ጋዓንቴ ናንገና ዶዲ ናንጋንዳኔ» ጌዔኔ።

ጋፓንፃ ኬሌሎና ዎደና ያኦኒያ ዔሩቀያ ማዒዎ
(ማቴ. 24:36-44)

32 ዩሱሴ ሃሣ፡- «ጋዓንቴ ዩሮ ኬሌሎና ዎደሎና ዛላ ዓዳሢፓ ዓቴም ያኦኒያ ዔራፊ ባኣሴ፤ ጫሪንጫይዳ ዓኣ ኪኢታንቸታቶዎ ሃሣ ናዓሢያ ዔሩቀሴ። 33 ዩና ዎዳ ዓይዲ ሙካንዳቴያ ዒንሢ ዔሩቀኣሢሮ ኮሺ ደዲቀቴ። 34 ዩና ዎዳ ማኦሮ ፔኤኮ ሃሺ ሃኬ ዓጪ ዓኣዳ ዓሲሰኬያ ማላኔ፤ ዒዚ ፔቴ ፔቴ ዒዛም ማዳ ዓሶም ዲማ ዲማ ማዳ ዒንጋዎ ካፓ ዓሢም ኮሺ ደዲ ካፓንዳጉዲ ዓይሣኔ። 35 ዩያሮ ማኦሮኮ ዓዳሢ ሙካንዳ ዎደ

13:24 13:24 ዒሲ. 13:10፤ ሂዚ. 32:7፤ ዒዪ. 2:10፤31፤ 3:15፤ ዮሃ. ያፕጳ 6:12።
13:25 13:25 ዒሲ. 34:4፤ ዒዪ. 2:10፤ ዮሃ. ያፕጳ 6:13። 13:26 13:26 ዳኣኔ. 7:13፤ ዮሃ. ያፕጳ 1:7። † 13:28 13:28 ያጎሢ፡- ዒሲዔዔሌሌ ዓጪና ዒኣካ ዓኣ ሚፃ ዒላ ዒላሺ ኬሳ ዎደኬ። 13:32 13:32 ማቴ. 24:36። 13:34 13:34 ሉቃ. 12:36-38።

ዲንሢ ሌረዋያታሢር ዲንሢና ኮሺ ሌረዋቴ፤ ጎዖንቴ ዲዚ ሴካ ዖኦሻ ዋዴ፣ ዓቴቶ ጎዖኮ ገዲሚሺ፣ ማዲባኦቶ ኮይዳ ቁኢቃኦና፣ ዔይዔ ጌዔቶ ጉቴ ዲቡርታ ሙካንዳኦናንዳኔ፤ 36 ዔረዋያ ዲንሢ ገንዒ ዓኦንቴ ዲዚ ሙኪ ዲንሢ ዴንቁዋጉዲ ደዲዋቴ፤

37 «ዲንሢም ታኦኒ ኬኤዛሢጉዲ ሃንጎ ዓሶማኦ ደዲዋቴ ታ ጋዓኔ» ጌዔኔ።

14

ኪሪሰቶሴ ባይዛኒ ዓሶኮ ዋላ ዘርቲያ
(ማቴ. 26:1-5፤ ሉቃ. 22:1-2፤ ዮሃ. 11:45-53)

1 ዓይሁዴ ዓሳ ዑሣ ዓኦዲዖንታ ላኦዳ ሙዒ ቦንቾ ኬሎንታ ማሊ ቦንቻኒ ላምዖ ዓቢ ዓታዛ ቄኤሶኮ ሱኡጎና ዋጎ ኮሺ ዔራ ዓሳ ጌኔ ማሊሢና ዩሱሴ ዓርቁ ዋደንዶ ጎይሢ ኮዔኔ። 2 ጋዓንቴ ዴራ ዑራ ዔቁሳንዳኔ ጌዒ፡- «ኦኡኒ ቦንቾ ኬሎና ዩያ ማዳዓ» ዔያታ ጌዔኔ።

ሳውቃ ቲዦና ዩሱሴኮ ዑያ ቲሽኬ ላኦሌሎ
(ማቴ. 26:6-13፤ ዮሃ. 12:1-8)

3 ዩሱሴ ቢታኒያ ጎዖ ጉርደይዳ ዑፃ ኬሰካ ፑርቶ ደርዓሢና ዓርቁንቴያ ፖዔ፣ ሰሞኦኔ ጎዖሢ ማኦራ ዓኦያ ካሣ ሙዓኒ ገኢጊ ዴዒ ዓኦንቴ ፔቴ ላኦሊሰኬና ዓልባሰፃርሴ ጌይንታ ሹቺፓ ኮሺንቴ ቢልቃፃይዳ ናርዶሴ ጎዖ ቦንቹንቴያ ሃሣ ሻንቾዛ ሚርጌ ሚኢሾ ዔካ፣ ሳውቃያ ዋኦሢ ማዔ ቲሺ ኩንሢ ዔኪ ሙካዖ ዩና ቢልቃፃሎ ዋዲ ሳውቃ ቲዢሎ ዩሱሴኮ ቶኦካ ዋሂኔ። 4 ዩያ ዒዛ ማዳኦና ዒኢካ ዓኦ ዓሶይዳፓ ፔቴ ፔቴ ዓሳ ዳጋዳዖ፡- «ሃይ ሳውቃ ቲዦ ጉሪ ዓታሢ ዓይጎርዳዶ? 5 ሃያ ሳውቃ ቲዦ ፔቴ ዓሲ ፔቴ ለዔ ማዶ ማዶም ዲንጎንዶ ሚኢሾይዳፓ ዑሣ ሻንቹ ዔኤቢ ባኦ፣ ዓሶ ማንቆም ዲንጎናቴ ዓይጌ ዓኦይ?» ጌዒ ላኦሌሎዋ ዔያታ ፓሴኔ።

6 ዩሱሴ ማሃዖ፡- «ሃሹዋቴ፤ ዒዛ ዲንሢ ዓይጎር ሜታሳይ? ዒዛ ታኦም ኮሺ ባኦዚ ማዳኔ፤ 7 ማንቆ ዓሳ ቢያ ኬሊ ዲንሢና ዋላ ዓኦሢር ኮዔ ዋዴና ዔያቶ ዲንሢ ማኦዲኒ ዳዳንዳዓኔ፤ ጋዓንቴ ታኦኒ ቢያ ኬሊ ዲንሢና ዋላ ሃይካቱዋሴ፤ 8 ሃና ላኦሌላ ፔኤም ዳንዳዒንቴሢ ጉይያ ማዳኔ፤ ዓሸካ ታኦኮ ዲኡኪንቴዋንቴ ቤርታሲ ሳውቃ ቲሺና ዒዛ ታኦኮ ዑያ ቲሽኪ ዲኡጉም ገኢጊሹኔ። 9 ጎኔ ታ ዲንሢም ጋዓኔ፤ ዓጮ ቢያይዳ ሃይ ኮዦ ሃይሳ ኬኤዚንታ

14:1 14:1 ኬሲ. ማፃ 12:1-7:: 14:3 14:3 ሉቃ. 7:37-38:: 14:7 14:7 ላሚ. ዋማ 15:11::

ዎደና ዓንካ ማዕቶዎ ሃይ ዒዛ ማዕ ባካ ዒዛ ጸቂሥሢ ማዒ ኬኤዚንታንዳኔ» ጌዔኔ።

ዪሁዳ ዬሱሴ ጌሺሢና ዓአሢ ዒንጋኒ ዓሶና ዎላ ጊኢጌሢሢ
(ማጥ. 26:14-16፤ ሉቃ. 22:3-6)

10 ታጳ ላምዓሢዳፓ ፔቴ ዓሰቆሮንቶ ዪሁዳ ጎዎሢ ዬሱሴ ጌሺሢና ዓአሢ ዒንጋኒ ቁኤሶኮ ሱኡጎ ኮራ ዓአዕኔ። 11 ዔያታ ዒዛኮ ጎዳ ሻንቸሮ ሙኪያ ዔራዎ ኮሺ ዎዛዲ ሚኢሹ ዒዛም ዒንጋኒ ዎላ ጌሶተ ጊኢጌኔ። ዬካፓ ዒዚ ዬሱሴ ዓአሢ ዒንጋኒ ዒዛም ጊኢጋንዳ ጎይሢ ኮዔኔ።

ዬሱሴ ዑሣ ዓአዲያ ኬሎ ካዎ ዳኪንቴዘንሢሢና ዎላ ሙዔሢ
(ማጥ. 26:17-25፤ ሉቃ. 22:7-14፤ 21-23፤ ዮሃ. 13:21-30)

12 ዬሱሴኮ ጊንያ ሃንታዘንሢሢ ዓይሁዴ ዓሳ ዑሣ ዓአዲያ ቦንቾ ኬሎ ማራናይ ሹኪ ላአደዎ ሙዒ ቦንቻ ኬሎኮ ዓይያይዳ ዒዛ ኮራ ሙካዎ፡- «ዑሣ ዓአዲያ ኬሎ ማሊ ሙዎ ካዎሢ ሙዒና ዎካ ዓአዲ ጊኢጊሻንዳጉዲ ኔኤኒ ኮዓይ?» ጌዒ ያኦጩኔ።

13 ዒዚያ ዒዛኮ ጊንያ ሃንታዘንሢሢዳፓ ላምዎንሢሢ ሂዚ ጌዒ ዳኤኔ፡- «ኤኬ ካታዎ ዴንዲዎቴ፤ ዒኢካ ዒንሢ ዎአሢ ጉሲ ኬዴ ዓሲ ዴንቃንዳኔ፤ ዬያ ዓሢኮ ጊንያ ዓአዲዎቴ፤ 14 ዒዚ ዴንዲ ጌላ ኬኤያማ ጌሊጋፓ ማኦሮኮ ዓዳሢ ኮራ ሩርዛሢ ታኦኮ ጊንያ ሃንታዘንሢሢና ዎላ ታኦኒ ዑሣ ዓአዲያ ኬሎ ሙዎ ሙዒንዳ ኬኤያ ዎካዳይ?» ጋዓኔ፡ ጎዑዎቴ። 15 ዒዚያ ኩቦ ጋራ ዓአ ሂኢሢ ጊኢጊንቴ ዳልጎ ቤዘ ዒንሢሢም ዳውዎንዳኔ፤ ዒኢካ ኑም ጊኢጊሹዎቴ።»

16 ላምዎ ጊንያ ሃንታዘንሢሢ ኬሰኪ ካታዎ ዴንዲ ዬሱሴ ጌዔማጉዲ ቤዘዎ ዴንቂ ዑሣ ዓአዲያ ኬሎ ካዎሢ ሙዒና ዒኢካ ጊኢጊሹኔ።

17 ሳዓ ዓማዛ ዬሱሴ ታጳ ላምዎንሢሢና ዎላ ሙኤኔ፤ 18 ካሦ ሸኢሸ ዔያታ ሙዒኦና ዬሱሴ፡- «ጎኔ ታኦኒ ዒንሢሢም ጋዓኔ፤ ሃሢ ታኦና ዎላ ካሦ ሙዒያ ዒንሢሢዳፓ ፔቴይ፡ ታና ዓአሢ ዒንጋንዳኔ» ጌዔኔ።

19 ዔያታ ዬኖ ጌኤዘና ያያዎ፡- «ጎኔ ታናቴዎሴ፤ ኔ ታናኬ ጋዓ?» ጌዒ ጌዒ ፔቴ ፔቴሢ ዒዛ ያኦጩኔ።

20 ዬሱሴ ማሃዎ፡- «ዬይ ዓሢ ሃሢ ታኦና ዎላ ሃኖ ጎንጋ ኩጮ ዳካዎ፡ ዒንሢሢ ታጳ ላምዐሢዳፓ ፔቴሢኬ፤ 21 ዓሲኮ ናዓሢ ቤርታዲ ዒዛ ዘሎ ጻኦፒንቴ ጎይያና ሃይቂሢ ዓታዓኬ፤ ጋዓንቴ ዓሲኮ ናዓሢ

ገሺሢና ዓሳሢ ዲንጋ ዬያ ዓሢሞ ባዴዔ፤ ዬይ ዓሢ ቤርታዲ ሾይንቲባኦቲ ቃራታዎኑ» ጌዔ።

ጎዳኮ ማደ ካዋሢ

(ማቲ. 26:26-30፤ ሉቃ. 22:14-20፤ 1ቆሮ. 11:23-25)

22 ዔያታ ሙዖይዳ ዓኣንቲ ዬሱሴ ካሢ ዔካዖ ጋላቲ ቡንፂጋፓ ዲዛኮ ገንፆ ሃንታ ናኣቶም፡- «ሃኣዛጉዋቲ፣ ሃይ ታናኑ» ጌዒ ዲንጌ።

23 ሃሢ ዑሽኮ ባኮዋ ዔካዖ ጋላቲ ዔያቶም ዲንጌ፤ ቢያሢ ዑሽኮ ባኮይዳፓ ዑሽኩ። 24 ዒማና ዒዚ ዔያቶም፡- «ሃይ ታኣኮ ማርጌ ዓሶም ለኣሊንታንዳ ጩኣቁሞ ሱጉዎኑ፤ 25 ጎኔ ታ ዲንሢሞ ጋዓ፤ ያኣሲ ካኣቱሞይዳ ዓኮ ታኣኒ ዑሽካንዳያ ሄላንዳኣና ሃሮ ዋይሮ ዑጉ ላሚ ታኣኒ ዑሽካዓኑ» ጌዔ።

26 ዬካፓ ዔያታ ያኣሲ ቦንቾም ማዓ ዓይኦዋ ዓይናዳዖ ዛይቲ ሪማቲ ዲካ ዓኣዳኒ ኬሰኩ።

ጳዲሮሴ ዲዛ ዔሩዋሴ ጋዓንዳኔ ጌዒ ዬሱሴ ኬኤዘሢ

(ማቲ. 26:31-35፤ ሉቃ. 22:31-34፤ ዮሃ. 13:36-38)

27 ዬሱሴ ዲዛኮ ገንፆ ሃንታ ናኣቶም፡- « <ሄንቃሢ ታኣኒ ዋዳንዳ፤ ማራታኣ ዣኣላንዳኔ> ጌይንቲ ፃኣፒንቲሢሂጉዲ ታ ዲንሢኮ ዲቆ ማዔም ዲንሢ ቢያ ታና ሃሻንዳ፤ 28 ጋዓንቲ ሃይባፓ ታኣኒ ዔቁሰካፓ ጌሊላ ጎዖ ዓጮ ቢሪ ታ ዲንሢ ዓኣዳንዳ።» ጌዔ።

29 ጳዲሮሴ፡- «ሜሌ ዓሳ ኔ ዛሎና ዲቁንቲታቶዋ ታኣኒ ማሊ ዲቁንታዓኑ» ጌዔ።

30 ዬሱሴ፡- «ታኣኒ ኔኤም ጎኔ ጋዓ፤ ሃሮ ዲባኒ ኮይዳ ላሚ ቁኣቁዋንቲ ኔኤኒ ታና ሃይሢ ማይንቲ ታ ዲዛ ዔሩዋሴ» ጋዓንዳ። ጌዔ።

31 ጳዲሮሴ ጋዓንቲ፡- «ሃይቁ ሃይቆቲያ ታኣኒ ኔኤና ሃይቃንዳኣፓዓቲም ማሊ ታ ኔና ዔሩዋሴ» ጋዓንዳ። ጌዒ ጌዒ ደዲሺ ኬኤዛኣና ሃንጎ ዓቲ ገንፆ ሃንታዘንሢያ ያዒ ጌዔ።

ዬሱሴ ጌኤቲሴማኔ ጎዖ ቤዛ ሺኢቁ ሺኢጲዖ

(ማቲ. 26:36-46፤ ሉቃ. 22:39-46)

32 ዬማፓ ጌኤቲሴማኔ ጎዖያ፣ ቱኮና ሚሢ ማርጌ ዓኣ ቤሲ ዔያታ ዓኣዳዖ ዬሱሴ ፔኤኮ ገንፆ ሃንታ ናኣቶም፡- «ታኣኒ ሺኢቃኣና ዲንሢ

14:24 14:24 ኬሲ. ማፃ 24:8፤ ዔር. 31:31-34። 14:27 14:27 ዛካ. 13:7።
14:28 14:28 ማቲ. 28:16።

ሃካ ደዑዋቴ» ጌዔስካፓ፣ 33 ዒዛና ዎላ ጳዲሮሴንታ ያይቆኦቤንታ ሃሃዮሃረሴንታ ዔኪ ዓኣዳዎ ዒኢካ ዒዚ ኮሺ ማሊ ያዩሢ ዓርቄ። 34 ዔያቶ ኮራ ዒዚ፡- «ሺምፓሢ ታኣኮ ማርጌ ያዩ ሃይቃኒ ዑኩኔ፤ ዒንሢ ሃይማካ ደዒ ደዒ ካፑዋቴ» ጌዔ።

35 ዒዚ ዔያቶይዳፓ ዳካ ሃኪ ዓኣዳዎ ባሊቶና ሳዓ ሎኦሚ ዳንዳዒንታያ ማዔቶ ዬና ፑርቶ ማቶ ዎዳላ ዒዛ ሄሉዋጉዲ፣ 36 ሂዚ ጌዒ ሺኢቄ፡- «ዳሢዮ! ቢያ ባኣዚ ኔኤም ዳንዳዒንታያታሢሮ ሃኖ ታኣኒ ዔካኒ ጊኢጌ ማቶ ታጊዳፓ ሃኪሴ፤ ጋዓንቴ ኔ ማሊ ያጉዲ ማዓንዳኣፓዓቴም ታ ማሊ ያጉዲ ማፖፓ።»

37 ዬካፓ ሃይሃ ዒዛኮ ጊንዩ ሃንታዞንሢ ኮራ ማዒ ሙካዎ ዔያታ ጊንዒ ዓኣንቴ ዳንቄ ጳዲሮሴ ኮራ፡- «ሲሞኦኔ! ኔኤኒ ጊንዒዳ? ዳካ ዎዳታዎ ጳጢ ደዲ ዳዓኒ ኔኤኒ ዳንዳዒባኣዳ?» ጌዔ። 38 ሄለሳዎ ቢያሢዎ፡- «ዒንሢ ዳቢሳኒ ጌሾ ባኣዚዳ ዒንሢ ጌሉዋጉዲ ጳጢ ሺኢቄዋቴ፤ ዓሲኮ ዓያና ጊኢጌያኩ፤ ጋዓንቴ ዓሸኪ ላቤያኩ» ጌዔ።

39 ሃሢ ጊንሣ ዓኣዲ ቤርታ ዒዚ ሺኢቄሢ ጎይዎ ላሚ ዒማ ጌዒ ሺኢቄ። 40 ዬካፓ ዒዚ ማዒ ሙካንቴ ጊንዒሢ ዔያቶ ማርጌና ባሽሢሮ ጊንዒ ዓኣንቴ ዳንቄ፤ ዔያታ ዒዛም ማሂ ከኤዛኒያ ዳንዳዒባኣሴ።

41 ሃይሣሲ ዔያቶ ኮራ ማዒ ሙካዎ ሂዚ ጌዔ፡- «ሃሢ ሄላንዳኣና ዒንሢ ላሂ ሃውሸሢዳዳ? ማይ ዓካሪ ጊዴ፤ ዎዳኣ ሄሌ፤ ሃይሾ ዓሲኮ ናዓሢ ጎሞ ዓሶ ኩጫ ጌሸሢና ዓኣሢ ዒንጊንታንዳ። 42 ሂዮ ማይ ዔቁዋቴ ኦኡኒ ዓኣደም! ታና ጌሸሢና ዓኣሢ ዒንጋሢ ሃይሾ ሙኩኔ» ጌዔ።

ዬሱሴ ሞርኮ ኩጫ ዓርቄንቴሢ
(ማቴ. 26:47-56፤ ሉቃ. 22:47-53፤ ዮሃ. 18:3-12)

43 ዬሱሴ ሂዚ ጌዒ ከኤዛ ጎይሣ ዓኣንቴ ዒዛኮ ጊንዩ ሃንታ ታጳ ላምዓሢዳፓ ፔቴ ዪሁዳ ጎይሢ ሙኩኔ፤ ዒዛና ዎላ ዓፓሮና ኮኣሎና ዓርቄ ማርጌ ዓሲ ዓኣኔ፤ ዬያታ ዳኪንቴሢ ቁኤሶኮ ሱኡጎና ሙሴ ዔርዜ ዎጎ ዔርዛ ዓሶንታ ጨሞንታይዳፓኩ። 44 ጌሺያና ዓኣሢ ዒንጋ ዪሁዳ ዓሶም፡- «ዒንሢ ዓርቃንዳሢ ዎያዳይ ጌዔቶ ኮሺዳ?» ጌዒ ታኣኒ ሄርቃንዳሢ፤ ዒዛ ዛጊ ዓርቄ ዔኪ ዓኣዳዋቴ» ጌዒ ዔያታ ዔራንዳጉዲ ቤርታዲ ከኤዜ።

45 ዪሁዳ ሙሙካዎ ዬሱሴ ኮራ ደጨ፡- «ዔርዛሢዮ!» ጌዒ ሄርቄ። 46 ዬማፓ ዓሳ ዬሱሴ ቶለንዲዎ ጎይሢ ዓርቄ። 47 ዬማና ዒኢካ ዔቁ ዓኣ ዬሱሴኮ ጊንዩ ሃንታዞንሢዳፓ ፔቴሰኬይ ጨንቻ

ቱጊ ቁኤሶ ሱኡጋሢ ዓይላሢኮ ዋዮ ቆፂ ተቁኔ። 48 ዩሱሴያ ዔያቶም ሂዚ ገዔኔ፡- «ጨንቻና ኮኦሎና ዒንሢ ዔኪ ሙኩሢ ሱላጉዲ ታና ዓርቃኒዳ? 49 ቢያ ኬሊ ጌኤዢ ማኣሮይዳ ታኣኒ ዔርዚ ዔርዚ ናንጋኣና ዒንሢ ታና ዓርቁባኣሴ፤ ጋዓንቴ ሃይ ማዔሢ ፃኣጉንቴሢ ኩማንዳጉዲኬ።»

50 ዩማፓ ዒዛኮ ገንፆ ሃንታ ናኣታ ቢያ ዒዛ ሃሺ ዩኒንቴኔ።

51 ዒማና ሜሌ ባኣዚ ዑፃ ባኣያ ፓሎ ዓፒላ ማኣዔ ጳጌሰኬይ ሌሊ ዩሱሴኮ ገንፆ ገንፆ ዓኣዳንቴ ዓሳ ዩያ ጳጌሢ ዓርቃዛ። 52 ዩዮ ፓሎ ዓፒሌሎ ኬኤሪ፣ ዑሢ ጉሪ ጳሽኪ ቶሌኔ።

ዩሱሴ ዓይሁደኮ ዎይሢ ዓሶ ቡኪንቶ ቤርቶ ሸኢኬሢ

(ማቴ. 26:57-68፤ ሉቃ. 22:54-55፤63-71፤ ዮሃ. 18:13-14፤19-24)

53 ዩሱሴ ዔያታ ቁኤሶኮ ቢያ ዑፃሢ ማኣሪ ዔኪ ዓኣዳኔ፤ ዒኢካ ቁኤሶኮ ሱኡጎና ጨሞና ሃሢ ሙሴ ዔርዜ ዎጎ ዔርዛ ዓሳ ቢያ ቡኪንቴኔ። 54 ጳጳሮሴያ ቁኤሶኮ ቢያ ዑፃሢ ዲሮ ጋሮ ሄላንዳኣና ሃኬ ሃኬ ዩሱሴኮ ገንፆ ዓኣዳዎ ዒኢካ ዲሮ ጋሮ ካፓ ዓሶና ዎላ ዴዒ ታሚ ካሸታኔ። 55 ቁኤሶኮ ሱኡጎና ዓይሁደኮ ቡኪንቶ ቢታ ቢያ ዩሱሴ ሃይቃንዳጉዲ ዎጊሳንዳ ማርካ ኮዔኔ፤ ጋዓንቴ ዔያታ ዴንቁባኣሴ። 56 ሚርጌሢ ሉኡቁ ማርካቴንቴ ዔያታ ኬኤዜ ጌኤዛ ፔቴ ማዒባኣሴ።

57 ፔቴ ፔቴ ዓሳ ዔቃዎ ሂዚ ገዒ ሉኡቁ ማርካቴኔ፡- 58 « ጎታኣኒ ሃያ ዓሲ ኩቻ ማዞና ጌኤዢ ማኣሮ ሻሂ፣ ሃይሦ ኬሊዳ ሜሌ ዓሲ ኩቻ ማዢንቴባኣያ ማዢንዳኔ» ዒ ጋዓንቴ ኑኡኒ ዎይዜኔ።» 59 ያዒ ዔያታ ገዔንቴያ ማርካታ ዔያቶኮ ዎላ ካኣሚባኣሴ።

60 ቁኤሶኮ ቢያ ዑፃሢ ዔያቶ ባኣካ ዔቃዎ ዩሱሴ ኮራ፡- «ፔቴ ባኣዚታዎ ማሂ ኔ ኬኤዙዎዓዳ? ሃይ ዓሳ ኔጊዳ ጋዓ ባካ ዓይጎዳዎ?» ገዒ ዎኦጩኔ።

61 ዩሱሴ ጋዓንቴ ዚቲ ገዔያፓዓቴም ፔቴ ባኣዚታዎ ማሂ ኬኤዚባኣያ ማዓዛ ቁኤሶኮ ቢያ ዑፃሢ ዩሱሴ ኮራ ላሚ፡- «ዓንጂንቴ ዎኦሲኮ ናኣዚ ሜሲሂ ኔናዳ?» ገዒ ዎኦጩኔ።

62 ዩሱሴያ ማሃዎ፡- «ሂዮ ታናኬ፤ ዓሲኮ ናዓሢ ጳጌኦ ዎኦሲኮ ሚዛቆ ዛላ ዴዒ ዓኣንቴ ሃሢ ጨሪንጮ ሻኣሮና ማዒ ሙካንቴ ዒንሢ ዛጋንዳኔ» ገዔኔ።

63 ዒማና ቁኤሶኮ ቢያ ዑፃሢ ዳጋዲ ፔኤኮ ዓፒሎ ዳርዛዎ፡- «ሜሌ ማርካ ኑም ማይ ዓይጎ ኮይሳይ? 64 ሃያ ዎይዙዎቴ፤

14:49 14:49 ሉቃ. 19:47፤ 21:37። 14:58 14:58 ዮሃ. 2:19። 14:62 14:62 ዳኣኔ. 7:13።

ጾኦሲ ዒዚ ጫሽካንቴ ዒንሢ ዋይዜኔ፤ ዓካሪ ሃይ ዒንሢሞ ዓይጎ ማላይ?» ጋዓዛ፡ ቢያሢ ፔቴ ዑኡሲና፡- «ሃይቢ ዒዛም ኮይሳኔ!» ጌዒ ዋጌኔ።

65 ፔቴ ፔቴ ዓሳ ዒዛይዳ ጨቴ ጨቴ ዓኣፓ ዒዛኮ ዛጉዋጉዲ ቱርጫና ቱኪ፡- «ሂንዳ ኔኤኒ ጾኦሲ ማላሢ ከኤዛያታቴ ኔና ጾኦኒ ዲሌቶዋ ዔሬ» ጌዒ ጌዒ ዔያታ ዒዛ ኩቹ ሙሊ ዲሌኔ። ሃንጎ ዲር ጋር ካፓ ዓሳ ሃሣ ዒዛ ባዒ ባዒ ዔኪ ዓኣዴኔ።

ጳዒርሴኮ ዩሱሴ ታኣኒ ዔሩዋሴ ጌይዎ
(ማቴ. 26:69-75፤ ሉቃ. 22:56-62፤ ዮሃ. 18:15-18፤25-27)

66 ጳዒርሴ ቄኤሶኮ ቢያ ዑፃሢ ማኣርኮ ደኣሌ ዲር ጋራ ዓኣንቴ ቄኤሶኮ ቢያ ዑፃሢም ዓይሢንቴ ማዳ ፔቴ ዉዲር ናይሰኬና ሙካዖ፡ 67 ጳዒርሴ ዒኣካ ታሚ ካሽታንቴ ዴንቂ ኮሺ ዛጋዖ፡- «ኔኤኒያ ናዚሬቶ ዓሢ ዩሱሴና ዋላ ዓኣያቴ» ጌዔኔ።

68 ዒዚ ጋዓንቴ፡- «ታኣኒ ዔሩዋሴ፤ ኔኤኒ ጋዓ ባካ ታኣም ዔርቱዋሴ» ጌዔኔ። ዩማ ዒዚ ጌዒ ካር ባንሢ ከከሰካኣና ኮይዳ ቁኣቄኔ።

69 ዉዲር ናዔላ ጳዒርሴ ዛጋዖ ዒኣካ ዔቂ ዓኣ ዓሶም፡- «ሃይያ ዔያቶ ባኣካ ዓኣያኬ» ጌዒ ላሚ ከኤዚሢ ሳርቄኔ። 70 ዒዚ ጋዓንቴ ሃሣ ጌንሣ «ታ ዒዛ ዔሩዋሴ» ጌዔኔ።

ዳካ ናጋጉዲ ጋዓዖ ዒኣካ ዔቂ ዓኣ ዓሳ ጳዒርሴ ኮራ፡- «ኔኤኒ ጌሊላ ዓሲታሢር ጎኔ ኔ ዔያቶ ባኣካ ዓኣያኬ» ጌዔኔ።

71 ዒዚ ጋዓንቴ፡- «ዒንሢ ዩያ ጋዓ ዓሢ ታኣኒ ዔሩዋሴ፤ ታና ባይዘም» ጌዒ ፔና ጋዳንቂ ጫኣቂሢ ሳርቄኔ።

72 ዩማፓ ኔጉዋዖ ኮይዳ ላሚሣ ቂኢቃዛ ጳዒርሴም፡- «ኮይዳ ላሚ ቂኣቁዋንቴ ሃይሢ ማይንቴ ኔኤኒ ታና <ዔሩዋሴ> ጋዓንዳኔ» ጌዒ ዩሱሴ ከኤዜ ቃኣላ ጾቃዛ ዒሩፓ ጾዩ ዩኤከኔ።

15

ዩሱሴኮ ጲላዖሴ ቤርቶ ሺኢኪዎ
(ማቴ. 27:1-2፤11-14፤ ሉቃ. 23:1-5፤ ዮሃ. 18:28-38)

1 ጉቴ ዋንፃ ቤዘና ቄኤሶኮ ሱኡጋ ጨሞንታ ሙሴ ዔርዜ ዋጎ ዔርዛ ዓሶንታ ሃሣ ዓይሁደኮ ቡኪንቶ ቤዘ ሱኡጎንታ ዋላ ካኣሚ ዘርቴሰካፓ ዩሱሴ ዔያታ ቱኪ ዔኪ ጲላዖሴም ዓኣሢ ዒንጌኔ። 2 ጲላዖሴ ዩሱሴ ኮራ፡- «ኔኤኒ ዓይሁደኮ ካኣቲዳ?» ጌዒ ጾኦጩኔ።

ዲዚ፡- «ኔኤኒ ጌዔሢ ጉዳያኩ» ጌዔኔ።
 3 ቄኤሶኮ ሱኡጋ ጋዓንቲ «ሚርጌ ዳቦ ዓኣኔ» ጌዔ ጋይዲ ጋይዲ ኬኤዛኔ። 4 ዬያር ጲላዎሴ፡- «ዋኣዒ ባኣዚ ዔያታ ኬኤዛቲያ ሂንዳ ኮሺ ዛገ፤ ኔኤኒ ፔቲታዎ ማሂ ኬኤዛ ባኣዚ ማሊ ባኣዓዳ?» ጌዔ ለሚ ያኦጩኔ።

5 ጲላዎሴ «ሃያጉዴ ዓሲ» ጌዔ ዲቃቲ ማላንዳያ ሄላንዳኣና ዬሱሴ ሃሣ ፔቲ ባኣዚ ማሂ ኬኤዚባኣሴ።

ዬሱሴ ሃይቃንዳጉዲ ዋጊንቲሢ
 (ማቲ. 27:15-26፤ ሉቃ. 23:13-25፤ ዮሃ. 18:39-40፤ 19:1-

16)

6 ጲላዎሴ ለዓ ለዓ ዓይሁደኮ ዑሣ ዓኣዲያ ማሊ ቦንቾ ዋደና ዓሳ ቡሊንቶንጎ ጌዔ ያኦጩ ዓሲ ፔቲ ሌሊ ቱኡዞ ዓሶይዳፓ ቡላያኩ። 7 ዒማና ዑራ ዔቂሲ ዓሲ ዋደ ዓሲና ዓይሢንቲ ዒያ ዓሲ ቱኡሲ ማኣሪ ጌሌያ ዓኣኔ፤ ዬና ዓሶይዳፓ ፔቲሢ ባርባኔ ጎሶከኤያኩ። 8 ዓሳ ጲላዎሴ ኮራ ሙካዎ ዋንዴ ዔያቶኮ ለዓ ዔርቲ ጎይያ ቱኡዞ ዓሶም ማዲንታንዳጉዲ ያኦጩኔ። 9 ዲዚያ ዔያቶ ኮራ፡- «ዓይሁደ ካኣቲ ታኣኒ ዒንሢሞ ቡላንዳጉዲ ዒንሢ ኮዓ?» ጌዔ ያኦጩኔ። 10 ዬያ ዒ ጌዔሢ ቄኤሶኮ ሱኡጋ ዬሱሴ ዓኣሢ ዒንጌሢ ቂኢራዋና ማዔሢ ዔራያታሢሮኩ።

11 ቄኤሶኮ ሱኡጋ ጋዓንቲ ዓሳ ጲላዎሴ ኮራ፡- «ባርባኔ ኑም ቡሊንቶንጎ፤ ዬሱሴ ቡሊንቶፓ» ጋዓንዳጉዲ ዓሶ ዓይሢ።

12 ጲላዎሴያ፡- «ሂዴቶ ሃያ ዓይሁደ ካኣቲ ዒንሢ ጋዓሢ ታኣኒ ዋደንደይ?» ጌዔ ዓሶ ለሚ ያኦጩኔ።

13 ዔያታ፡- «ዒዛ ሱሱዳ!»* ጌዔ ጌዔ ጊንሣ ዒላቲኔ። 14 ጲላዎሴ ዓሶ ኮራ፡- «ዒዚ ፑርቲሴ ባካ ዓይጎዳይ?» ጌዔኔ። ዔያታ ጋዓንቲ፡- «ዒዛ ሱዳ! ሱሱዳ!» ጌዔ ሃቲም ዒላቲኔ።

15 ጲላዎሴ ዓሶ ዋዛሳኒ ባርባኔ ቡላዎ ዬሱሴ ዓሶና ጳርቂሲ ሱዳንዳጉዲ ዓኣሢ ዒንጌኔ።

ፖኦሊሳ ዬሱሴ ቦሂ ዓማሊ ሺሬሢ
 (ማቲ. 27:27-31፤ ዮሃ. 19:2-3)

16 ፖኦሊሳ ዬሱሴ ዔኪ ዓጮ ዋይሣ ጲላዎሴ ማኣሪ ዓኣዲ ማርሾ ጋር ጌልዛዎ ዓቲ ማሌ ፖኦሊሶዋ ቢያ ዔኤሌኔ፤ 17 ዒማና ዲንኪ ዞቄ ያደሲ ዓፒላ ዔያታ ዒዞ ማይሲ ሃሣ ካኣቶኮ ቶኦካ ዓጎያ ዓክሊሌ ጎዎ ባኮ ማሊሲ ዓንጌሢ ጉኡሪ ማሂ ቶኦካ ዓጊጋፓ፡- 18 «ዓይሁደ

* 15:13 15:13 ሱሱዳ፡- ጋዓዛ ሱዳሢ ሱሲና ሆላቱዋንቲ ፑርቲሴ ዓሲ ሱዳ ሚሢዳ ለምዎ ኩጮና ቶኮና ሚሰማሬና ጳርቂኩ።

ካአተዮ! ኮሺ ኔኤም ማዖንጎ» ጌሲ ጌሲ ሰሃኔ። 19 ዎኦሽጉዳ ሚሢናኦ ቶኦካ ሲዛኮ ጳርቂ ጳርቂ ጨቺያ ዑፃ ሲዛኮ ጨቲ ጨቲ ሃሣ ሲዛኮ ቤርታ ጎኔ ጉምዓታያ ማሊ ጌሺሢ ጉምዓቶ ጉምዓቲ ጉምዓቲ ዘጌኔ። 20 ዬያይዲ ሲዛ ሴያታ ሰሃ ሺሪሰካፓ ዲንኮ ዞቄ ዓፒሎ ሲዛ ዑፃፓ ከሲ ሲዛኮ ቤርታ ማኦፃ ዓፒሎ ማይሲ ሱፃኒ ሴኪ ዓኦጳኔ።

ዬሱሴ ሱፃንቴሢ
(ማቴ. 27:32-44፤ ሉቃ. 23:26-43፤ ዮሃ. 19:17-27)

21 ሴያታ ዓኦጳ ጎይሣ ዓኦፃ ቁሪና ጎዖ ዓጨ ዓሲ ማዔያ ሲሰከንዲሬና ሩፖሴ ጎዖሰከንሢኮ ዓዶ ሲሞኦኔ ጎዖሢ ካታሞኮ ዙላፓ ካታሞ ጌላንቴ ካኦማዖ ዬሱሴ ሱፃንታንዳ ፑርቲሴ ዓሶ ሱዖ ሚዖ ዓሢ ዎልቁና ከዲሴኔ። 22 ዬካፓ ዬሱሴ ሴያታ «ቶኦኪ ሜጌሢ» ጌይንታ፥ ጎልጎታ ጎዖ ቤዞ ሴኪ ዓኦጳኔ። 23 ሲኦካ ሲዚ ሄሌሰካፓ ፔቴ ካርቤ ጎዖ ጫንቺ ባኦዚና ሲኦሪንቴ ዑሺ ዎይኔፓ ኮሸናያ ዑሸካንዳጉዲ ሴያታ ሲንጋዛ ሲዚ ዑሸኪባኦሴ። 24 ዬካፓ ሴያታ ሲዛ ሱፃዖ ዓፒሎ ሲዛኮ ዲማሲ ሴራኒ ዓጎ ባኦዚ ዎለም ዓገ ፓቂንቴ ሴኬኔ። 25 ዬሱሴ ሴያታ ሱፃ ዎዳ ጉቶኮ ሶኦፓ ዎዴ ማዓኦናኬ። 26 ዬሱሴኮ ዳቢንቶ ሴርዛንዳጉዲ «ዓይሁዴ ካአቲ» ጌይንቴ ፃኦፒንቴ ባኦዚ ፑርቲሴ ዓሶ ሱዖ ሚዖ ዑፃ ዓኦኔ። 27 ሲማና ላምዖ ሱላ ዬሱሴና ዎላ ሴኪ ሙኪ ፔቴሢ ዬሱሴኮ ሚዞቆ ዛላ፥ ፔቴሢ ሻውሎ ዛላ ሱፃኔ። [28 ያሲ ማዔያና «ዎይዞ ሲፃ ዓሶና ዎላ ፓይዲንቴኔ» ጌይንቴ ቤርታ ከኤዞና ዖኦሲ ማሊፃ ኩሜኔ።]†

29 ኮይሌና ዓኦጳ ዓጎ ቶኦኮ ሰሃሢና ዓገሢ ዓገሢ፡- «ዓኦህ! ኔኤኒ ጌኤኮ ማኦር ሻሃ ሃይሃ ከሊዳ ማዞሃ! 30 ሂንዳ ሃሢ ፑርቲሴ ዓሶ ሱዖ ሚዖፓ ከዲ ኔና ዳቂሺ!» ጌሴኔ።

31 ዬያጉዲ ሃሣ ቁኤሶኮ ሱኡጎና ሙሴ ሴርዜ ዎጎ ሴርዛ ዓጎ ዎሊ ኮራ፡- «ሜሌ ዓሶ ሲ ዳቂሺኔ፤ ፔና ጋዓንቴ ዳቂሻኒ ዳንዳዑቆሴ። 32 ሲዚ ጎኔ ሜሲሄ፥ ሲሰራዔኤሌ ካአቲታቶ ሂንዳ ሃሢ ሲዛ ሱዖና ሚዖፓ ከዲንጎ፤ ኦኡኒ ዛገጋፓ ጉሙርቆም!» ሂዚ ጌሲ ጌሲ ሲዛ ሰሃኦና ዬዮ ጎይዖ ሲዛና ዎላ ሱፃንቴ ሱላ ማዔ ዓጎኦ ሲዛ ሰሃ ሰሃ ጫሽኬኔ።

15:21 15:21 ሮሜ 16:13። 15:24 15:24 ዓይኑ 22:18። † 15:28 15:28 ፔቴፔቴ ማፃኦፓይዳ ፓይ. 28ይዳ ዓኦ ቃኦላ ፃኦፒንታኔ፤ ዬና ቃኦላ ሉቃ. 22:37 ጌዳ ዓኦዞ ማላኔ። 15:28 15:28 ዓሲ. 53:12። 15:29 15:29 ዓይኑ. 22:7፤ 109:25፤ ማር. 14:58፤ ዮሃ. 2:19።

ዩሱሴኮ ሃይቂያ

(ማቴ. 27:45-56፤ ሉቃ. 23:44-49፤ ዮሃ. 19:28-30)

33 ዲማና ሮኦሮኮ ዓባ ሳዛ ማዕማፓ ዓርቃያ ደንዲ ማሢ ደንቦልሳ ዎዴ ሄላንዳኣና ሳባ ቢያ ዲሜኔ። 34 ማሢ ደንቦልሳ ዎዴ ማዓዛ ዩሱሴ፡- «ዔሎሄ! ዔሎሄ! ላማሳባቂታኒ!» ጌዒ ዴኤፒ ዑኡሲና ዒላቴኔ። ዩሮኮ ቡሊፃ፡- «ፆኦሲዮ! ፆኦሲዮ! ኔኤኒ ታና ዓይጎሮ ሃሼይ?» ጌይሢኤ።

35 ዒኢካዕቂ ዓኣ ዓሶይዳፓ ፔቴ ፔቴ ዓሳ ዒዛኮ ዒላቶ ዎይዛዎ፡- «ሃይሾ ዒዚ ዔኤሊያሴ ዔኤላኔ!» ጌዔኔ። 36 ዔያቶይዳፓ ፔቴሰኬይ ጳሽኪ ዴንዲ ዎይኔይዳፓ ኮሾና ሶልኪ ኮሽኩዎ ዑሺዳ ዓፒላ ቱርጫጉዴ ባኣዚ ዓገ ዎኦሺ ማሢና ዩሱሴ ዑሽካንዳጉዲ ዒንጋዎ፡- «ጫክ ዔኤሊያሴ ሂንዳ ሙኪ ዒዛ ከሣቴ ኦኡኒ ዛጎም» ጌዔኔ።

37 ዩካፓ ሃሣ ዩሱሴ ዴኤፒ ዑኡሲና ዒላቴኔ፤ ሼምፓሢያ ዒዛኮ ዲዕኔ።

38 ዲማና ጌኤዦ ማኣሮኮ ጋሮይዳ ዲማሲሢ ማሂ ጎኦ ቢሦና ዓፒላ ሎፓ ሉ ሄላንዳኣና ዳርዒ ላምዎ ፓቂንቴኔ። 39 ፑርቴሴ ዓሶ ሱዮ ማፆዮኮ ቤርቶ ዛላ ዔቂ ዓኣ፣ ፔቴ ፖኦሊሶ ዓይሣሰኬይ ዩሱሴ ዩያይዲ ዒላቴ ሃይቂሢ ዛጋዎ፡- «ሃይ ዓሢ ጎኔና ፆኦሲ ናይታዎኮ» ጌዔኔ።

ጎልጎታ ጎዮ ቤዛ ዓኣ ላኣሎንሢ

(ማቴ. 27:55-56፤ ዮሃ. 19:25-27)

40 ዲማና ሃኬ ዔቂ ዛጋ ፔቴ ፔቴ ላኣሊ ዓኣኔ። ዩያቶይዳፓ ማግዴላ ዓጮ ማይራማ፣ ዳኮ ያይቆኦቤና ዮሳ ጎዮዛንሢኮ ዒንዶ ማይራም ጌይንታዞንታ ሴሎሜ ጎዮዞንታ ቢያ ዓኣኔ። 41 ዩሱሴ ጌሊላ ዓጮይዳ ዓኣ ዎዶና ዔያታ ዒዛኮ ገንዖ ሃንታያ ሃሣ ዒዛ ማኣዳያኮ። ዔያቶጉዴያ ዩሱሴና ዎላ ዩሩሳላሜ ሙኬ ማርጌ ሜሌ ላኣሊ ዓኣኔ።

ዩሱሴ ዲኡኪንቴሢ

(ማቴ. 27:57-61፤ ሉቃ. 23:50-56፤ ዮሃ. 19:38-42)

42 ሳባ ዓሜያታሢሮ ዓይሁዶኮ ሃውሾ ኬላ ዑኬም ዓሶኮ ገኢገንቴ ገኢገንቶያ ማዔኔ፤ 43 ዲማና ዓይሁዶ ዓሶኮ ቡኪንቶ ቤዞ ሱኡጎይዳፓ ፔቴ ዮሴፔ ጌይንታያ ቦንቶንታ ዓሲ ዓርማቴያሴ ጎዮ ዓጪዳፓ ሙኬኔ። ዒዚያ ፆኦሲኮ ካኣቱም ዎዛና ካፓ ዓሲኤ።

15:34 15:34 ዓይኡ. 22:1። 15:36 15:36 ዓይኡ. 69:21። 15:38 15:38 ኬሲ. ማፃ 26:31-33። 15:41 15:41 ሉቃ. 8:2-3።

ዲዚ ዲጊጩዋን ጳላዎሴ ቤርቶ ሙኪ ዩሱሴኮ ሌዘ ዲንጋንዳጉዲ ሸኢቁኔ።⁴⁴ ጳላዎሴያ፡- «ዎይቲ ዩያይዲ ዑኩና ዒ ሃይቁይ» ጌዒ ዲቃቲ ማላዎ ፖኦሊሶ ዓይሣሢ ፔ ባንሢ ዔኤሊ፡- «ጎኔ ዲዚ ሃይቁንቲ ናጊያ?» ጌዒ ያኦጩኔ።⁴⁵ ዩሱሴኮ ሃይቁዎ ፖኦሊሶ ዓይሣሢ ኮራፓ ዋይዛዎ ኮሴፔ ሌዘ ዔካንዳጉዲ ዒ ዓይሣኔ።⁴⁶ ኮሴፔ ዓኪ ኮይዚንታንዳ ዓፒላ ሻንቃዎ ዩሱሴኮ ሌዘ ፑርቲሴ ዓሶ ሱዎ ማግፓ ከሢ ሱኡዲ፣ ሹጮ ዶዶ ጳሊ ቦኦኪ ኮሸና ቆኦፖይዳ ዲኡኬሰካፓ ዴኤፒ ሹቺ ኮላሲ ዲኡፖ ዔቶ ካር ዎዴኔ።⁴⁷ ማግዳላ ዓጮ ማይራዋና ኮሳ ዲንዶ ማይራዋና ዩሱሴ ዓሳ ዎካ ዲኡኬቲያ ዛጌኔ።

16

ዩሱሴ ሃይባፓ ዔቁሢ
 (ማቴ. 28:1-8፤ ሉቃ. 24:1-12፤ ኮሃ. 20:1-10)

1 ዓይሁዶኮ ሃውሻ ኬላ ጋፔሰካፓ ማግዳላ ዓጮ ማይራማ፣ ያይቆኦቤ ዲንዳ ማይራማ፣ ሴሎማንታ ዎላ ዩሱሴኮ ሌዘ ተሸካኒ ሳውቃ ተሸ ሻንቁኔ፤ 2 ዉዴ ጉቲ ዓባ ያዎርቃኦና ዲኡፖ ዔቶ ቤዘ ዔያታ ዓኣዴኔ። 3 ዔያታ ዎሊ ኮራ፡- «ሹጫሢ ዲኡፖ ዔቶ ካራፓ ያኦኒ ኦም ኮላሲ ሸኢሻንዳይ?» ጌዒ ዎላ ጌሰቲ ጌሰቲ ዓኣዴኔ። 4 ዔያቶ ዩያ ጌይሴሢ ዲኡፖ ዔቶ ካር ዎዴና ሹጫሢ ኮሺ ዴኤፒታሢሮኬ። ዩካፓ ዔያታ ዴግ ጌዒ ዛጋዎ ሹጫሢ ኮላዲ ዓኣንቲ ዴንቁኔ። 5 ዲኡፖ ዔቶ ዔያታ ጌላዛ ቦኦሪ ያዶሲ ዓፒላ ማኣዔ ዴጌ ማዛቆ ዛላ ዴዒ ዓኣንቲ ዴንቃዎ ዲቃቲኔ።

6 ዲዚ ጋዓንቲ ዔያቶም ሂዚ ጌዔኔ፡- «ዶዶዎቲ፣ ዲቃቲፖቲ፤ ዲንሢ ኮዓሢ ሱዳንቲ ናዚሬቶ ዩሱሴ ማዔሢ ታኣኒ ዔራኔ፤ ዲዚ ዔቁኔ፣ ሃይካ ባኣሴ፤ ዲኡከንቲ ቤዘ ሃይሻ ሃኣዛጉዎቲ፤ 7 ሃሢ ዓኣዲጋፓ ጳዒሮሴንታ ሃንሳ ዒዛኮ ገንዎ ሃንታ ናኣቶንታም ሃያኮ ቤርታ ዲዚ ዲንሢም ከኤዜሢጉዲ ጌሊላ ዲንሢ ቢሪ ዓኣዳንዳኔ፤ ዲኢካ ዲዛ ዲንሢ ዛጋንዳኔ ጌዒ ከኤዙዎቲ» ጌዔኔ።

8 ላኣሎንሢያ ዲጊቹዋና ጎጋይቂ ጎጋይቂ ዲኡፖ ዔታፓ ከሰኪ ጳሸኬኔ፤ ዔያታ ኮሺ ዲጊጩያታሢሮ ፔቲታዎ ያኦማኣ ከኤዚባኣሴ።

16:7 16:7 ማቴ. 26:32፤ ማር. 14:28።

*

ዩሱሴ ማግዳላ ዓጮ ማይራሞም ጴዳሚ
(ማቴ. 28:9-10፤ ዮሃ. 20:11-18)

[9 ዩሱሴ ዉዴ ጉቴ ሃይባገገ ዔቄሰካገ ሴርታዲ ላንካይ ፑርታ
ዒያና ዒዚ ከሴ ማግዳላ ዓጮ ማይራሞም ጴዳኔ፤ † 10 ዒዛኣ
ዴንዲ ያዩሢና ዩኤፒናይዳ ዓኣ ዒዛኮ ጊንያ ሃንታ ናኣቶም ኬኤዜኔ፤
11 ዒዛ ዒያቶም፡- «ዩሱሴ ሃይባገገ ዔቄ ሃሢ ሳዛና ዓኣንቴ ታኣኒ
ታ ዓኣፒና ዛጌ» ጌዒ ኬኤዛዛ፤ ዔያታ ጋዓንቴ ዒዛሲ ጎኔኬ ጌይ
ጉሙርቁባኣሴ።

ዩሱሴ ዒዛኮ ጊንያ ሃንታ ናኣቶይዳገ ላምዖንሢም ጴዳሚ
(ሉቃ. 24:13-35)

12 ዩካገ ሃሢ ላሚ ካታማገ ዙሎ ዓኣዲያ ላምዖ ዒዛኮ ጊንያ
ሃንታሰከንሢም ዩሱሴ ዲማ ጎይሢና ጴዳኔ። 13 ዔያታ ሃሢ ዴንዲ
ዓቴ ዩሱሴኮ ጊንያ ሃንታ ናኣቶም ኬኤዛዛ፤ ጊንያ ሃንታ ናኣታ ጋዓንቴ
ዩንሢያ ጉሙርቁባኣሴ።

ዩሱሴ ታጳ ፔቴ ዒዛኮ ዳኪንቴዘንሢም ጴዳሚ
(ማቴ. 28:16-20፤ ሉቃ. 24:36-49፤ ዮሃ. 20:19-23፤ ዳኪ.
ማዳ 1:6-8)

14 ዩካገ ታጳ ፔቴዘንሢ ካሢ ሸኢሸ ዴዒ ሙዓንቴ ዩሱሴ
ዔያቶም ጴዳያ ዔያቶኮ ጉሙርቁያ ዓቲያና ሃሢ «ዩሱሴ ሃይባገገ
ዔቄ ሳዛና ዓኣንቴ ኑኡኒ ኑ ዓኣፒና ዛጌ» ጌዒ ዔያቶም ኬኤዜ
ዓሶኮ ሃይሶ ዔኪባኣሢሮ ዒናኣ ዔያቶኮ ዒዲ ደዴሢሮ ዔያቶ ቦሄኔ።
15 ሂዚያ ዔያቶም ጌዔኔ፡- «ዓጮ ቢያ ዴንዲዎቴ፤ ዓሶ ቢያሢም
ሃያ ኮገፍ ሃይሶ ዔርዙዎቴ። 16 ጉሙርቁ ጎናሲ ኪሪሰቶሴ ዔኬሢና
ዎኣሢና ማሰቴሢ ዳቃንዳኔ፤ ኪሪሰቶሴ ጉሙርቁ ጎናሲ ዔኩዎኣሢ
ጋዓንቴ ፑርታና ዎጊንታንዳኔ። 17 ታና ጉሙርቁ ጎናሲ ዔካዘንሢም
ቢያ ሃንሢ ዲቃሢ ማዳንሢ ማዳንዳ ቢታንቶ ዒንጊንታንዳኔ፤ ታ
ሱንያና ፑርቶ ዓያና ዔያታ ኬሳንዳኔ፤ ዓኪ ሙኡቲና ጌሰታንዳኔ፤
18 ሸኣገፍ ዔያታ ኩቻ ዓርቁቶዎ ሃሢ ዓሲም ደርዖ ማዒ ዎዳ

* 16:8 16:8 ፔቴ ፔቴ ሚናኣ ማጻጸግ ገይ. 8ይዳ ሂዚ ጋዓ ቃኣላ ዓኣኔ፡- «ላኦሎንሢ
ጴዳሮና ላንሃሢና ኮይላ ዓኣዲ ኪኢታንቻሢ ኬኤዜ ባኮ ቢያ ዔያቶም ኬኤዜ፤ ዩካገ
ዩሱሴ ፔኤር ናንጊና ዳቁንታ ማዔ፤ ላኦሎንቱዎ ኮገፍ ሃይሶ ዓሶኮ ኬዛገ ዴንዲ ጌሎ
ሄላንዳና ዒዛኮ ጊንያ ሃንታዘንሢ ዛሎና ዳኬኔ።» † 16:9 16:9 ፔቴ ፔቴ ሚናኣ፡
ጉሙርቁንታ ማጻጸግ ገይ. 9-20 ዓኣ ገይዳ ቃሶብሴ። 16:15 16:15 ዳኪ. ማዳ
1:8።

ባአዚታ? ዔያታ ዑሽኬቶ ዔያቶም ደርዖ ማዓዓኬ፤ ኩጮ ዔያታ ሃርጊንቴ ዓሶ ዑፃ ጌሃዛ ሃርጊንቴ ዓሳ ዳቃንዳኔ።»

ዩሱሴኮ ጫሪንጮ ዓአዲዖ
(ሉቃ. 24:50-53፤ ዳኪ. ማዶ 1:9-11)

¹⁹ ጎዳ ዩሱሴ ዩያ ቢያ ከኤዜሢኮ ጊንፃፓ ጫሪንጮ ዓአዲ ያኦሲኮዋ ሚዛቆ ዛላ ደዔኔ፤ ²⁰ ዩሱሴኮ ጊንፃ ሃንታ ናኦታ ቢያ ቤዛ ዓአዲ ዓአዲ ዔርዜኔ፤ ጎዳሢያ ዔያቶና ዋላ ማዶኔ። ዲቃሃ ማዶ ማዶንዳጉዲ ቢታንቶ ዔያቶም ዒንጊ ዔርዚዖዋ ዔያቶኮ ዒ ደዲሼኔ።]

16:19 16:19 ዳኪ. ማዶ 1:9-11።

ጌሌዥ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዥ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929